

# HIKAYAT RAJA JEUMPA



rektorat  
ayaan



DEPARTEMEN PENDIDIKAN DAN KEBUDAYAAN

36  
88. *Aja*

## **HIKAYAT RAJA JEUMPA**

# HIKAYAT RAJA JEUMPA

Dialihaksarkan oleh  
**RAMLI HARUN**

Departemen Pendidikan dan Kebudayaan  
**PROYEK PENERBITAN BUKU SASTRA**  
**INDONESIA DAN DAERAH**  
Jakarta 1988

Diterbitkan oleh  
Proyek Penerbitan Buku Sastra  
Indonesia dan Daerah

**Hak pengarang dilindungi undang-undang**

## Pengantar

Naskah Hikayat Raja Jeumpa ini kami peroleh dari pemiliknya Ishak Peutua Gam Meureudu bulan Juli 1985 dan merupakan salinan sendiri dari sebuah naskah lama tahun 1956. Naskah salinan ini tebalnya 216 halaman dengan ukuran 21, 5 x 16,5 cm. Tiap halaman terdiri dari 20 baris. Pengarang aslinya tidak tercantum, demikian juga tahun penyusunannya. Ishak mengakui dalam penyalinannya telah merubah beberapa kata atau susunan bahasa yang menurutnya kurang tepat, tetapi tidak sampai merubah jalan ceritanya.

Mimpi seseorang raja, perang – memperebutkan putri dan cerita-cerita sakti lainnya semuanya mewarnai hikayat ini. Bagi pengamat kesusastraan daerah hikayat ini akan berguna sebagai bahan kajian.

Naskah ini dialih aksarakan oleh Drs. Ramli Harum dosen pada Fakultas Sastra UI.

Jakarta, 1987

Proyek Penerbitan Buku Sastra  
Indonesia dan Daerah

## Ringkasan Hikayat Raja Jeumpa

Negeri Jeumpa diperintahi oleh Raja Abdulah bersama permaisurinya Ratna Keumala. Berkat pimpinannya negeri tersebut terkenal makmur dan maju dalam perdagangan.

Raja Abdulah sangat gembira ketika isterinya melahirkan seorang putri yang oleh ahli nujum diberi nama Siti Geulima. Ketika permaisuri sedang hamil kali kedua Raja Abdullah meninggal dunia. Bayi kedua yang dilahirkan diberi nama Raja Jeumpa. Atas persetujuan menteri dan hulubalang serta orang banyak Raja Jeumpa dinobatkan sebagai putra mahkota sedangkan pemerintahan dipegang oleh perdana menteri. Ratna Keumala meninggal dunia ketika Raja Jeumpa berusia tiga tahun. Ia mengambil alih tampuk pemerintahan dari tangan perdana menteri ketika sudah cukup dewasa.

Tersebutlah Raja Bujang yang memerintah negeri Darul Aman. Raja ini masih bujang dan tidak mempunyai saudara. Para menteri dan panglima menyarankan supaya ia segera berumah tangga. Maka berangkatlah sebuah perutusan ke negeri Jeumpa meminang

Siti Geulima. Lamaran diterima dan tak lama kemudian pernikahan berlangsung. Kemudian Raja Bujang diangkat sebagai raja negeri Jeumpa dan negeri Darul Aman sendiri diserahkan kepada seorang menteri.

Pada suatu hari Raja Jeumpa minta izin kepada kakaknya untuk mendirikan sebuah benteng di pantai Lhab Mana sebagai tempat berjaga-jaga. Siti Geulima dan Raja Bujang menyetujuinya dan dibangunlah sebuah benteng lengkap dengan perlengkapan perang. Benteng itu dipimpin oleh Raja Jeumpa sendiri sedangkan Raja Bujang dan isterinya memimpin benteng Blang Seupeueng.

Adalah sebuah negeri bernama Indra dengan rajanya bernama Raja Muda. Ia mempunyai seorang putri bernama Meureudum Ratna. Banyak yang datang melamar putri tetapi tiada seorang pun yang berkenan di hatinya sehingga membuat ayahnya gusar.

Pada suatu malam Meureudum Ratna bermimpi bertemu dengan seorang pemuda. Demikian pula Raja Jeumpa bermimpi ketika hendak memetik sekuntum bunga di negeri Indra, ditelan oleh seekor naga tetapi kemudian dapat keluar lagi dari perut naga itu. Ia menceritakan mimpiya itu kepada kakaknya. Menurut nujum Raja Jeumpa dapat mempersunting putri impiannya meskipun harus melalui berbagai cobaan.

Meskipun dilarang oleh kakaknya namun Raja Jeumpa tetap hendak mencari putri impiannya di negeri Indra.

Sesudah berbulan-bulan mengembara Raja Jeumpa sampai di sebuah negeri dan bertemu dengan seorang perempuan tua bernama Ni Musip Tapa atau Po Ni. Perempuan itu mengatakan bahwa inilah negeri Indra yang sedang dicarinya dan putri berada dalam istana tetapi amat sulit memasukinya. Karena keinginannya sangat keras untuk menemui putri, Po Ni memintanya supaya bersabar selama tujuh hari.

Sesudah bertapa Po Ni mengatakan bahwa Raja Jeumpa boleh pergi ke istana dengan membawa segenggam tanah untuk disebarluaskan dalam istana. Pesan Po Ni dilaksanakan. Sampai di istana tanah segenggam disebarluaskan lalu tertidurlah semua pengawal. Ia masuk ke kamar putri melalui jendela. Putri sedang tidur nyenyak. Diambilnya cincin putri lalu ditukarnya dengan cincinnya. Sebelumnya ia telah menghabiskan makanan putri dalam hidangan. Kemudian ia pulang. Po Ni menganjurkan supaya esok malam ia pergi lagi.

Ketika terbangun Meureudum Ratna heran melihat makanannya sudah habis, lalu ia menemui ayahnya menyatakan bahwa ia dalam kesepian.

Malam berikutnya Raja Jeumpa datang lagi. Berkat ilmu saktinya seluruh penghuni istana tertidur kecuali Meureudum Ratna yang sedang menanti-nanti orang yang sudah menghabiskan makanannya malam sebelumnya.

Ketika Raja Jeumpa sudah berada di hadapannya kedua insan itu diam tiada berkata. Masing-masing memendam rindu. Sejenak kemudian putri mempersilakan Raja Jeumpa duduk seraya menyuguhkan sirih. Atas pertanyaan putri ia menjelaskan asal usulnya. Akhirnya putri minta agar ia dibawa pergi karena kuatir akan pembalasan pihak-pihak yang ingin memilikinya. Raja Jeumpa berjanji akan melamarnya. Sesudah makan malam ia keluar. Tanpa disadari ketika itu buah runya<sup>1)</sup> terjatuh.

Seorang tukang sapu istana bernama Delem Meugat pagi-pagi menemukam buah ru itu. Ia segera melaporkam hal itu kepada raja sambil mengatakan bahwa putri malam hari tidur bersama seorang laki-laki. Raja amat marah seraya memerintaukan mencari pemilik buah ru itu.

Sore harinya Raja Jeumpa datang lagi ke istana hendak bertemu dengan Meureudum Ratna. Sampai disana hari masih siang. Ia duduk di bawah sepohon kayu di tengah sawah menanti malam tiba. Ketika itu Delem Meugat dan rombongan melihatnya dan menanyakan hal ihwal buah ru. Ketika itu juga ia menuduh perdana menteri mengambil harta miliknya. Karena merasa tersinggung para pengawal hendak mengerebutinya. Melihat gelagat tidak baik ia menghunus pedangnya lalu membunuh siapa saja yang hendak menyerangnya. Banyak pengawal yang tewas ketika itu. Menteri memberitahukan raja bahwa pemilik buah ru sudah diketemukan tetapi buah runya sudah diambilnya kembali dalam suatu perkelahian. Raja amat marah mendengar keterangan menterinya seraya memerintahkan supaya buah ru itu diambil kembali.

Seorang menteri dan rombongan datang ke rumah Musip Tapa dengan membawa hadiah kepada Raja Jeumpa. Menteri minta maaf kepada Raja Jeumpa atas peristiwa sebelumnya sambil

---

1). Semacam perhiasan berbentuk bundar dari emas dipakai oleh orang-orang terkena.

menyerahkan hadiah dari raja. Ketika hendak mengambil ia langsung dirantai dan dibawa menghadap raja.

Mengetahui keadaan kekasihnya demikian Meureudum Ratna menangis tersedu-sedu. Ketika Raja Jeumpa hendak dibunuh kuda saktinya datang membebaskannya dan membawanya ke tempat Meureudum Ratna. Raja amat marah lalu memanggil putrinya dan Raja Jeumpa, tetapi keduanya tidak memenuhi panggilan malahan Meureudum berkata bahwa ia akan pergi jauh daripada hidup merana, lalu dengan mengendarai kuda sakti mereka menuju rumah Musip Tapa. Dari sana mereka meneruskan perjalanan ke negeri Jeumpa.

Ketika Siti Geulima mengetahui bahwa adiknya belum menikah dengan putri Meureudum Ratna, maka diadakanlah upacara pernikahan secara besar-besaran di negeri Jeumpa.

Adapun Raja Muda di negeri Indra sangat malu putrinya dibawa oleh Raja Jeumpa. Ia bertekat akan menyerang negeri Jeumpa meskipun ahli nujumnya melarang.

Pasukan negeri Indra sudah berada di Blang Seupeueng. Mulamula Raja Muda berhadapan dengan Menteri Buman. Perang berlangsung seru. Ketika Raja Jeumpa hendak terjun ke medan perang putri Meureudum melarangnya. Bersama dengan beberapa orang isteri menteri ia menuju medan perang dengan membawa bendera putih sebagai tanda ingin berdamai. Putri Meureudum menemui ayahnya dan minta maaf atas segala kesalahannya. Demikian juga Raja Jeumpa.

Perang telah usai. Kedua pihak telah berdamai. Raja Muda bersama rakyatnya pulang ke negeri Indra. Dalem Meugat yang telah membuat fitnah dihukum mati.

Tersebutlah Raja Cina yang mempunyai banyak ilmu sakti dengan isterinya yang juga ahli nujum bernama Ratna Umbak. Ia sudah mendengar tentang kecantikan putri Meureudum Ratna dan ingin memiliki. Isterinya menentang maksud suaminya karena mengetahui bahwa Raja Jeumpa seorang raja yang sakti. Tetapi Raja Cina tetap berangkat ke negeri Jeumpa.

Ketika pertempuran sedang berlangsung dengan serunya di Jeumpa Putri Meureudum Ratna yang sedang berada di benteng Blang Seupeueng diculik dan diserahkan kepada Raja Cina di kapal, ia dibawa ke negeri Cina dalam sebuah peti kaca sesuai dengan permintaannya sebagai muslihat supaya tidak dijamah oleh Raja

Cina. Dalam keadaan sedih Raja Jeumpa seakan-akan bertemu Musip Tapa. Ia dianjurkan supaya menyusul isterinya ke negeri Cina. Dianjurkan pula supaya ia meminta bantuan Raja Kera yang sedang bertapa di Ujung Raja.

Memenuhi anjuran Musip Tapa dalam mimpinya Raja Jeumpa pergi ke Ujung Raja dan menceritakan segala ihwalnya kepada Raja Kera. Mereka berdua segera berangkat menuju negeri Cina. Ketika Raja Jeumpa dan Raja Kera disihir oleh Ratna Umbak, Musip Tapa datang membantu. Akhirnya sesudah menewaskan Raja Cina dan sekutu-sekutunya Putri Meureudum Ratna dibawa kembali ke negeri Jeumpa. Kota Lhab Mana yang sudah lama ditinggalkan dibangun kembali.

## HIKAYAT RAJA JEUMPA

**BISMILLAHIRRAHMANIRRAHIM**

Deungon Bismillah kisah lon surat  
Lon tueng beureukat nibak agama  
Alhamdulillah limpa that kudrat  
Tuhan hadarat nyang peutroh pinta

Hajat lon salen saboh hikayat  
Lon bri keu sahbat keu tanda mata  
Neubri ya Allah sampoe ban hajat  
Deungon sapaat saidil anbia

Pujoe ngon saleuem lon kheun ka meuhat  
Jinoe lon angkat ngon jaroe dua'  
Lon peumulia rakan ngon sahbat  
Jeuoh deungon rab duson ngon banda

Teuma keu guree takzim horeumat  
Sama lon ingat ulon meudoa  
Keu ayah bunda teuma lom meuhat  
Ureueng peutupat ulon lam donya

Ya Tuhan neuple meuribee rahmat  
Beuk seulamat goh nyan bandua  
Dari donya nyoe sampoe akherat  
Neubri keu teumpat dalam suruga

Lheueh nyan dudoe jinoe lom meuhat  
Keu po hikayat ulon meudoa  
Sabab naseukah sinan lon dapat  
Akan hikayat nan Raja Jeumpa

Ureueng po jeumba hana lon tupat  
Dalam hikayat tan geuboh nama  
Deungon sabab nyan intan malakat  
Idin beule that bak po hareuta

Sabab lon gantoe nyoe ho sinurat  
Buhu hikayatpi ka lon tuka  
Dilee lapan blah asal jih meuhat  
Dua ploh ke jeuet teuma jinoe ka

Pat-pat nyang sirong ka lon peuteupat  
Supaya mangat bak tapham makna  
Waleepi meunan hai bintang takat  
Haña cit cakap bak suson haba

Hana biasa rika hikayat  
Nyoe phon hai sahbat lon cuba-cuba  
Meuah lon lakee meuribee harap  
Salah silab patot neutuka

Sayang dilaoet ribot ngon bakat  
Sayang didarat ulon that hina  
Gampong deungon blang tan ube lalat  
Teumpat hareukat mita beulanja

Punca narit phon ohnoe lon intat  
Muwoe riwayat keu Raja Jeumpa  
Baca rakan droe sampoe beutamat  
Haba riwayat seujarah bangsa

Subhanallah kisah lon kheun proe  
Ulon hareutoe na sidroe raja

Raja Abdullah meugah hana soe  
Neumat keumudoe di nanggroe Jeumpa

Ratna Keumala nama cut putroe  
Nyankeu judo droe di poteu raja  
Rupa that ceudah indah han bagoe  
Laksana ur'oe teungoh keulua

Sinankeu teutap dalam meuligoe  
Deungan judo droe meusuka-suka  
Beungeh hana tompi meung siuroe  
Raja ngon putroe dalam istana

Deungon dendayang sajan sinaroe  
Khadam cut putroe Ratna Keumala  
Teuma di raja cit na jeumba droe  
Wazi ngon meuntroe sajan seureuta

Didalam kuta dumpeue na asoe  
Peunoh sinaroe alat seunjata  
Lom meuh ngon pirak intan ngon pudoe  
Meung peutoe-peutoe dalam istana

Kuta Blang Seupang geukheun seureuloe  
Dilee saboh roe dahulu kala  
Sinoe ngon sideh le ureueng peutoe  
Jijak bloe publoe u nanggroe Jeumpa

Cina deungon Kleng laen sinaroe  
Dilua nanggroe keunan dum teuka  
Sabab ade that deelat nanggroe droe  
Hana tom na roe pubuet enanya

Teutap lam aman peutimang nanggroe  
Rata jueub sagoe makmu lagee na  
Teutabkeu dilee haba keu nanggroe  
Jinoe keu putroe muwoe calitra

Lawet lawan teuma oh dudoe  
Hame cut putroe Ratna Keumala  
Ureueng dum ka troh jeuoh deungan toe  
Jak kunjong putroe dalam istana

Inong ngon agam lakoe ngon binoe  
Ba bungong jaro meunurut kada  
Ladom buleukat meuseukat tumpoe  
Ladom sinaroe jiba u muda

Dalam istana dumna ka sampoe  
Piyoh sinaroe tuha ngon muda  
Lheueh nyan sikeujab siat ka dudoe  
Laju seumanoe cut putroe muda

Oh ka lheueh siap rakyat ka sampoe  
Tinggai cut putroe lam istana  
Tinggai di raja ngon meuntroe-meuntroe  
Lean sinaroe nyang asoe kuta

Raja seumayam di bale pudoe  
Wazi ngon meuntroe nyang jaga lingka  
Laen pahlawan teuma sinaroe  
Rata bak jaro alat seunjata

Teutap di raja bentara meuntroe  
Jinoe keu putroe ulon calitra  
Dalam istana cut Ratna putroe  
Malam ngon uroe deundayang jaga

Peue-peue hawa raja peusampoe  
Laju neuyue bloe keu putroe muda  
Hame ka geunap buleuen ka sampoe  
Saket cut putroe budakpi ka na

Ka lahe budak sigak ban uroe  
Deungon tulong po sidroe nyang Esa  
Aneukpi inong keunong han bagoe  
Tuan cut putroe na aneuk dara

Ureueng lam gampong jitron ka sampoe  
Jeuoh deungon toe keunan ka teuka  
Oh lheueh njbak nyan teuma oh dudoe  
Ka geuseumánoe cut putroe muda

Raja Abdullah tuah samlakoe  
Dalam meuligoe geuek le sigra

Ubak ma bidan yoh nyan neukheum proe  
Neuba nyan keunoe sibijeh mata

Oh lheueh peusuci neubri le jinoe  
Ubak po du droe nyang raja raya  
Raja ka neucok neumat ngon jaroe  
Neukucop bak dhoe neukheun bahgia

Neukalon rupa cahya ban uroe  
Siulah bagoe ban bintang kala  
Bulee keuneng ban buleuen siuroe  
Gaki ngon jaroe lagee geuteumpa

Ate geumbira di raja nanggroe  
Neueu aneuk droe indah that rupa  
Oh lheueh nibak nyan teuma oh dudoe  
Ka neupeujaroe bak bidan sigra

Balot lam tumpee keumbee on panjoe  
Ubak bunda droe teuma le geuba  
Lheueh nyan siseun peumadeueng putroe  
Di raja nanggroe neuwoe le sigra

Keudeh bak bale raja ka sampoe  
Ka sajan meuntroe deungon panglima  
Raja Abdullah titah le meunoe  
Jak pangge jinoe nujum ulama

Nujumpi datang rijang ka sampoe  
Po raja nanggroe meunoe meusabda  
Neurasi nama aneuk lon putroe  
Neukalon jinoe soe geuheu nama

Nujum le neumat kitab u jaroe  
Neubuka jinoe kitab le sigra  
Geupupoh angka keudeh ngon keunoe  
Geuangkat jaroe teuma bak raja

Hai deelat payong tanglong peungarioe  
Nama sinyak nyoe Siti Geulima  
Meunan nujum neukheun hareutoe  
Bak raja nanggroe hana le dawa

Lheueh nyan raja neubuka peutoe  
Seudeukah jinoe neubri le sigra  
Oh lheueh seudeukah syiah ka neuwoe  
Di raja nanggroe tinggai lam kuta

Dalam istana cut Ratna putroe  
Deungon aneuk droe Situ Geulima  
Sabe geutimang malam ngon uroe  
Dalam neugeubo neucum deungon wa

Sijuek peulimbot hogob seumanoe  
Oh watee jinoe cut putroe doda  
Neutarek panton alon meunyanyoe  
Suara bagoe sang-sang biula

Meujak kukheun do dara baro nyoe  
Aneuk lon sidroe beurijang raya  
Beurijang rayek asoe meuligoe  
E bungong geutoe jantong ate ma

Meujak kukheun do siti sambinoe  
Aneuk ulon nyoe beurijang raya  
Beukek meusampe pumateh hiro  
Oh uroe dudoe tabalah guna

Haba meuayon bah puntong ohnoe  
Bel le that rampoe rugoe peucuma  
Habeh ngon uroe meugantoe uroe  
Rayek cut putroe Siti Geulima

Umpama kulat hujeuen ban baroe  
Meunankeu bagoe Tuhan karonya  
Teutap lam seunang raja ngon putroe  
Malam ngon uroe meusuka-suka

Meugrak teukeudi bri Tuhan sidroe  
Hame lom putroe Ratna Keumala  
Na tujoh buleuen geukheun ka sampoe  
Hame cut putroe kali keudua

Raja Abdullah kipah meusujoe  
Neugrak uleh po peunyaket teuka

Oh saket raja ka rugha putroe  
Yoh nyan ka neumoe cut putroe muda

Alah hai raja meukuta naggroe  
Meubagoe-bagoe Tuhan karonya  
Ulonpi hame buleuen rab sampie  
Jinoe teungku droepi ka naza'a

Maken that saket di raja nanggroe  
Maken brat neumoe di putroe muda  
Habeh ka teubiet keunan troh sampie  
Habeh dum meuntroe keunan ka teuka

Ubat ka habeh meubagoe-bagoe  
Di raja nanggroe hana cit teuga  
Meugrak teukeudi bri Tuhan sidroe  
Ohnan ka sampie janji lam donya

Raja Abdullah leupah neujak woe  
Ka tinggai putroe deungon aneukda  
Tinggai istana deungon meuligoe  
Ka tinggai nanggroe deungon panglima

Yoh nyan neubae le tuan putroe  
Alah teungku droe lon yoe han neuba  
Meuhokeu roh lon tinggai lam naggroe  
Deungon aneuk droe Siti Geulima

Didalam uteuen rimueng eh uroe  
Rusa jimanoe didalam paya  
Soe pokeu ate pike han rangee  
teungoh lagee nyoe lakoe geubungka

Teutap jibae di tuan putroe  
Jinoe keu meuntroe ulon calitra  
Geukrah le ureueng bandum lam naggroe  
Jeuoh deungon toe bandum ka teuka

Mayet di raja sigra seumanoe  
Bandum sinaroe mubuet ulama  
Geuboh lam kafan oh lheueh nyan dudoe  
Lheueh nyan geupasoe dalam keureunda

Oh ka lheueh hase bandum seuleusoe  
Di raja nanggroe u jeurat le geuba  
Oh lheueh seumiyub u dalam bumoe  
Rakyat ka jiwoe maseng u tangga

Oh lheueh nyan laju di teungku meuntroe  
Dalam meuligoe geuyue meudoa  
Geumeu khanduri geusie ngon lumo  
Buet-buet meuntroe deungon panglima

Paki meseukin geuhei sinaroe  
Bandum ka sampoe deungon ulama  
Meunankeu sabe peuet ploh peuet uroe  
Dalam meuligoe ureueng meudoa

Hingga troh reutoh piyoh le jinoe  
Seungoe meuligoe seungab lam kuta  
Tinggai deundayang sajan ngon putroe  
Deungon aneuk droe Siti Geulima

Ate geulisah susah tiep uroe  
Teuringat keudroe cut putroe Ratna  
Ingar keu naseb keubit that rugoe  
Sabe cut putroe ro ie mata

Bukon le sayang tilam meusujoe  
Hana le rumboe leukang meuleua  
Ayat lon balek titek lon gantoe  
Meuah keu kamoe kadang tan gura

Laot bahrullah bicah meubura  
Dilaot raya kapai ka rab lham  
Buuh lon balek titek lon tuka  
Lon puwoe haba keu putroe intan

Siploh buleuen pruet Ratna Keumala  
Budak keulua dalam kandungan  
Aneukpi agam Tuhan karonya  
Galak that Ratna putroe budiman  
Putroe ka saket dalam istana  
Cit awai ka na sinan ma bidan

Gadoh geulisah gundah gulana  
Ngon sabab ka na nyan aneuk agam

Sabab ka na soe gantoe ayahanda  
Meunyo aneukda na umu panyang  
Meunan teupike cut putroe Ratna  
Teutap baggia hudep lam aman

Dalam meuligoe tadeungo subra  
Bandum geumbira inong ngon agam  
Hingga di meuntroe neudeungo haba  
Cut putroe ka na aneuk nyang agam

Meuntroe neukek le dalam istana  
Geujak peunyata neukalon ruman  
Oh ban meuntroe eu simeulu cina  
Ate geumbira di meuntroe yoh nyan

Neuduek ngon neudong neukalon rupa  
Miseue ayahanda bacut ubah tan  
Ngon paleuet jaroe bagoe on gaca  
Ngon sapai dua jroh that meutrieng blang

Lom bulee keuneng hibat lagee na  
Mata ban dua lagee buleuen trang  
Keuiengpi rampeng sang lhang dipara  
Ngon baho duapi jroh taht timang

Di teungku meuntroe kon droe geumbira  
Ate that suka sang ka na intan  
Hingga lam naggroe meuntroe seuranta  
Ubak bintara dumna pahlawan

Neuyue tet beude deungon meutaga  
Neuyue tet lila deungan meuriam  
Keutam keutum kiam that subra  
Nanggroe meugeumpa sang-sang ka na prang

Rakyat dum jitren duson ngon banda  
Tuha ngon muda inong ngon agam  
Ngon ahli nujum bandum ulama  
Keunan lam kuta meusaho rijang

Oh ka meusapat rakyat lam kuta  
Turon le sabda bak meuntroe yoh nyan  
Ho ka dum waki wazi panglima  
Ho ka ulama guree lon tuan

Nyang ka meusapat rakyat sineuna  
Tuha ngon muda inong dan agam  
Nibak uroe nyoe na haba suka  
Ka lahe putra cut putroe intan

Nyoe pat cuba eu pakri ban rupa  
Deungon ayahanda peuekeu na saban  
Seuot le nujum neukheun le sigra  
Bah lon pareksa keumala intan

Bah le lon kalon bangon ngon rupa  
Keunoe neuyue ba laju beurijang  
Beudoh deundayang rijang le sigra  
Sinyak ka jiba laju le keunan

Neucok le nujum nekheun bahgia  
Neutilek sigra lua ngon dalam  
Phon-phon nujum eu sifeuet angeeta  
Neukalon rupa miseue buleuen trang

Neukalon ulee lagee geuteumpa  
Neukalon dada bahopi keumang  
Hana ubah ban miseue ayahanda  
Sifeuet angeeta leupah that saban

Oh lheueh pareksa bahgian lua  
Nujum pareksa bahgian dalam  
Deungon ileumee neuthee dum nyata  
Meunyokeu raja nyang that analan

Cit patot that gantoe ayahanda  
Sabab peukasa teuma pahlawan  
Oh lheueh nujum pham dalam ngon lua  
Oh lheueh nyan teuma geurasi gon nan

Nujum neuseubut nan Raja Jeumpa  
Nyang mat kuasa teuma keumudian

Hingga mupakat ngon rakyat dumna  
Deungon panglima dumna pahlawan

Cit patot taboh jinoe keu raja  
Gantoe ayahanda raja sulutan  
Hingga seutuju laju sineuna  
Cok Raja Jeumpa geuba le yoh nyan

Geucok le meuntroe gubo le geuba  
Payong kuneng ka geubuka rijang  
Kuedeh bak batee laju ka geuba  
Rakyat seureuta jiikot sajan

Oh troh u bale peuek le sigra  
Cut Raja Jeumpa geupangkee yoh nyan  
Geupangkee uleh meuntroe panglima  
Bak batee teuma geupeukek rijang

Ka geupeusuon ngon kulah kama  
Rakyat sineuna sujud le yoh nyan  
Jiseubut deelat tuanku raja  
Meujeulih bahsa get that aturan

Geunap tujoh seun keudeelat raja  
Ngon jaroe dua angkat meulayang  
Geuseuot meuntroe boh ka mumada  
Maklum seedara dum sikalian

Meunyokeu deelat po Raja Jeumpa  
Geutanyoe dumna nyokeeu sulton  
Peubeudoh ulon bandum sineuna  
Oh lheueh ban teuma surot beulakang

Dua lhee langkah geusurot sigra  
Deungon seureuta geuangkat tangan  
Geutet ngon beude sare that subra  
Oh lheueh nyan teuma peulheueh meuriam

Meuntroe dibale neutren le sigra  
Dalam istana teuma geuriwang  
Seureuta geume ngon Raja Jeumpa  
Payong kuneng ka yoh nyan phon keumang

Deungon bintara dum jaga lingka  
Lagi seureuta dumna pahlawan  
Beude meukucoh riyoh that subra  
Jiarak raja puwoe u dalam

Dalam meuligoe sampoe le sigra  
Jisambot teuma uleh deundayang  
Laju jipeukek dalam istana  
Jijak bak bunda raja sulotan

Galak that ate cut putroe Ratna  
Neucok aneukda neutimbang-timang  
Neubri ngon susu laju le sigra  
Neucom deungon wa sabe barang jan

Teutap cut putroe dalam istana  
Deungon aneukda suka-sukaan  
Rakyat ka jiwoe bandum sineuna  
Maseng u tangga habeh jiriwang

Tinggai cit meuntroe dalam istana  
Neumat neraca badai sulotan  
Meudang rayek po raja Jeumpa  
Mentroe kuasa dilee seukarang

Aneuk tulo tru dicong u dara  
Teungoh jikua cot uroe timang  
Ngon Ammabakdu lon puwoe haba  
Keu Raja Jeumpa deungon dendayang

Dalam meuligoe ngon Putroe Ratna  
Dalam istana suka-sukaan  
Peuduek perasan peulaloe raja  
Geusok biula geupuh ngon geundrang

Meukhem ngon meukhak surak dum subra  
Nyang dara-dara dumna dendayang  
Oh watee neumoe di Raja Jeumpa  
Jicok le sigra jitimang-timang

Oh ka watee grah jijok bak bunda  
Pumom le lanja le po ma bunda

Oh watee teungeut leugat neudoda  
Ayon meugisa cahya ban intan

Geukheun ngon panton alon suara  
Ate teugoda soe nyang deungo  
Meujak lon kheun do lon doda ida  
E Raja Jeumpa royek beurijang

Meujak kutimang po bintang kala  
Oh malam jula cahya maken trang  
Beurijang rayek po bijeh mata  
Gantoe ayahanda hai uleebalang

Meujak lon kheun do linto baro ma  
Meujak ku doda ayeuem mata nang  
Beurijang rayek e po bintara  
Nyoe nanggroe Jeumpa gata peutimang

Meujak kutimang keumang on capa  
Bungong keupula luroh bak karang  
Beuget meusampoe po ma peulara  
Adoe deungon a dua droe bintang

Jeh putik mancang sikarang dua  
Oh angen raya meuguncang-guncang  
Watee lo ingat ate that luka  
Cit geta dua tingai meulang-lang

Kadang mate lon hai tanglong donya  
Ho tajak gata hai bintang karang  
Beugot tameuen gata bandua  
Bek tameudawa hai uleebalang

Jeh aneuk tulo sijudo dua  
Jipo lam rimba meuncari makan  
Bek tameupake wahe aneukda  
Bandua gata beugot meurakan

Kadang mate lon po ma di gata  
Pakri ban daya gata hai intan  
Beuna hai aneuk sifeuet mulia  
Deungon suara kaum dan rakan

Beugot peurangui ngon ureueng lingka  
Gasien ngon kaya bandum beusaban  
Meung bek hai aneuk tatilek muka  
Tuha ngon muda beuna tasayang

Bek tabri saket keu manusia  
Bek na taceula ureueng bawahan  
Beuna tapike rugoe ngon' laba  
Beuna takira miyub ngon manyang

Meumankeu syae sabe di po ma  
Sira geudoda po bintang karang  
Deungon dendayang sajan seureuta  
Cut Putroe Ratna jihadap sajan

Teuma di sinyak Siti Geulima  
Tuhan karonya umu ka seudang  
Ka jeuet taboh nan nyan aneuk dara  
Siti Geulimapi that rupawan

Teuma diadoe nyan Raja Jeumpa  
Umu lhee thon ka nibak masa nyan  
Ka grák teukeudi Tuhan nyang Esa  
Saket le bunda Cut Ratna Intan

Yoh nyan ka saket Cut Putroe Ratna  
Dalam istana susah hana ban  
Teungoh neugaseh akan aneukda  
Po bijeh mata dua sikarang

Maken siuroe maken brat lanja  
Cut putroe muda payah hana ban  
Ka susah aneurk Siti Geulima  
Susah sineuna deungon dendayang

Meung bu deungon ie hana le hawa  
Ka tinggai rungka oh taeu badan  
Hana padum treb nyang meunan rupa  
Cut Putroe Ratna meuninggai yoh nyan

Ka habeh langkah didalam donya  
Ohnan hat masa neubri le Tuhan

Ka tinggai aneuk Siti Geulima  
Ngon Raja Jeumpa dua sikarang

Soe pokeu ate nyang han roh luka  
Meunyo tarasa nyang meunan macam  
Yoh nyan kajimoe Siti Geulima  
Di raja Jeumpapi that gundahna

Aneuk jibae laju bandua  
Jitumbok dada jimeuhe Tuhan  
Allah Tuhanku nyang that kuasa  
Beusigo ngon ma mate lon tuan

Keu peue roh tinggai kamoe bandua  
Ayah ngon bunda bandua ka tan  
Neutinggai kamoe sinoe lam donya  
Soekeu peulara deungon peutimang

Alah hai naseb keubit seungsara  
Kamoe nyoe dua saleh soe sayang  
Bak droe nyan hai po kamoe meudoa  
Beuseumpureuna uroe keumudian

Keudeh neupreh lon wahe po ma  
Bak titi raya dalam blang padang  
Meunyo seuneulheueh lon ka lon rupa  
Sinoe lam donya wahe ma badan

Keu kamoe beuna pa ma meudoa  
Beujeuoh bala dum sikalian  
Meunan meuratoh Siti Geulima  
Ngon Raja Jeumpa cahya bulen trang

Han jeuet takalon tijoh ie mata  
Miseue ie raya ka meugeulumbang  
Sinan ka teueh didalam tika  
Geunireng bunda bandua sajan

Di ureueng laen asoe istana  
Bandum ka subra inong ngon agam  
Bandum teuka weueh inseueh lam dada  
Bandum seuretuta jiteuka sayang

Peue lom teuringat aneuk nyan dua  
Maken brat duka inong ngon agam  
Po jah meuhei po po nyoe meuhei ma  
Dalam istana ka subra kiam

Leubeh lom karu meuntroe panglima  
Leubeh that subra di po dendayang  
Hana peue habeh meuceh tarika  
Keudroe seedara maseng jeuet tapham

Didalam laot robot meutaga  
Dimieng kuala jidong kapai prang  
Teuma seumanoe Ratna Keumala  
Oh lheueh nyan teuma balot lam kafan

Oh lheueh seumiyub geuyue meudoa  
Alem ulama bandum ka datang  
Nyang samadiah blah ureueng tuha  
Nyang ahli kura jibeuet kuruan

Bulueng seudeukah ban-ban nyang kada  
Meunurut jeumba miyub ngon manyang  
Paki miseukin bandum geumaba  
Meuang sidroe hana nyang jeuet tinggalan

Ka meunan adat dalam agama  
Suroh saidina junjongan alam  
Sunat khanduri sinankeu punca  
Kon ureueng kaya kon taundang

Geubot khanduri ka seumpurna  
Dalam istana hana le kiam  
Haba meusambong Siti Geulima  
Ngon Raja Jeumpa bandua sajan

Dalam meuligoe adoe deungon a  
Sabe jijaga uléh dendayang  
Habeh ngon ureo meugantoe masa  
Dalam bahgia jeumpa meukarang

Han tom meung sigopi na meudawa  
Adoe deungon a sabe lam aman

Maken siuroe laju le raya  
Muda bahlia badan ka seudang

Hingga ka rayek di Raja Jeumpa  
Umu dewasa neubri le Tuhan  
Laju ngon meuntroe timang teurima  
Hukum neugara jinoe geupulang

Geupulang bak droe ureueng po jeumba  
Cit Raja Jeumpa nyang hak peutimang  
Teutap di meuntroe geuwaki raja  
Nyang mat kuasa cut muda seudang

Hukumpi ade gle ngon banda  
Gasien ngon kaya dumnapi saban  
Aneuk yatim dum geutampong sigra  
Geubri beulanja deungon peukayan

Bandum geupuwoe dalam istana  
Han le teulanta teueh bak jalan  
Geujok teumpat buet geupeusikula  
Meunankeu raja nyang nyo Iseulam

Keu inong balee bandum neukira  
Neubri ngon ija neuyue seumbahyang  
Han jeuetkeu teuboh sigala janda  
Hana lam kuta maen ngon agam

Bandum geusidek tilek geujaga  
Meunyo buet mungka ge that geularang  
Inong nyang muda han jeuet keu buya  
Hana jak ronda oh watee malam

Nibak masa nyan di naggroe Jeumpa  
Teutap seuntasabe lam aman  
Di raja nanggroepi that takwa  
Tan sikutika tinggai seumbahyang

Meunankeu sabe di Raja Jeumpa  
Rakyat sineuna bandum that sayang  
Sabab roh tameh ngon puteng bara  
Sabab roh rangka rumohpi timang

Meunyo roh pakat rakyat ngon raja  
Sabe seedara hanakeu jeuet prang  
Teutap keurajeuen di Raja Jeumpa  
Teutap lama kuta neudeuk lam seunang

Ujeuen that kayem musem keunong sa  
Teuka ie raya habeh ngob blang-blang  
Teuduek haba nyoe sinoe sikada  
Jinoe tamula keu Darul Aman

Oh leupah Bireuen Geulumpang Dua  
Oh lheueh nyan ka Geulanggang Labu  
Buhu lon ubah kisah lon tuka  
Lon mula haba ngon Ammabakdu

Keu Darul Aman nanggroe seujahtra  
Jinoe seedara tadeungo laju  
Nanggroepi luah mudah sikada  
Dum sianeka sinan that makmu

Nan raja bujang nyang mat neuraca  
Muda bahlia han le ma ngon du  
Aduen ngon adoe meung sidroe hana  
Hana seedara jeumpa keubiru

Cit ka meunan lak Tuhan neukada  
U ateueh raja kheundak Tuhanku  
Rajapi ade sabe seuntosa  
Rakyat sineuna hana tom karu

Jigaseh meuceh uleh panglima  
Meung bacut hana jadi keuliru  
Muwapakat dudoe meuntroe panglima  
Deungon bintara dan dumna teungku

Keu raja bujang judo tamita  
Mangat seujahtra deelat tuanku  
Putoh ngon pakat bulat keunira  
Putroepi ka na nyang that meunyeuhu  
Jinoe mupakat hajat geubungka  
Keumeung jak lamar po bungong meulu

Keumah ngon pakat beurangkat sigra  
Meuntroe bintara sigra geulalu

Geupeuduek barang u atueh guda  
Sigala rupa peue nyang perlu  
Deungon Bismillah langkah peutama  
U nanggroe Jeumpa lanja geutuju

Hingga ka sampe u dalam kuta  
Le ureueng tuha geutanyong laju  
Peue na meukeusud nyang jeuet teoh teuka  
Teungku bintara peue na perlu

Hingga jawueb le perlu teuka  
Ngon jaroe dua geubeuot laju  
Idin keu kamoe wahe seedara  
Meuhadap raja raya perlu

Idin meutamong u dalam kuta  
Ubak meukuta deelat tuanku  
Oh ka lheueh idin bak ureueng jaga  
Meuntroe panglima tamong le laju

Hingga troh sampoe u dalam kuta  
Ubak meukuta deelat tuanku  
Raja ka neuduek bak singasana  
Peurab le teuma horeumat laju

Marit le sidroe meuntroe nyang tuha  
Bak Raja Jeumpa lanja meungadap  
Ampon tuanku meukuta donya  
Kamoe nyang hina raya that napsu

Jeh pat dijeuoh keunoe troh teuka  
Ubak meukuta nyang that meusyeuhu  
Disinoe meugah na bungong jeumpa  
Dalam istana sangat berbau

Ulon boh malee peuteubai muka  
Kamoe meuhawa keu bungong meulu  
Kamoe peusambong beuneung ngon sutra  
Meuh ngon suasa kamoe peujampu

Beuthat beuhan jeuet wahe meukuta  
Bah kamoe buka ban hawa napsu  
Nibak kamoe na raja nyang hina  
Hana seedara tan le ma ngon du

Harap beuneutueng uleh meukuta  
Keu hamba sahya yue barang kapeue  
Oh watee neujak neuyue hue guda  
Jampang ie raya neuboh keu tutue

Kadang bak kadang putoh beulanja  
Jeuet neupeugala deelat tuanku  
Asai ka neubri duli meukuta  
Cut Ti Geulima kamoe that rindu

Beujeuet keu judo ngon raja hamba  
Nyan keuh meukuta kamoe meunasu  
Meukru seumangat seuot di raja  
Ateueh jeumala suara teungku

Bandum geutanyoe wahe ayahwa  
Gasien ngon kaya hamba Tuhaniku  
Saboh bak ayah neupeugah haba  
Bak kamoe teuma meuribu-ribu

Neutem peusayang kamoe nyang hina  
Pakri seungsara tan ma deungon ku  
Alhamdulillah limpah karonya  
Sang-sang hudep ka pi ma ngon abu

Kamoe teurimong deungon mulia  
Keu judo raja aneuk hana ku  
Meunyo ka neutueng kamoe le raja  
Tameukeurija pajan wakeutu

Pajan keuh watee nyang got kutika  
Nyang ka biasa yoh dulu-dulu  
Hingga seuot le ureueng tuha  
Bak buleuen Safa deelat tuanku

Teuma jawueub le di Raja Jeumpa  
Beutoi ayahwa kamoe seutuju

Bak uroe peuet blaih lam buleuen Safa  
Linto beu teuka keunoe hai teungku

Putoh pakat teupat kutika  
Beudoh le geuba seulangke laju  
Hingga ka geuwoe sampoe bak raja  
U dalam kuta geutamong laju

Teuma meuhadap leugat bak raja  
Laju pareksa deelat tuanku  
Pakri ban putoh ka troh neuteuka  
Bak Raja Jeumpa geuteum seutuju

Meuntroe jaweueb le ngon ate suka  
Wahe meukuta ka troh ban napsu  
Ka geuteurimong nyang tameuhawa  
Hana meudawapi meung sigeutu

Janji ka putoh lusoh kutika  
Bak buleuen Safa peusigra laju  
Oh ban geudeungo meunan ban haba  
Di poteu raja ate that seuu

Hingga neupangge wazi panglima  
Meuntroe bentara ka teuka laju  
Bandum meuhadap leugat bak raja  
Geubuka haba deelat tuanku

Nyang jeuet lon pangge sare lam kuta  
Kadi peutua dan teungku-teungku  
Ulon yue intat ba ranub gaca  
U naggroe Jeumpa keu bungong meulu

Bak peuet blah uroe lam buleuen Safa  
Temeukerureja geutanyoe teungku  
Meunankeu narit teubiet bak raja  
Beudoh bentara beurangkat laju

Hingga ka sampoe u nanggroe Jeumpa  
Tamong lam kuta ubak tuanku  
Teuma peuseumbah nyan ranub gaca  
Ube sikada na bacut sapeue

Kamoe surohan sideh bak raja  
Hajat neuyue ba ranub sigapu  
Bak peuet blah uroe lam buleuen Safa  
Keunoekue teuka deelat tuanku

Meunan suruhan nibak meukuta  
Kamoe troh teuka suroh tuanku  
Teuma neuseuot le Raja Jeumpa  
Siap seudia kamoe meununggu

Jinoe cut putroe kamoe boh gaca  
Bek le meutuka ban nyang ka teuntu  
Bandum antosan yoh nyan jak gisa  
Sampoe bak raja teuma le laju

Bungong sikarang dalam ceumara  
Bungong seulanga ngon bungong meulu  
Jinoe lon peugah keu Raja Jeumpa  
Geupeuphon gaca yoh nyan le laju

Peiduek peurasan didalam kuta  
Ureueng ka teuka lanja meu'u - 'u  
Inong ngon agam kiam dum subra  
Meusuka raya ban hawa napsu

Nibak malam phon langsung geugaca  
Malam keudua meunan cita laku  
Malam nyang keulhee teuntee lom gura  
Malam keurija raya lom karu

Sigala teumpat siap seudia  
Dum sianeka ngon ayu-ayu  
Geuleueng ngon tabeng meupuseng cahya  
Geuleueng ngon tika ikat keulambu

Peureumadani meugisa-gisa  
Teumpat duek raja deellat tuanku  
Kipah meugantung ka jiplueng cahya  
Ngon kaso sutra cahya seumilu

Deungon geuta meuh jampu suasa  
Intan meutia bandum cahya hu

Ka habeh leungkap dalam istana  
Jinoe u lua bacut treuk taeu

Nungkee meuato jambopi ka na  
Beulangong raya ka na u dapu  
Lumo meuikat nyang raya-raya  
Meujandreng banja bak peureudee u

Teumpat preh jamee ka lheueh seudia  
Keurusi mijah meuato taeu  
Banja meuriti meuri ban jeumba  
Nyang leubeh gura teumpat duek linto

Uroe ka suboh jiteubiet paja  
Didalam kuta yoh nyan phon a o  
Ladom sie leumo ladom leueng tika  
Nyang tuha-tuha carong meuato

Nyang beuo-beuo gaduh poh cakra  
Nyang muda-muda siap preh linto  
Di ureueng inongpi saboh gura  
Nyang dara-dara jidong bak pinto

Keunoe ngon keudeh keureuleng mata  
Ngon aneuk muda gaduh meututo  
Di gob seumeupuh jaroe ka lia  
Di jih jikira keu linto baro

Astagfirullah lidah meuhaba  
Hana lon sahja ka roh teulanjo  
Bah teuduek ohnoe dilee sikada  
Jinoe lon gisa keu linto baro

Beurijuek balee bulee jih soebroe  
Tok-tok beuragoe bulee jih ijo  
Bak awai banja lon tuka bagoe  
Bah le taujoe tarek ngon keundo

Blah dara baro bah teuduek ohnoe  
Bahle takheun proe jinoe keu linto  
Oh ka lheueh hase bandum sinaroe  
Beurangkat geuwoe bak dara baro

Meuantri banja get that meuranjo  
Lagee babat droe bandum meuato  
Nyana jak phon dikeue panglima meuntroe  
Deungon sinaroe pahlawan beuho

Teuma likot nyan lom ureueng binoe  
Likot nyan dudoe peruteute linto  
Diateueh guda muda samlakoe  
Dua limong droe peungampe lonto

Lheueh nyan sipai ngon waki sagoe  
Bandum dinaroe tadeungo a o  
Nyang ladom seuon bungkoh meusaoe  
Meuribee bagoe dum dabeueh linto

U nanggroe Jeumpa hingga ka sampoe  
Piyoh sinaroe teuma teungku e  
Yoh nyan peuleupah dum ureueng binoe  
Di ureueng lakoe kheun salle wale

Geumubri saleuem ret deh ret noe  
Han jeuet tadeungo cakap meuhubo  
Hana peue habeh ulon hareutoe  
Ka maklum keudroe buet intat linto

Hingga oh lheueh bu dum ureueng binoe  
Peutamong jinoe pi linto baro  
Geutet meuriam sang-sang lham nangroe  
Tanda nyan jinoe ka tamong linto

Keutam ngon keutum ret deh ngon ret noe  
Siulah bagoe prang that meuhubo  
Hingga u dalam keunan ka sampoe  
Panglima meuntroe seureuta linto

Laju geupeuek ubak seuramoe  
Geupeudeuk jinoe diateueh kaso  
Pajoh khanduri yoh nyan sinaroe  
Lagee babat droe ka lheueh meuato

Oh lheueh pajoh bu teungku ngon meuntroe  
Deungon samlakoe nyang linto baro

Pinah le hidang teuma sinaroe  
Peunikah jinoe putroe ngon linto

Di Raja Jeumpa laju neupeutoe  
Neubri le jinoe wakilah cuda  
Deunogn dum syiah neumumat jaroe  
Neukheun le meunoe ngon pantah sigra

Teungku peunikah cuda dikamoe  
Ngon raja nanggroe Bujang berunama  
Insya Allah wahe samlakoe  
Teungku le jinoe doa neubaca

Oh lheueh fatihah baca sinaroe  
Neukheun le jinoe teungku syekhuna  
Wakilah wali nyan ubak kamoe  
Lon peunikah nyoe putroe ngon raja

Ijab ngon kabui kuedeh ngon keunoe  
Hingga seuleusoe bandum seedara  
Neubri seudeukah dum-dum hajat droe  
Neumumat jaroe deungon syekhuna

Beudoh peungampe na dua lhee droe  
Geumat bak jaroe po linto muda  
Geupeuk laju dalam meuligoe  
Ubak cut putroe Siti Geulima

Po Maja neupreh nyan diseuramoe  
Bak po samlakoe geupeusa dua  
Oh ka lheueh hase sare seuleusoe  
Ban-ban reusam droe di po Maja

Geuboh keu tutoi ija meusujoe  
Geumat bak jaroe peuduek bak geuta  
Teuma beudoh le di tuan putroe  
Sujud le jinoe geuseumah raja

Lheueh nyan neuduek le ban-dua droe  
Nyan tuan putroe ngon poteu raja  
Geduek peungampe ret deh ngon ret noe  
Jipot cut putroe ngon teungku raja

Nyan ret noe buleuen nyang ret deh uroe  
Ureueng dua droe sabe that pada  
Ret deh sang untan ret noe sang pudoe  
Sit hana saho na kalah rupa

Ureueng meusah-sah di dalam sagoe  
Jikheun cut putroe that mubaglia  
Meuteumeu judo siuko ngon droe  
Meuteumeu lakoe nyang sabe padra

Oh teukhem raja teuseuheh putroe  
Neugrak le jaroel neucok ceurana  
Geucok le ranib uleh cut putroe  
Suleueng keu lakoe tuanku raja

Nyang ret noe siat yang nyang ret deh ragoe  
Siulah bagoe ka lheueh gob aja  
Na umpama leukek di dalam taloe  
Cit ka utoh droe nibak jikua

Jula ngon malam ka poh sa sampoe  
Di gob ka geuwoe bandum sineuna  
Ka tinggai raja dalam meuligoe  
Deungon cut putroe Siti Geulima

Keubah pekayan deungon patam dhoe  
Keubah lom dudoe ngon simplah dada  
Keubah gleueng gaki geusuet gleueng jaroc  
Geulob cut putroe lam tire rawa

Neubeudoh raja teuma oh dudoe  
Seutot cut putroe lam-taman indra  
Panyotpih ka len dalam meuligoe  
Seunang cut putroe neueh ngon raja

Haba ka putoh ka troh bak sagoe  
Bek le tamuproe lam tire rawa  
Oh ban geuteupeus ka beungoh uroe  
Geutren jak manoe purtoe ngon raja

Oh lheueh meusuci cut ti ngon lakoe  
Geuek lom dudoe dalam istana

Hidang ka hase sare ngon asoe  
Makeuen cut putroe dua ngon raja

Geupriek ngon eungkot geupinah duroe  
Geubri keu lakoe Siti Geulima  
Oh ka lheueh makeuan geurah ngon jaroe  
Beudoh cut putroe neucok ceurana

Geusuleueng ranub keu cut samlakoe  
Neiduek le rab toe neupeugah haba  
Meukhem teuseuhel rumeh han bagoe  
Leumah ie gigoe na ban meutia

Meukleb ngon mata meugrak ngon jaroe  
Dalam meuligoe wayang ngon seunda  
Meusuka galak ret deh ngon ret noe  
Tan na siuroe dalam meudawa

Habeh ngon malam meugantoe uroe  
Dalam meuligoe teutap nyan raja  
Tautap di raja deunogn cut putroe  
Geunap uroe meusuka-suka

Tapula labu timoh bak rabo  
Pula geureutoe timoh bak buga  
Di Raja Bujang tuah samlakoe  
Geupulang nanggroe le Raja Jeumpa

Geupulang kuta deungon meuligoe  
Keu cut abang droe nyang lakoe cuda  
Raja Bujang yangn urusan nanggroe  
Judo cut putroe Siti Geulima

Teutap disinan aman samlakoe  
Peutimang nanggroe keu gantoe raja  
Di Darul Aman urusan meuntroe  
Peutimang naggroe keu badai raja

Teutap lam aman sideh ngon sinoe  
Dua boh nanggroe ka jeuet seedara  
Nyang di Blang Seupeueng teutap samlakoe  
Sajan ngon putoe Siti Geulima

Di meing kuala buya eh uroe  
Tok-tok beuragoe jipo lam rimba  
Teuduek sikeujab siat haba nyoe  
Lon puwoe jinoe laen calitra

Bukon le sayang jalan krueng panjoe  
Han leupah muto musem ie raya  
Bukon le sayang lon tuan sidroe  
Hana lom ragoe nibak meurika

Karot ngon salah meuah hai adoe  
Laen neugantoe bek salah haba  
Bek jeuet keu caci bahgi ulon nyoe  
Dilon tan ragoe bak seuni satstra

Subhanallah lon ubah rawi  
Awai phon lon bri bunyoe mate ya  
Supaya meunyum sira ngon campli  
Beuthat teurasipi meurasa

Keu Raja Jeumpa mula lon kheun kri  
Deungo hai akhi bek le meutuka  
Nibak siuroe po raja duli  
Meunoe neukheun kri ubak kakanda  
Wahe cut bang lon meukuta nanggroe  
Seureuta lakoe wahe a cuda  
Jinoe ka ulon idin beuneubri  
Keudeh u pasi lon peuget kuta

Keudeh Lhab Mana kuta lon diri  
Mangat toe pasi wahe kakanda  
Kadang soe teupeue Tuhan teukeudi  
Musoh jiili ret laot teuka

Kadang-kadang troh musoh peurgi  
Hai cut bang duil jeuet lon pareksa  
Di Raja Jeumpa meunan neukheun kri  
Jweueb ka geubri le bang ngon cuda

Meunyo ka meunan hai bintang pari  
Geusyik ngon waki pangge le gata

Rakyat ngon utoh beutroh peurgi  
Meuntroe ngon wazi lagi bintara

Mangat tapeuget nyan kuta pasi  
Idin ka mubri bak kamoe dua  
Haba lon rupang bek panyang rawi  
Ka troh jiili rakyat lam kuta

Ka troh bintara meuntroe ngon wazi  
Geusyik ngon waki deungon panglima  
Turun le sabda bak raja duli  
Yoh nyan neukheun kri le Raja Jeumpa

Nyang jeuet lon pangge keunoe peurgi  
Jinoe taili keudeh Lhab Mana  
Tepeuget kuta raya ngon tinggi  
Beurab ngon pasi dimieng kuala

Taglong ngon pacang tajam meuriti  
Sama sikali dalam ngon lua  
Habeh ngon sabda bungka peureugi  
Jicok ngon baci beuliung jiba

Oh troh Lhab Mana hana le lanti  
Beudoh sipai koh kayee raya  
Geupeuget kuta cukup aksi  
Hana tatkri adat tagembra

Jikueh ngon kulam bak teumpat mandi  
Jiglong meuriti dum pacang lingka  
Jipeuget bale teumpat duek duli  
Jipeuget lagi ngon singgasana

Utohpi cakap get that asli  
Hana treb lawi ka habeh lingka  
Oh lheueh peuseuon deungon khanduri  
Po banta saidi tamong lam kuta

Ato meuriam sama sikali  
Ato sipai deungon bintara  
Ato pahlawan kanan dan kiri  
Bak bineh pasi dum jaga-jaga

Teutap di raja dalam meuligoe  
Deungon sakti dendayang muda  
Kuta Blang Seupeueng aduen mufeuti  
Di ampon duli kuta Lhab Mana

Meujan-meujan geuwoe di adoe duli  
Saweue cut ti Siti Geulima  
Di cuda teutap deungaon suami  
Lakoe putroe ti bujang peukasa

Ka teuduek siat riwayat ini  
Lon puwoe rawi u nanggroe Indra  
Dilangit manyang bintang meutabu  
Hana jeuet taeu seumilu mata

Lon pinah haba ngon Ammakdu  
Lon ubah bahu lean calitra  
Na saboh nanggroe nama meusyeuhu  
Nama hai teungku nyan naggroe Indra

Nanggroepi luah leupah that makmu  
Barat ngon timu dumpeue sinan na  
Nyang mat keurajeuen geukheun hai teungku  
Nyang that meusyeuhu nan Raja Muda

Aneukgeupi na nyang ka troh umu  
Nama hai teungku Meureudum Ratna  
Meureudum Ratna Jeumpa Keumiru  
Lagee keululu cahya ie mata

Cahya ie gigoe bagoe uroe hu  
Barangkasoe eu jiteuka gila  
Maklum seedara mubangsa diu  
Maklum hai teungku meung ureueng indra

Goh lom na lakoe cut putroe meulu  
Mantong sajan du dalam istana  
Umpama bungong mantong na madu  
Barat ngon timu kumbang jiteuka

Meureudum Ratna meunan cit laku  
Tiep-tiep wakeutu teulangke teuka

Dum aneuk raja nama meusyeuhu  
Dum aneuk teungku aneuk bintara

Hana cit jitem peusunteng meulu  
Hana seutuju barangri raja  
Susah that raja ate ka ragu  
Sabab cut meulu hana jirila

Geutakot paloe dudoe jeuet karu  
Kadangpi tunu dum aneuk raja  
Yoh nyan ayahanda haba geupayu  
Neupeugah laju ubak aneukda

Wahe aneukda tanglong cahya hu  
Wahe e bungsu Meureudum Ratna  
Gata hai aneuk ban naleueng luhu  
Leumo ngon keubeue hawaijih raya

Beuthat hai aneuk kokoh that pageue  
Oh han ek jieu jipohkeu sahja  
Nyankeu aneuk beuna tatupeue  
Masen ngon tabeue beuna tarasa

Boh na gob lakee keumbee on meulu  
Han taseutuju aneuk le gata  
Meureudum Ratna jiseuot laju  
Meuah hai abu keu lon beuraya

Bukon hai ayah han lon seutuju  
Kheundak tuanku goh troh bak masa  
Oha nankeu narit cut putroe meulu  
Seungab le laju di raja muda

Ka meunang aneuk ka talo po du  
Sabab keunong su Meureudum Ratna  
Sayang pisang wak masak nibak mu  
Sayang putik - u ka tupe seuba

Meureudum Ratna jipeutheun napsu  
Po bungong meulu ka jipuasa  
Dalam istana Jeumpa Keumbiru  
Keu ngon cut bungsu dendayang dumna

Seunda ngon wayang beurcumbu-cumbu  
Meurindu-rindu ngon sabe dara  
Hugub jimanoe oh deuk pajoh bu  
Oh watee seuu geumupoh cakara

Jiduek meutumpok ngon ok meureuereue  
Barangkasoe eu seumilu mata  
Cut putroe cantek baik that laku  
Barat ngon timu meusyeuhu nama

Dum aneuk raja jiteuka rindu  
Han ek that napsu oh syetan daya  
Jipeusak nyawong jitamong laju  
Adat putoh takuepi jih jirila

Adat han jeuet uroe malam jicue  
Bak pihak napsu bah hilang nyawa  
Oh teungoh malam keunan jipeukeuee  
Jilob le pageue tamong lam kuta

Pahlawan jaga hana jitupeue  
Oh putoh takue baro jirasa  
Meunankue sabe tiep-tiep wakeutu  
Le habeh umu dum aneuk raja

Hanakeuh geuthee le ma deungon ku  
Hanakeuh karu jak tuntut bila  
Kureueng sa sireutoh nyang ka habeh umu  
Nyang that meusyeuhu dum aneuk raja

Di Raja Muda maken that tuju  
Meung ie deungon bu tan le meurasa  
Sabab aneuk gob le habeh umu  
Neupreh-preh troh du jak tuntut bila

Teutap di raja hati lam karu  
Geutunggu-tunggu gob jak prang kuta  
Sayang di laot riyeuek meu u-u  
Sayang di po du lam dukacita

Nibak simalam kheundak tuhanku  
Cut putroe Meulu leumah rasia

Malam Jumuat kutika sungoe  
Teungoh beuradu Meureudom Ratna

Na nyum troh teuka bak putroe meulu  
Nyang that meusyeuhu nyan aneuk raja  
Dalam istana jitamong laju  
Ubak cut meulu Meureudom Ratna

Geiduek mausapat meucumbu-cumbu  
Cut putroe meulu hate geumbira  
Ret noepi suka ret dehpi rindu  
Hate that seuu wayang ngon seunda

Sang-sang ka teuka ban hawa nafsu  
Meuteumeu teungku nyang sabé padra  
Oh lheueh geupajoh ranub sigapu  
Marit cut meulu Meureudom Ratna

Soe nan teuseubut nama di teungku  
Soe nan po du pat nenggroe teuka  
Aneuk raja cut jawueub le laju  
Nama di aku nyan Raja Jeumpa

Raja Abdullah nama di po du  
Nama di ibu Ratna Keumala  
Teuma jiseuot cut putroe meulu  
Deelat tuanku lon neupeuhamba

Neutueng ulon nyoe ureueng taguen bu  
Jampang jeuet neuyue bak rhah-rhah ija  
Tengoh meututo po bintang timu  
Teukeujot laju Meureudom Ratna

Oh ban teukeujot nibak beuradu  
Jimoe meuu-u Meureudom Ratna  
Meungpatkeu nanggroe wahe e teungku  
Beutrohkeu laju keunoe neuteuka

Allahu Rabbi neubri beulaju  
Beutrohkeu teungku nyan Raja Jeumpa  
Beujeuet keu lakoe bek rugoe umu  
Beutroh ban nafsu lagee lon cita

Meunankeu sabé putroe meungadu  
Ubak Tuhanку nyang Maha Esa  
Buleukat siseun taculok ngon u  
Meunyo boh labu talhab ngon saka

Meunyo peuteumuen cit ka troh laju  
Han peue tajak eu han peue tamita  
Dalam rasia cinta beuradu  
Meunan hai teungku nyangka biasa

Di Raja Jeumpapi ka le laju  
Kheundak Tuhanку leumah rasia  
Nibak simalam intan cahya hu  
Neueh beuradu lam tire rawa

Oh teungoh malam kutika lalu  
Deelat tuanku leumah rasia  
Na nyum bak' neujak jarak sigeutu  
Méureumpok laju na saboh banda

Keubun bungong jroh saboh deuh neueu  
Meung bee meudru-dru harum lageena  
Na sibak bungong nyang that meusyeuhu  
Na nyum hai teungku sang bungong jeumpa

Barangsoe galak jiteuka rindu  
Barangsoe napsu oh jieu rupa  
Bak uram jeumpa naga na jidu  
Jiuet le laju soe-soe nyang teuka

Kureuengsa sireutoh nyang ka beh umu  
Nyang that meusyeuhu dum aneuk raja  
Di raja Jeumpa rasa ka kuyu  
Han jeuet neulalu pet bungong jeumpa

Ka neubeuet doa teuma le laju  
Si naga hantu ka seupot mata  
Raja neupeurab keunan neulalu  
Neupot le laju bungong jeumpa

Neulhat bak bajee meubee meudru-dru  
Neuteubiet laju lam taman bungo

Dua lhee langkah baro neulalu  
Jaga le laju yoh nyan di naga

Raja ka jiuet lam pruet le laju  
Raja ka teudu dalam pruet naga  
Na nyum ret pusat neuteubiet laju  
Seulamat umu di Raja Jeumpa

Dalam istana neuwoe tuanku  
Oh troh u leupu teuma ka jaga  
Teukeujot raja nibak beuradu  
Teuringat laju akan rahsiā

Yoh nyan phon susah deelat tuanku  
Meung ie deungon bu han le meurasa  
Ie mata ile sabe meudru-dru  
Ingar seulalu pat nanggroe Indra

Hai ya Ilahi kamoe neubantu  
Meuteumeung laju lagee rahsia  
Meunankeu sabe kande cahya hu  
Buet barangkapeue han le neukira

Dumna dendayang ate ka karu  
Jieu tuanku tan teuploh muka  
Meupeuekeu sabab han ek pajoh bu  
Nyang na cit taeu ile ie mata

Dendayang kalon meunan ban laku  
Teuma jibri su ubak bintara  
Dendayang peurab bak meuntroe laju  
Jikheun tuanku lam dukacita

Ie mata ile sabe nyan taeu  
Tan le pajoh bu jeuep-jeuep kutika  
Ban meuntroe deungo meunan ban laku  
Jiek le laju keudeh cong guda

Keudeh Blang Seupeueng jiplueng meu'u  
Jitamong laju u dalam kuta  
Diraja Bujang yoh nyan deuh neueu  
Neutanyong laju mupeue na bala

Ho Raja Jeumpa nyang jeuet tan lalu  
Teuburu-buru lon eu tateuka  
Meuntroe seuot le ampon tuanku  
Ulon jak bri su hai dukacita

Po Raja Jeumpa cahya bintang hu  
Ate that ngilu dalam istana  
Cit ka lhee uroe hana pajoh bu  
Nyang na cit taeu tijoh ie mata

Lon keumeung tanyong han keunong laku  
Ate lon kuyu kadang murka  
Oh nankeu narit meuntroe geubri su  
Di raja laju ek lam istana

Ubak judo droe neupeutoe laju  
Yoh nyan neubri su hai Raja Jeumpa  
Wahe e judo cut putroe meulu  
Meukuemah laju tacok ngon ija

Meuntroe ka teuka bak lon jibri su  
Ate that karu di Raja Jeumpa  
Siti Geulima meuukeumah laju  
Ka cukup dumpeue dum sianika

Keudeh Lhab Mana beurangkat laju  
Tamong u leupu ubak adekda  
Po Raja Jeumpa beudoh le laju  
Geutajo meupru jak seumah cuda

Deungon seureuta ubak tuanku  
Horeumat laju deungon kakanda  
Beudoh dendayang teuma lom laju  
Meunurut laku horeumat raja

Siti Geulima jeumpa keumiru  
Neupeurab laju bak Raja Jeumpa  
Pakon hai adoe gata that karu  
Ulon deungo su lam dukacita

Peugah hai adoe bak lon sigeutu  
Jeuet kamoe bantu hai adoe raja

Cuda geunantoe po ma doungon du  
Beuthat barangpeue jeuet lon useuha

Beuthat hai adoe tawoe lam kubu  
Cudapi laju ikot seureuta  
Cuda teumanyong keunong that laku  
Seureuta taeu ile ie mata

Di Raja Jeumpa seuot le laju  
E cuda teungku leumah rasia  
Ulon meulumpoe meunoe ban laku  
Na nyum lon lalu u nanggroe Indra

Lam keubun bung alon tamong laju  
Teuma deuh lon eu na sibak jeumpa  
Ngon bakpi leusoh manyang that sulu  
Bak uram teudu na saboh naga

Bungong di cong bak dilon that napsu  
Han lon jeuet lalu lon meungpet bunga  
Na saboh isim lon baca laju  
Si naga hantu ka teungeut mata

Bungong ulon pot hase ban napsu  
Ulon tren laju lheueh nyan u donya  
Oh troh bak uram naga jimeusu  
Oh ban lon tupeue naga ka jaga

Ulon ka jiuet lam pruet ka lalu  
Kheundak Tuhanku ka lam pruet naga  
Ret ruhung pusat leugat lon lalu  
Lon teubiet laju leupah u lua

Leupah bak bahya seulamat umu  
Ulon woe laju dalam istana  
Meunankeu haba bak raja bungsu  
Geuseuot laju sidroe peundita  
Beurayek meuah ampon tuanku  
Sampoe ban napsu wahe e raja  
Sampoe ban hajat deelat tuanku  
Cut putroe meulu raja peunjeumba

Teutapi banya teuka sigeutu  
Sabab ceumuru keu putroe muda  
Akan teutapi hana jeuet keupeue  
Tulong Tuhanke leupah bak mara

Di raja nanggroe sampoe ban napsu  
Cut putroe meulu cit judo raja  
Meunan di nujum yoh nyan neubri su  
Ate ka seuu di Raja Jeumpa

Didalam galak jiteuka tunu  
Meujampu-jampu susah geumbira  
Pat ulon mita hai ya Tuhanke  
Barat ngon timu lon tupat hana

Siti Geulima seuot le laju  
Nyan ka tatupeue wahe adekda  
Pakri ban adoe tanyoe peulaku  
Mangat troh napsu laku rasia

Di Raja Jeumpa seuot le laju  
E cuda teungku idin lon bungka  
Geuseuot cuda meunoe ban laku  
Hai adoe teungku membeka tabungka

Tinggai lon sidroe meusoekeu nyang eu  
Adat habeh umu hansapat dua  
Beutatuot ban nyang peusan ibu  
Hai adoe teungku meubek tabungka

Ulon peukawen ngon laen laju  
Nyang jih hai teungku bek le tamita  
Laen lon gantoe putroe meusyeuhu  
Nyang baek laku nyang indah rupa

Meunankeu neukheun le judo teungku  
Neumoe le laju di Raja Jeumpa  
Alah hai cuda paktri ri laku  
Meutamah tunu ate di hamba

Neuraba le kreh bagah nyan laju  
Po bungong meulu penduek bak dada

Geutob droe keudroe yoh nyan le laju  
Bak fie tunu bahle bupahna

Deungon kheundak po sidroe Tuhanku  
Kreh nyan laju ka patah dua  
Oh ban patah kreh peudeueng le geugeue  
Peiduek bak takue di Raja Jeumpa  
Di Raja Bujang geutajo laju  
Geutaugom meupru pendeuang nyan sigra  
Meung bek hai adek maunan ban laku  
Rugoe tutupeue rukon agama  
Nibak kamoe nyoe jinoe seutuju  
Hai adoe teungku bah le tabungka  
Di Raja Bujang meunan neubri su  
Neuseuot laju le Raja Jumpa

Nyankeu hai cut bang sikarang laju  
Bah le lon lalu seutot rahsia  
Siti Geulima teuma lom meusu  
Hai adoe teungku tadeungo hamba  
Tapreh sikeujab hai adoe teungku  
Bek buru-buru gata tabungka  
Ulon peuseuon tanglong cahya hu  
Tameuhei teungku tayue meudoa  
Yue lakee doa keuma ngon abu  
Hai adoe teungku nyankeu tasaba  
Tapiyoh dilee meung saboh minggu  
Ulon meunapsu khanduri keu ma  
Hingga ka geupreh le bintang timu  
Geuturut laju ban nyang kheun cuda  
Siti Geulima teuma le laju  
Geukirem le su jeuep-jeuep peutua

Hingga meusapat barat ngon timu  
Cut putroe laju neupeugah haba  
Neuyue glong jambo yue peugot dapu  
Neuyue drob keubeuc padang raya  
Di ureueng inongpi saboh lagee  
Nyang ladom peh u ladom peh lada

Haseka keumah sigala deumpeue  
Geujak hei teungku fakir ulama  
Geuyue meudoa yoh nyan le laju  
Tadeungo karu dalam istana  
Cit tujoh malam nyang meunan laku  
Oh troh seuminggu baro na reuda  
Rakyat ka jiwoe meuligoe seungoe  
Geuwoe di teungku alem ulama  
Ka tinggai putroe deungon tuanku  
Cahya bintang hu cut Raja Jeumpa  
Deungon dendayang sinan dum taeu  
Ube selaku asoe istana  
Seupot le uroe malampi laju  
Keutika seungoe malam ka jula  
Di Raja Jeumpa han ek that napsu  
Ate that rindu seutot rahsia  
Saboh hikemah neubeuet le laju  
Pangsan seulalu dum asoe kuta  
Asoe meuligoe meunan cit laku  
Teungeut dum sulu sidroe tan jaga  
Di Raja Jeumpa peukeumah dumpeue  
Neusok siluweue neucok ngon ija

Neucok ngon bungkoh boh bacut sapeue  
Ube peureulu dum alat bungka  
Neutren le uleue buleuen cahya hu  
Ka neuhei laju nyan aneuk guda

Gudapi rijang keuanan julalu  
Po bungong meulu neuboh peulana  
Neuboh ngon keukang intan cahya hu  
Lheueh nyan neusinthue ngon bungkoh sutra

Lanja cong guda raja ek laju  
Neumat bulee krui ka neupoh lawa  
Hana meung sidore na ureueng tupeue  
Deelat tuanku leupah neubungka

Neutinggai cuda cahya bintang hu  
Neutinggai leupu deungon istana

Bukon le sayang keu bintang timu  
Jiteubiet laju watee oh jula

Bukon le sayang deelat tuanku  
Pakrikeu laku leupah neubungka  
Meung leuek bangguna hana le laku  
Han tom jikutru didalam cintra

Bak fie ate sabe lam rindu  
Peuseutet napsu lumpoe rahsia  
Bukon le sayang putik pisang nu  
Habeh patah mu buet angen raya

Leupah di raja neubungka laju  
Ka puteh timu uroe ka faja  
Jaga le cuda deungon tuanku  
Neutanyong laju ho Raja Jeumpa

Alah hai putroe hana kamoe eu  
Tan meuthee sapeue teungeut that indra  
Siti Geulima jimoe le laju  
E adoe teungku gata tabungka

Oh malam jula gata talalu  
Hana ulon eu gata meusafa  
Alah hai adoe pakri ri laku  
Ban peusan ibu hana takira

Tatinggai ulon jantong pisangnu  
Peuturot napsu gata tabungka  
Masa saboh roe wasiet bak ibu  
Han jeuet sigeutu toh dua

Nibak uroe nyoe e adoe teungku  
Ek sampoe laju tatingai cuda  
Tasia-sia geupula labu  
Oh watee luhu teuka ie raya

Teungoh lon sayang cut bintang timu  
Teungoh lon rindu gadoh di mata  
Bumate ulon wahe Tuhaniku  
Bek meunoe laku keupeue lom guna

Siti Geulima Jimoe meu'u'u  
Laenpi karu asoe istana  
Di Raja Bujang teuseudu-seudu  
Ie mata laju teubiet meubura

Di teungku meuntroepi saboh laku  
Rasa sang ka ue seusak lam dada  
Di po dendayangpi subra karu  
Allah Tuhan had neujak raja

Bah teutap ohnan dilee sigeutu  
Lon gisa buhu keu Raja Jeumpa  
Oh musem barat bakat meu'u-u  
Oh musem timu hujeuen keunong sa

Ohnoe mumada rika bunyoe u  
Hana get buhu lagee biasa  
Nibak masa nyan jinoe hai teungku  
Le that peue teupeue tanyoe lam donya

Meunyo ragam sot hana get laku  
Jipeugah laju kolot lageena  
Hana le lagot reusam indatu  
Jinoe ka maju reusam ban teuka

Cit na bukeuti dali hai teungku  
Tadeungo laju jinoe lon rika  
Umpama lagee bajee ngon siluweue  
Seun-seun sigeutu laju meutuka

Deungon sabab nyan bintang cahya hu  
Dilonpi laju buhu lon tuka  
Beuthat beusalal uram ngon iku  
Lon pautroh napsu lagee gob hawa

Meunyo meureusam karang duam seuu  
Beuthat tan breueh bu hana jikira  
Ie laot tawar meulumbak-lumbak  
Peuraho jijak meutampoe-tampoe

Meuah hai adoe po bungong meurak  
Ka roh dua krak narit lon rampoe

Dalam meuligoe ka tinggai cut kak  
Yoh masa geujak muwoe samlakoe

Jinoe lon gisa ubak patot hak  
Ategeu palak jak seutot lumpoe  
Geulob lam uteuen tamong lam seumak  
Habeh ngon tapak jitob le duroe

Meubuleuen suntok dawok lam neujak  
Yoh nyan meureumpok gunong seureuloe  
Gunongpi neuk laju neusingkrak  
Raja peusak dak neukab ngon jaroe

Hingga di raja sampoe u pucak  
Napah ka seusak dada sang seungkoe  
Piyoh sijamong po bungong meurak  
Di ateueh pucak muda samlakoe

Keudeh neukalon ho-ho nyang galak  
Luah meuhalak keudeh ngon keunoe  
Dalam masa nyan Tuhan neukheundak  
Leumah le jarak na saboh nanggroe

Didalam ate teupike meugrak  
Bah le ulon jak keunan nyan jinoe  
Laju le neutren neuhayon tapak  
Oh habeh pucak ka tröh u bumoc  
  
U ateueh guda raja neusingkrak  
Neutakat ubak nanggroe nyang bunoe  
Gudapi jiplueng jitnjak-tinjak  
Na miseue burak meunankeu bagoe

Di Raja Jeumpa yoh nyan phon galak  
Sabab ka nampak neukalon naggroe  
Guda ka jiplueng meugrum ngon meugrak  
Meuhayak-hayak meutampoe-tampoe

Meung na sikeujab siat ka neujak  
Po bungong meurak yoh nyan le sampoe  
Neutamong gampong tanglong meubhak-bhak  
Takalon sigak bangon le naggroe

Neukalon rumoh saboh jroh rampak  
Keunan ka neujak muda samlakoe  
Sampoe le uleue buleuen mubahak-bhak  
Neukalon layak ureueng tan sidroe

Neutren cong guda po bungong meurak  
Neumarit sikrak meunoe ban bagoe  
Bak pisang tanglong jantong pisang wak  
Saleh na po hak dalam rumoh nyoe

Putik pisang meuh geutah ceumpeudak  
Soe saleh agak meuhei di bumoe  
Ulon nyoe insan wahe e po mak  
Gampong lon jarak keunoe meurantoe

Ni Musif Tapa buka pinto prak  
Neujeungeuk ubak muda samlakoe  
Neukalon rupa cahya ban pirak  
Jiteuka galak ureueng tuha nyoe

U rumoh inong Po Ni ka neujak  
Ceuiet meugrum grak neubuka peutoe  
Neucok ija krong ngon ija sawak  
Neuboh lom ceulak deungon patam dhoe

Ganceng ngon peundeng bandum meuh pirak  
Cahya meubhak-bhak na miseue uroe  
Neusok gleueng gaki leupah meusigak  
Lheueh nyan ka neusak deungon gleueng jaroe

Cakap dum hase bukon le lagak  
Na miseue cut nyak meunankeu bagoe  
Hingga oh ka lheueh geuboh ngon beudak  
Teuma le geujak ubak sam lakoe

Laju bak pinto neudong ka teugap  
Takalon geugrak ngon dua jaroe  
Teuma geusapa raja nyang ban jak  
Na dua lhee krak geukheun le meunoe

Beurijuek balee bulee jikeuprak  
Jeh aneuk meurak teungoh jimanoe

Teungku meulangkah keunoe neusingkrak  
Jeuoh that neujak wahe teungku droe

Nibak uroe nyoe sampoe ban kheundak  
Meung bu ka masak preh-preh teungku woe  
Meunankeu narit na dua lhee krak  
Ureueng jilagak han thee bungkok droe

Di Raja Jeumpa cit hana meugrak  
Meung saboh tapak hana neupeutoe  
Di Musif Tapa geusuek bak talak  
Yoh nyan lam utak teupike keudroe

Ulon ka tuha pane na layak  
Adat talagak pane na soe bloe  
Ulon kheun teungku pane patot hak  
Ulon kheun sinyak nyang patot jinoe

Di Musif Tapa gisa le geujak  
Alat meuh pirak keubah lam peutoe  
Ngon ija puteh neupileh sikrak  
Lom ija sawa<sup>k</sup> lagee kada droe

Taek hai aneuk po bungong meurak  
Bek lambat hai nyak tadong di bumoe  
Di Raja Jeumpa yoh nyan phon neujak  
Laju neusingkrak ubak seuramoe

Neucok le ranub lam puan pirak  
Lheueh nyan neujak mumat le jaroe  
Mupat di gampong tanglong meuhyayak  
Meusoe nan hai nyak nama gata nyoe

Meusoe bunama po ma ngon bapak  
Lon kalon sigak ban raja nanggroe  
Seuot le sigra cahya meuh pirak  
Deungo hai po mak ulon bareutoe

Nan Raja Jeumpa ulon jhai po mak  
Nama nyan bapak Abdullah sidroe  
Ratna Keumala nama di po mak  
Ube patot hak ulon hareutoe

Dua boh teumpat ulon mat pucak  
Blang Seupeueng hai mak Lhab Mana dudoe  
Meunan calitra po bungong meurak  
Seuot le po mak meunoe ban bagoe

Pakon paleh that rakyat dum hai nyak  
Pakon teukeusyak dum wazi meuntroe  
Pakonkeu raja sampoe jibri jak  
Bit hana utak dum ureueng nanggroe

Bukon jiparoh ulon hai po mak  
Masa ulon jak han soe thee sidroe  
Pakon hai aneuk meunan beutindak  
Sampoe jeuet tajak taboh ngon nanggroe

Teuma seuot le po bungong meurak  
Ate lon p<sup>al</sup>ak peuseutot lumpoe  
Leumah rahsia dilon hai po mak  
Na nyum ulon jak bak saboh nanggroe

Na saboh keubun tanglong meubhak-bhak  
Bungong dum rampak dalam keubun nyoe  
Sang bungong jeumpa na sinan sibak  
Ate lon galak laju lon peutoe

Naga disinan nibak uram bak  
Barangkasoe jalk laju jiseudoe  
Dum aneuk raja carong ngon bijak  
Habeh jipatak le naga pindoe

Cit ulon sidroe sampoe ban kheundak  
Bungong dicong bak hase ulon po  
Bungong ulon mat sangat that galak  
Dudoe ka nampak sang-sang ka putroe

Di nanggroe Indra bak rupa layak  
Putroe that rancak laksana uroe  
Dilonpi suka dijihpi galak  
Meunan meurumpok didalam lumpoe

Na nyum sipade bek cre le jarak  
Jiseurah droe bak ulon nyoe sidroe

Habeh jipeugah peue-peue patot hak  
Meunan meurumpok didalam lumpoe

Po nek seuot le wahe meuh pirak  
Ka beuna hai nyak ban gata lumpoe  
Nyoe nanggrroe Indra nyang ka troh tajak  
Cut putroe rancak na lam meuligoe

Rame that ureueng keunan dum galak  
Oh watee jijak laju meupaloe  
Teuma neutanyong le bungong meurak  
Pakon hai po mak jeuet meunan bagoe

Nyangkeu jeuet paloe sampoe ngon rusak  
Tadeungo hai nyak ulon hareutoe  
Dum aneuk raja keu putroe galak  
Hingga jiyue jak talingke dudoe

Soe-soe nyang teuka cut putroe tulak  
Bandum tan galak jiteueng keu lakoe  
Aneuk raja dum jiteuka palak  
Kareuna galak keu sinyak putroe

Yoh nyan phon napsu laju jipeusak  
Hingga roh jijak bak malam uroe  
Le ureueng jaga lalu jitimbak  
Mate teukeupak sinan le dudoe

Kurang sa sireutoh nyang ka troh bak hak  
Kareuna jijak bak sinyak pitroe  
Di Raja Jeumpa pike lam utak  
Hana nyan farak ban ulon lumpoe

Pakri ban bagoe jinoe ulon jak  
Nak sampoe ubak sinyak cut putroe  
Meunan teupike kande meubhak-bhak  
Didalam utak meucawoe-cawoe

Di Musif Tapa haba geupeujak  
Seun-seun sikrak-krak laju hareutoe  
Bandum geupeugah cit sah lagee hak  
Jroh that meusigak po nek hareutoe

Beuingat-ingat tamat bak bugak  
Samateungoh bak sinan na duroe  
Keu cut putroe nyoe bek that meugalak  
Ateteu rusak geutanyoe paloe

Sabab cut putroe saho tan neujak  
Teutap di cut nyak dalam meuligoe  
Han jeuet tapeugah meung haba sikrak  
Han tom meureumpok deungon barangsoe

Pakri ban laku putroe taajak  
Han tom sitapak neutren u bumoe  
Kuta jijaga rata tambak  
Pahlawan rancak rata peuet sagoe

Han jeuet meudong keunan ureueng jak  
Mate teukeupak sinan meupaloe  
Nyankeu ulon kheun bak gata hai nyak  
Meung that tagalak taingat keudroe

Narit di po nek sang meutimplak  
Ate ka seungkak di raja nanggroe  
Geuseuot laju seun-seun sikrak-krak  
Narit meutimplak geubalah dudoe

Didalam uteuen ne rimueng cabak  
Kureng bak tapak ceubeueh han bagoe  
Masa ulon tren keunoe ulon jak  
Cit ka patot hak mate disinoe

Dicong bak pineueng na umpung meurak  
Dicong bak bugak tok-tok beuragoe  
Adat ka mate meugule lam jak  
Bak pie galak keu sinyak putroe

Ka troh ban napsu sampoe ban kheundak  
Hana le rusak ate dikamoe  
Meunankeu neukheun buleuen mubhak-bhak  
Muhuek ngon meuhak seureuta geumoe

Ie mata ile meulumbak-lumbak  
Dada sang seungkak napah sang ka dhoe

Di Musif Tapa tanyong lom sikrak  
Hai bungong meurak pakon jeuet tamoe

Deungon na tulong bak Ilahul hak  
Sampoe ban kheundak wahe samlakoe  
Deungon na doa po ma ngon bapak  
Gata jeuet tajak dalam meuligoe

Oh lheueh neukheun nyan di po nek neujak  
Laju neupeutak nibak seuramoe  
Neujak taguen bu keu bungong meurak  
Oh ban ka masak neuboh le dudoe

Po nek neuboh bu laju lam tabak  
Neubeuet ubak muda samlakoe  
Peusinget geupet bek treb le hai nyak  
Po bungong meurak peubasah jaroe

Pajoh hai aneuk meung bu bak po mak  
Eungkot tan sikrak ngon gule rampoe  
Sira ngon asam cit saboh cak  
Pasi that jarak sinoe bak kamoe

Geunnantoe eungkot nyoe boh pisang wak  
Siblet-blet tajak sapeue tan sinoe  
Meukru seumangat wahe e po mak  
Rasa ke enak lon makan ngon troe

Tajak pot u groh peugot keu rujak  
Tapajoh galak teungoh cot uroe  
Deungon jaroe soh keunoe ulon jak  
Meuah hai po mak akan ulon nyoe

Oh ban lheueh makeuen po bungong meurak  
Hidang ka geugrak pinah le jinoe  
Geubeuet ranub lam puan pirak  
Marit le po mak deungon samlakoe

Keunireng rumoh timoh bak bugak  
Cabeueng jiramphak keudeh ngon keunoe  
Meunyo meunapsu keu putroe rancak  
Tapiyoh hai nyak dua lhee uroe

Ulon usaha hai bungong meurak  
Lon tapa hai nyak meung tujoh uroe  
Meuteumeung ngon han meung ka tacubak  
Nyan jinoe hai nyak bah le taujoe

Seuot samlakoe laju le sikrak  
Ban hajat po mak lon ikot jinoe  
Ka seungab tuto bandua pihak  
Beudoh di po mak ja kaluet jinoe

Ka tujoh uroe saho tan neujak  
Hana tom meugrak ka tujoh uroe  
Oh lheueh nyan teubiet ka troh u bak hak  
Bak beungong meurak laju geupeutoe

Hajat neukabui le llahul hak  
Gata hai nyak nasukeuh sampoe  
Sampoe ban napsu lagee takheundak  
Euntreuk jeuet tajak bak sinyak putroe

Euntreuk oh malam langkah jeuet tagrak  
Kutika hai nyak reumbang han bagoe  
Di Raja Jeumpa jiteuka galak  
Narit bak po mak ka meunan bagoe  
Uroepi malam na ban geurinthak  
Po bungong meurak peukeumah le droe  
Neungui peukayan intan meuh pirak  
Cahya meubhak-bhak na tamse uroe

Oh ban ka hase kande meuhayak  
Seumbah le po mak laju le jinoe  
Deungo lon peugah bak gata hai nyak  
Oh ban troh tajak bak kuta putroe

Tacok sireugam teuma tanoh cak  
Taseupreuk ubak kuta meuligoe  
Lheueh nyan tatamong hai bungong meurak  
Baro jeuet tajak bak sinyak putroe

Habeh ngon narit wasiet nibak mak  
Beudoh le neujak muda samlakoe

Oh ban troh uleuen buleuen mubhak-bhak  
Laju neusingkrak atueh guda droe

Guda ka jiplueng na nyum meuhayak  
Sampe le ubak kuta meuligoe  
Neukalon kuta raya meusigak  
Rata jeuet sawak na pasang beusoe

Kuta that kukoh leusoh meuhayak  
Rame that awak kawai jeueb sagoe  
Rata jeueb cakcoe ngon tumbak  
Hana soe jeuet jak keunan meusidroe

Di Raja Jeumpa dada ka seungkak  
Pakri ban tajak dalam meuligoe  
Neucok sireugam laju tanoh cak  
Neurhom le ubak kuta meuligoe

Ureueng ka pangsan Tuhan neukheundak  
Rata jeueb kawai hana le thee droe  
Di Raja Jeumpa meuhaba sikrak  
Hai guda kajak beudoh kajak woe

Singoh oh uroe keunoe lom kajak  
Jinoe bah jarak dua geutanyoe  
Oh lheueh neukheun nyan po bungong meurak  
Neubeudoh neujak dalam meuligoe

Neuek bak rinyeun lheueng-lheueng nisingkrak  
Ka sampoe ubak pinto seuramoe  
Dalam meuligoe teuma ka neujak  
Buka pinto prak neulob le jinoe

Neubuka tire mubee meuhayak  
Dadaneu boebhak muda samlakoe  
Neue cut putroe teungoh that nyeunyak  
Cahya ban pirak leumah ie gigoe

Raja ka laloe keu putroe galak  
Nafsu jideusak meudeh ngon meunoe  
Malam ka jula ka sampoe bak hak  
Po bungong meurakpi ka deuek tuloe

Meungbu neueu na sinan lam tabak  
Raja ka neujak pajoh le jinoe  
Habeh geusampoh lum asoe tabak  
Di ureueng po hak'geutupeue han roe

Neucok ngon ranub lam puan pirak  
Po bungong meurak pajoh sigo troe  
Dalam ceurana supah na ulak  
Peiduek saboh cak sinan bak sagoe

Lheueh nyan bak putroe laju bom neujak  
Geusuek bak talak geumat nibak dhoe  
Geusuert le euncien bak jaroe cut nyak  
Geutuka ngon bak euncien jaroe droe

Habeh geupubuet peue-peue nyang galak  
Ban-ban nyang kheundak dalam meuligoe  
Digob dum teungeut bacut tan meugrak  
Po bungong meurak napsu ka sampoe

Oh suboh uroe guda ka jijak  
Po bungong meurak laju neujak woe  
Hingga ka sampoe ubak rumoh mak  
Geutanyong le bak muda samlakoe

Pakri ban ulah tapeugah hai nyak  
Peue hase tajak bak sinyak putroe  
Raja peugah le seun-seun sikrak-krak  
Mula awai bak hingga oh dudoe

Ka ulon pajoh bu-bu lam tabak  
Euncienpi hai mak lon tuka dudoe  
Di tuan putroe teungeut sang ka phak  
Hingga ulon jak keunoe ulon woe

Meunankeu neukheun le puan pirak  
Seuot le po mak oh lheueh ban dudoe  
Muentyo ka meunan hai bungong meurak  
Malam singoh jak aneuk lom dudoe

Ban sinyak putroe cit gata po hak  
Meunan neukheundak le Tuhan sidroe

Oh lheueh neukheun nyan meunan le po mak  
Beuot le tabak ukeue samlakoe

Oh lheueh pajoh bu meulu meukeuprak  
Geupinah tabak uluh po ma droe  
Teuduek haba nyoe disinoe hai nyak  
Lon kisah ubak sinyak cut putroe

Manyang meuhayak pucak gunong goh  
Tangieng di jeuoh na kareueng puteh  
Kisah lon puwoe cut putroe leusoh  
Teungoh that layoh teungeut bak neueh

Oh ban teukeujot uroe poh siploh  
Mata geusampoh ate ka peudeh  
Peurab bak hidang bu keumeung pajoh  
Alah intan beh dumpeue ka habeh

Ranub lam bate kon le ban geuboh  
Ranub ka awoh na sikrak seupeh  
Saleh cit soe-soe keunoe nyan katroh  
Cut putroe utoh meunoe meukureh

Jiteuka malee po bintang tujoh  
Kadang cit tuboh ka gob eu habeh  
Putroe ka susah ate that rusoh  
Allah Tuhan beh nasib lon paleh

Sayang cut putroe jimoe ka riyoh  
Meunalee tuboh gob kalon habeli  
Soe po keu ate han hanco luloh  
Sang-sang diboh tanyoe ka jaeh

Yoh nyan teupike kande seumeuloh  
Bah kujak beutroh bak ayah keudeh  
Meukeumah rijang po bintang tujoh  
Hinggapi katroh po bungong puteh

Oh troh bak ayah ie meuh seuneupoh  
Rajapi layoh dalam tika eh  
Cut putroe peurab leugat keunan troh  
Ayah neuseuntho ceupet bak beuteh

Jaroe cut putroe licen' ngon haloh  
Leupie lam tuboh na miseue dadeh  
Neupeukek peutren atueh ngon baroh  
Teukeujot meuptoh di raja aref

Raja that bengeh meutat-tat tuboh  
Soe nyang that utoh jok peugoe lon eh  
Nibak uroe nyoe takue jih putoh  
E tauen biyoh soe nyang that paleh

Seuot le dudoe putroe seumeuloh  
Seureuta jiboh dua krak-rinreh  
Jeh aneuk tiyong dicong bak pawoh  
Jeh aneuk puyoh di cong bak manggeh

Meung kon aenuk droe wahe ayah beh  
Pane na utoh peugoe ayah eh  
Peugah hai aneuk bintang seumeuloh  
Pakon aneuk beh tapeugoe lon eh

Nibak uroe nyoe peue na nyang reunggoh  
Jaroe kon tan troh bintang peureuseh  
Meukru seumangat wahe ayah beh  
Jaroe lon siploh lon buet meulapeh

Putroe jiseuot sangat that utoh  
Ragam ka jiboh meunoe ngon meudeh  
Garang rapai meunyo na daboh  
Leumo meureugoh iku jih puteh

Sang-sang ulon nyoe umu goh lom troh  
Wahe ayah beh lon han neugaseh  
Sang goh na adoe meudua lhee ploh  
Sang goh lom utoh meunoe ngon meudeh

Bungong rab layee ulah ulah rab luroh  
Dalam angen meuboh bungong nyang puteh  
Watee teuringat keunaseb tuboh  
Hana saho roh dalam tika eh

Leumo agam gruk ka raya boh goh  
Jiret on iboh lampoh meurandeh

Dumna roe seuu meung bu tapajoh  
Ate teurusoh han soe puepuleh

Keupeue na reudok ujeuen han jitoh  
Keupeue na kaoh gakiteu peudeh  
Tire ngon tilam keupeuen ulon troh  
Hana saho roh dumna tika eh

Ohnankeu narit cut puteh leusoh  
Leupah that utoh bak jiboh rinteh  
Di raja muda ate ka layoh  
Hanco sang tuboh lagee geuireh

Deungon ie mata sret seun-seun siploh  
Jeuoh pipajoh narit cut puteh  
Yoh nyan geukheun le wahe aneuk beh  
Bek that rusoh bintang peureuseh

Na ayah gata nyang kira beutroh  
Jinoe aneuk beh tajak woe keudeh  
Bukon salah lon hai meuh seuneupoh  
Padumna ka troh raja nyang arif

Mantong bak gata haba meutanggoh  
Nab nyang lon peutroh bandum talangkeh  
Jinoe baro phon tutong lam tuboh  
Pakon aneuk beh ka laen ureh

Bukon salah lon hai uteh leusoh  
Narit ka putoh masa uroe jeh  
Beuthat bumeunan kaman bek riyoh  
Ulon meutanggoh hai bungong nireh

Daleh cit haba ka tajak peutroh  
Ka saboh siploh wahe cut puteh  
Jinoe tajak woe dilee aneuk beh  
Ka na peunutoh ka na peunuleh

Tasrom boh mancang keunong boh pawoh  
Teukeujot tikoh oh troh mie puteh  
Ragam lon balek titek ulon boh  
Pat-pat nyang han roh neugantoe bareh

Bukon le sayang keubintang kutub  
Cahya meusagob jitob le awan  
Beudoh le jiwoe sinyak putroe cut  
Laju jiiokt uleh dendayang

Jitiiek ngon aleh langkah ka jibot  
Miseue jimeulot ceumpala subang  
Soe-soe nyang kalon ate meukrot-krot  
Adat jeuet jiuet meunan rupa sang

Han peue lon peugah haba nyang lanjot  
Sampoe putroe cut nibak bineh blang  
Jieu boh panjoe hawa putroe cut  
Teuma jiyue syet ubak dendayang

Hingga boh panjoeipi laju ka sret  
Peurab putroe cut ka neujak rijang  
Jisek boh panjoe teukeujot-keujot  
Sinyak putroe cut le seunda wayang

Didalam ate sabé meukrot-krot  
Meusangkot pawot deungon buet beuklam  
Sinyak cut putroe teusie le bacut  
Sabab meusireut sakin nyang tajam

Yoh nyan cut putroe laju ceumarot  
E sikién tau'et leupah that keujam  
Teuma dendayang laju jiseuot  
Ata han seb buet di putroe intan

Hana neuharap nyang kamoe pubuet  
Sang-sang kamoe u'et laju peureulan  
Yoh nyan boh panjoe lam jaroe po cut  
Taeu meuleubub taeu neutuang

Hana kupakon keu boh rimueng uet  
Han jeuet keu troe pruet boh mate geucang  
Laju jijak woe sinyak putroe cut  
Meuikot-ikot deungon dendayang

Oh troh u rumoh sinyak putroe cut  
Manok ka jilob u dalam kandang

Jijak taguen bu jitot ngon eungkot  
Dendayang beuot keu putroe intan

Sinan didalam hidang ka jitob  
Jan-jan deuk putroe teuma neumakan  
Dendayang jak eh keudeh u likot  
Tinggai putroe cut sinan didalam

Didalam kama cahya bintang sret  
Ate meukrot-krot ingat buet beuklam  
Le that bicara sinyak putroe cut  
Akai bek teungeut pakri ban macam

Oh ban rab teungeut siputik rambot  
Punyok ceureulob dalam ie asam  
Peudeh ngon lia rasa meukrot-krot  
Pane lom teungeut cut putroe intan

Teutap di putroe hanakeu teungeut  
Hingga le lanjot jula ngon malam  
Jipot ngon angen tarek seulimbot  
Watee rab teungeut neuboh ie asam

Bak bineh paya na aneuk got-got  
Bak bineh laot jidong kapai prang  
Lon peuduek haba sinyak putroe cut  
Jinoe lon seubut keu uleebalang

Oh ka lheueh Meugreb uroe ka jilob  
Malam ka seupot cahya han le trang  
Deungon peukayan neungui ka cukop  
Neutron le uyup hei Palahidang

Gudapi ka troh keunan jigrob  
Po putik rambot neutimphang rijang  
Oh troh cong guda cahya bungong sret  
Po nek peusambot hikeumat yoh nyan

Raja neucok le sigra neukucop  
Didalam paleuet neutimang-timang  
Oh lheueh nibak nyan po bintang kutub  
Langkah ka neubot guda teureubang

Guda ka jipo lagee geubapot  
Gunong meusagob laju jibangkang  
Hana sapat nyang na bagoe geubapot  
Tajam that jigrob aneuk guda plang

Leupah Takengon tamong u Angkob  
Malampi seupot laju han le trang  
Hingga ka sampoe di samlakoe cut  
Hikeumat lam paleut neusrom le rijang

Dum asoe kuta pangsan ka teungeut  
Illa putroe cut nyang hana pangsan  
Guda jilagak ka jijak ban buet  
Ate tan kuyut muda bangswan

Guda jilinggang ban layang pocut  
Suara uyub na bagoe geundrang  
Kacrang ngon kacring grang gring ngon grob grob  
Guda peugot buet lagee peurasan

Suara geunta bak rueng deungon pruet  
Oh watee jigrob lagee su canang  
Dua blah macam ragam jupeujeuet  
Lagee ureueng beuet nyang got that lagam

Meujan-meujan manyang meujan-meujan miyub  
Sinyak putroe cut ulee ka mumang  
Didalam ate teupike bacut  
Soekeu pubuet-buet nyang neunan macam

Meunankeu raja nyang troh meukeusud  
Hase geupeungeut dumna pahlawan  
Wazi ngon meuntroe bandum ka teungeut  
Raja nyan that jeuet dumna saktian

Cit gob nyan kadang nyang beuklam pubuet  
Ulon ka teungeut gob nyan po pangsan  
Lagee lon lumpoe sang nyoekeu ka jeuet  
Ya Tuhan makbud neubri sampoekan

Meunan meurawi lam ate po cut  
Yoh nyan dalam pruet ka jeuet geulumbang

Bahle kupangge mangat hase buet  
Yoh nyan putroe cut neubeudoh rijang

Neutren ka curam laju le uyub  
Tuan putroe cut neuduek bak tilam  
Di Raja Jeumpapi ka le neugrob  
Laju ka neulob keunan u dalam

Guda jiriwang keudeh u likot  
Raja ka patot tinggai disinan  
Hingga neupeurab laju seun bacut  
Ubak putroe cut Keumala Intan

Aneuk tulo po manyang ngon miyub  
Pade meung ie cut get that jipandang  
Raja ka tahe neweu putroe cut  
Ka teupet teubleut di ateueh tilam

Ate meuguncang nyawong sang teusuet  
Di samlakoe cut iman sang karam  
Di tuan putroe leubeh lom bacut  
Meusapeue han jeuetpi le meukalam

Didalam ate lagee geubapot  
Miseue ie laot ka meugeulumbang  
Laksana mie deuk ka leumah eungkot  
Meunan meunurot lon boh bayangan

Oh puleh laloe tuan putroe cut  
Nyan baro phon jeuet geubuka kalam  
Na miseue tulo ka lheueh lam balot  
Sayeup jibeubot laju teureubang

Putik boh langsat karang boh rambot  
Sinyak drob eungkot didalam kulam  
Jaroe ban siploh lon tuan beuot  
Piyoh raja cut u ateueh tilam

Jeuoh that teuka kuweuet ngon teuot  
Jinoe ka patot piyoh cut abang  
Meukru seumangat raja neuseuot  
Leuamah ngon leumbot raja meukalam

Neubo dikamoe e sambinoe cut  
Sang-sang ka teubleut puleh bak pangsan  
Cut putroe beudoh langkah jibeouot  
Jicom bak teuot jamee ban datang

Putroe peujaroe ngon batee ranub  
Sinyak putroe cut jikheun le nyoe ban  
Nyoe na ranub tho tawo bak reudeuep  
Pajoh teungku cut peue na mudahan

Meukru seumangat hai bintang kutub  
Bak lon hai po cut kumeuniet intan  
Nibak adekda na cit meung ranub  
Bak lon adoe cut meusapeuepi tan

Teukhem teusinyom sinyak putroe cut  
Keunong that jaweueb nibak cut abang  
Miseue ureueng nyang ka malem bak beuet  
Dumpeuepi ek jeuet neubalah kalam

Oh lheueh seuleusoe geupajoh ranub  
Marit putroe cut cahya buleuen trang  
Tajak pot u groh tapeugot dut-dut  
Talhab seun bacut deungon manisan

Hai deelat ampon lon tuan sujud  
Tuanku jaweueb tanyong lon tuan  
Meuang pat bu gampong neupeugah ban buet  
Peue na meukeu sud keunoe troh datang

Ayah ngon bunda soe nan geuseubut  
Narit nyang patot tuanku peutrang  
Di Raja Jeumpa laju neuseuot  
Ngon leumah leubot neujawueub kalam

On abeueng-abeueng dum angen bapot  
Ladom meusangkot ladim sret u blang  
Alah hai putroe ie meuh seunalob  
Han jeuet lon seubot hai putroe bintang

Jeuoh that naggroe keunoe lon ka sret  
Mata Uroe lob tanda disinan

Ayah ka mate po ma lon ikot  
Tinggai lon po cut sidroe meulang-lang

Alah na cuda sidroe meukeuteuet  
Kamoe meujeuet-jeuet meugaseh sayang  
Nyang jinoe cuda wahe putroe cut  
Keu judo ka jeuet ngon Raja Bujang

Raja Abdullah ayah lon hai cut  
Nama geuseubut dilee keumudian  
Ratna Keumala po ma lon po cut  
Ngon kheundak makbud bandua ka tan

Nan nanggroe Jeumpa dilee geuseubut  
Hai bintang kutob beuna tatuban  
Dua boh kuta disinan ka jeuet  
Blang seupeueng nyan sret keu Raja Bujang

Kuta Lhab Mana teuma saboh treuk  
Sinan hai po cut teumpat lon tuan  
Meunankeu haba raja neuseubut  
Sinyak bungong sret keu Raja Bujang

Lagee rasia hana meuisseuk  
Jiharap beujeuet keu judo badan  
Yoh nyan jimirit sinyak putroe cut  
Lagam jihpi jeuet nibak jibayang

Sideh dalam glee na awe sabot  
Uram ka jitot uleh jeulatang  
Rasia lumpoe nyokeu baro sret  
Pakon raja cut treb that troh datang

Oh ka lheueh ujeuen jiteuka sagob  
Lheueh nyan ka seupot sagob meureuntang  
Leumah rasia cit ka na patot  
Pakon raja cut jula that datang

Kuala Idi geukawe eungkot  
Cot Jeumpa Pulot ureueng kueh kulam  
Buhu lon ubah nalam lon cabot  
Jinoe lon seubot nyang leubeh garang

Meunyo na reudok ujeuenpi ka na  
Teuka ie raya jiba dum rabon  
Meunyo mantong trang ate lam dada  
Mantong lon rika seun-seun sion-ion

Deungon tulong po sidroe nyang Esa  
Beutroh ban pinta hajat lam jantong  
Putroe maututo dua ngon raja  
Tadeungo haba jinoe lon sambong

Aneuk leuek kutru didalam cintra  
Manok juara jipajoh jagong  
Harap lon tuan hai po meukuta  
Ulon nyoe neuba hai deelat ampon

Han ek lon theun droe ate deurita  
Nasib seungsara susah lam jantong  
Lon takot datang keunoe dum raja  
Jijak tueng bila keunoe bak ulon

Sabab aneuk jih le that ka pana  
Seureutoh kureueng sa nyang ka len nyawong  
Nyankeu lon harap wahe kakanda  
Lon neupeuhamba hai teungku ampon

Mukim sikureueng ureueng seumula  
Mukim meuraksa rumoh meugeudong  
Han jeuet keu judo bahle keu hamba  
Asai ka neuba rila bak ulon

Meukru seumangat hai putroe muda  
Ateueh jeumala lon tuan seuon  
Gata lon meuniet ban bungong jeumpa  
Barang ho lon ba lon lhat bak pusong

Got that lon sunteng lon peumulia  
Adat jeuet gata bek cre ngon ulon  
Beujeuet keu judo meunan sang rupa  
Meung na bagia tuah lam jantong

Akan teutapi pakri lon daya  
Ulon adekda lagee gleueng puntong

Beuhe lonpi tan carongpi hana  
Hana seedara wali ngon karong

Hana sakti lagi tandra  
Pakri ulon putroe lon peutren  
Han jeuet lon harok putroe jroh rupa  
Lon takot pana sinoe mate lon

Geunap sireutoh ngon aneuk raja  
Ka troh ban pinta gata hai tanglong  
Peunoh ban napsu meusyeuhu nama  
Suami gata le taht meuron-ron

Nyankeu lon kheun hai ayeuem mata  
Dilon tan daya hai putik sukon  
Teuma seuot le cut putroe muda  
Deungon ie mata meugulong-gulon

Sayang keutapang dimieng kuala  
Watee ie raya meugulong-gulon  
Bak pie ulon ureueng that hina  
Hana hareuga meung meusipeng patong

Patot hai dalem neutem som muka  
Neupura-pura peugah droe puntong  
Carong lonpi han rumanpi hana  
Deungon meukuta hana meutanggong

Oh watee gob ngieng sang-sang ban hamba  
Pane neujeuet ba ceula bak kaom  
Cit ka naseb lon sidumnoe kada  
Kuretueng mulia bak wareh gampong

Ulon sipai tuanku raja  
Pane na kada guda ngon lutong  
Pane jeuet jampu batee ngon kaca  
Beuneueng ngon sutra pane jeuet sambong

Meung bak siuntot keumeung boh kaca  
Yue meugeulawa nibak si puntong  
Nibak sirumpet subang meucintra  
Sugot peutaba keu ureueng kupong

Bak ureueng rumphang tajak boh baja  
Ubak sibuta tayue ba tanglong  
Miseue bak sidom yue bloh kuala  
Kon atueh kada pane meutanggong

Meunankeu miseue ulon ngon raja  
Jeuoh that bida bangsa ngon kaom  
Meunan ka jikheun cut putroe muda  
Deungon ie mata basah ija krong

Teuma jitamah bacut lom haba  
Deungon suara leumah sang lulon  
Barangsoe deungo ka tapeusuna  
Laju jeuet geumpa leungo lam jantong

Bungong rawatu simeulu cina  
Bungong ceumpaka didalam keubon  
Beuklam ka neuke dalam istana  
Meugriet neugisa awai that neutren

Neusuet ngon euncien bak jaroe hamba  
Laju neutuka tuanku ampon  
Bu-bu lam hidang habeh seureupha  
Nyang po hareuta han ek jeuet neutueng

Meunan ban narit di putroe muda  
Di Raja Jeumpa rasa teusinggong  
Meurasa malee di poteu raja  
Oh neueu muka cahya bungong rum

Meutamah sayang keu putroe muda  
Sabab that rugha cinta lam jantong  
Meukru seumangat neuseuot raja  
Meuah adekda keupada ulon

Bukon le sayang keubintang kala  
Oh malam jula cahya ban tanglong  
Bak pie ulon seutot rasia  
Macam seungsara nyang ka lon tanggong

Reudok keutungkat kilat keu sua  
Lon seutot cinta lon tinggai gampong

Lon tinggai nanggroe deungon istana  
Lon tinggai cuda seedara kandong

Reudok meugantung ujeuen rab teuka  
Angenpi raya puteng beuliung  
Dilon keu adek sangat lon cinta  
Na nyum sideupa bek le ulon tren

Nyang bunoe adoe kamoe meuseunda  
Meuah adekda salah narit lon  
Kadangpi adek keu lon tan suka  
Ulon som punca bek leumah ujung

Nibak masa nyoe geutanyoe dua  
Meukat cinta bala tatanggong  
Cit ka baroe lon mita-mita  
Meuteumeung muka cit nyoe baro phon

Meunan meuhaba di Raja Jeumpa  
Cut putroe muda seunang lam jantong  
Teukhem teuseuheh rumeh ie muka  
Cut putroe muda jikheun ngon panton

Tapula timon beutaboh baja  
Beugot tajaga tapula bakong  
Beuek meusampe teungku neubungka  
Beuek meulaba neutinggai gampong

Beuteungku tem tueng nyang ka neumita  
Bek sia-sia hai teungku ampon  
Bek le peue daleh bek le that seunda  
Bekkeu luka ate di ulon

Bak pie tan yum kureueng hareuga  
Bak pie hana wali ngon karong  
Ruman lonpi brok peukayan hana  
Pane teungku ba meudum ruman lon

Meunan di cut nyak jitimplak haba  
Di Raja Jeumpa lom balah panton  
Sayang dalam krueng na aneuk buya  
Meugisa-gisa iku ka puntong

Na misiue ureueng leupah that dahaga  
Miseue ban gisa lam uroe tutong  
Bek meugriet-meugriet ie tapeutaba  
Takot binasa rusak lam jantong

Oh lheueh tapioh meungsikutika  
Baro jeuet taba ie dalam mangkong  
Meunan hai putroe lon boh umpama  
Salah ngon beuna lon lakee ampon

Jinoe hai putroe ka sampoe pinta  
Asai bak gata cinta keu ulon  
Asai bek ubah narit nyang ka  
Gata ulon ba hai bintang tanjung

Geseh ngon sayang meulipat ganda  
Bak lon adekda tan le meuawom  
Jinoe hai adek pakri bak gata  
Narit sibeuna peutrang bak ulon

Seuot le putroe Meureudum Ratna  
Wahe kakanda peunawa jantong  
Siploh bak cutbang bak lon meulaksa  
Rila dan suka hai raja payong

Hudep beusare mate beusama  
Saboh keurauenda adat jeuet ngon lon  
Nyang ka ulon kheun hana dusta  
Narit sibeuna e cut bang tanglong

Neubri teulangke ubak ayahaha  
Jinoe beusigra hajat beulangsong  
Meunan cut putroe kheun proe bak raja  
Seuot kakanda hai adoe payong

Cit meunan patot lagee kheun gata  
Dalam agama meunan cit hukum  
Cit meunan adat buet raja-raja  
Bek jeuet geuceula bak rakyat gampong

Ret deh ngon ret noe ka seungab haba  
Hidang ka jiba le putroe tanglong

Makeuen hai teungku meung bu ngon sira  
Meupeue-peue nyang na gule on murong

Peurab hai dalem laju beusigra  
Tamakeuen dua meusapat ngon lon  
Peurab hai teungku keunoe beusigra  
Tamakeuen dua beusapat ngon lon

Meuah hai adoe putroe po bungong jeumpa  
Ulon ngon gata han jeuet meuhimpon  
Han jeuet tamakeuen meusapat dua  
Hai putroe muda salah bak hukum

Goh lom meunikah geutanyoe dua  
Syarat agama goh lom tapuphon  
Hana jipaten le putroe muda  
Makenjisaja keunan jihudom

Yoh nyan ka tunu di Raja Jeumpa  
Neusuet le sigra kreh lam sarong  
U ateueh hidang peulinteueng sigra  
Cut putroe muda yoh nyan ka muphom

Laju jisurot han le meudawa  
Deungon seureuta jilakee ampon  
Makeuen hai teungku laju bek jula  
Lon hadap saja hai raja payong

Jibuka hidang rijang le sigra  
Di Raja Jeumpa makeuen le lansong  
Oh lheueh pajoh bu di Raja Jeumpa  
Nikmat meurasa sampoe lam jantong

Jipinah hidang le putroe muda  
jiba ceurana oh lheueh nyan lansong  
Neupajoh ranub tuanku raja  
Nibak ulon na nyoe ranub leupong

Jeuh peureudee ureueng meukat ba  
Ranub ka mala layee sion-on  
Oh lheueh jikheun ban putroe muda  
Jimakeuen sigra cut putroe tanglong

Nyan bu lam hidang leubeh bak raja  
Cut putroe muda Jimakeuen langsung  
Oh lheueh jipajoh dua lhee camca  
Meung bu ka luka dua pat ruhueng[

Cut putroe meuhei yoh nyan Ti Laba  
Hidang jiyue ba keudeh u anjong  
Hidang jisurung le putroe muda  
Beudoh Ti Laba jicok le lansong

Pakon cut putroe makeuen that jula  
Pane meurasa maksuen yoh tutong  
Teuma jiseuot cut putroe muda  
Di gata cuda pane na muphom

Badan lon suum ate jiputa  
Jaroel lon luka lia ngon tutong  
Jicok le hidang uleh Ti Laba  
Jieu bu luka dua pat ruhung

Sinyak ti meulu deungon Ti Laba  
Hidang ka jiba keudeh u anjong  
Yoh nyan jitanyong bak putroe muda  
Laen that cara e putroe payong

Pakon lhok bu dua pat luka  
Han tom nyang ka-ka dilon tan muphom  
Teuma jiseuot cut putroe muda  
Pakon haincuda ceumuru keu lon

Ulon nyoe sidroe pane na dua  
Bek le that haba tuto meuujong  
Nyang lhok siblah kuah dum rata  
Nyang mula-mula lon pajoh yoh phon

Oh ban ulon mat jaroe lon lia  
Kareuna luka teusie bak ujung  
Hingga ulon cok nyang laen teuma  
Nyankeu jeuet luka dua lam dalong

Meunankeu jaweueb cut putroe muda  
Seungab Ti Laba sideh di anjong

Seungab di putroe dua ngon raja  
Dalam istana cahya bungong rom

Uroe ka suboh rab teubiet faja  
Di Raja Jeumpa yoh nyan lakee tren  
Oh ka lheueh idin bak putroe muda  
Neuheu le guda di raja payong

Gudapi katroh keunan jiteuka  
U ateueh guda neuke le lansong  
Oh ban neutimpheueng ateueh rueng guda  
Boh ru meutia ka sret meulambong

Nyan boh ru ka sret hai putroe muda  
Neucok le gata siat atra lon  
Meung insya Allah hai po meukuta  
Oh teubiet faja euntreuk ulon tren

Oh leupah neuwoe di Raja Jeumpa  
Di putroe muda teungeut le lansong  
Uroepi beungoh laju ka jula  
Di gob ka jaga bandum ka jitren

Di sinyak putroe mantong lam tika  
Teungeut that indra di putroe sabon  
Kateuna beuklam gadoh poh cakra  
Nyankeu tarasa jinoe hai untong

Jeh keu hai boh ru teutap ka lupa  
Bah teuduek haba siat lon puntong  
Jinoe lon peugah keu Raja Jeumpa  
Bak Musip Tapa hingga ka langsong

Teutap di sinan di Raja Jeumpa  
Bak Musip Tapa cahya bungong rom  
Sinyak top eumpieng keuieng meuputa  
Alee meugisa di dalam leusong

Bah teuduek haba keu Raja Jeumpa  
Meuwoe calitra keu putroe tanglong

Di kubu batee na asee dara  
Ka jilet rusa di gle Banggalang

Rusapi jiplueng lam uteuen raya  
Asee jigisa rumoh cut Hasa  
Buhu lon baleh bacut lon tuka  
Lagee biasa sang-sang ka bosan

Meuah lon lakee meuribee laksa  
Kadang meutuka paneluk ngon panyang  
Aneuk rimueng bueh ka keunong mantra  
Ka geuboh doa le teungku pawang

Kisah lon puwoe keu putroe muda  
Dalam istana ka teungeut pangsan  
Bukon le sayang malo ngon sutra  
Tan le jeureukha ka patah meukhan

Bukon le sayang putroe ngon raja  
Aeb bak donya malee bak rakan  
Kareuna boh ru teungku meukuta  
Diyub seulasa ka sret disinan

Harap geuyue cok bak putroe muda  
Hana lom jaga uroe poh lapan  
Bukon le paleh jeulatang rusa  
Oh keunong bak pha laju ka leumbam

Keudalem Meugat ulon calitra  
Surohan raja tueng upah sinan  
Sampoh-sampoh broh di yub istana  
Gaji geukira na dua kupang

Di dalem Meugat nyankeu keu raja  
Oh beungoh teuka ka troh le keunan  
Lem Meugat tamong uyub istana  
Boh rupi ka na geueu disinan

Geukalon boh rupi hu meucahya  
E ya Rabhana Lem Meugat kheun ban

Sidumnoe umu dikee ka tuha  
Coh kueu rupa boh ru nyang meunan

Barangri nanggroe barang pat raja  
Bacut hana sa ngon nyoe tan saban  
Dalem Meugat cok yoh nyan le sigra  
Ubak rakyat bha geuba le yoh nyan

Geujak peuleumah geuyue eu rupa  
Soe po hareuta boh ru hai rakan  
Ureueng meuhudom jak kalon rupa  
Di yub istana sinan ka kiyam  
Ureueng dum ka troh riyoh ngon subra  
Di putroe muda jaga le yoh nyan  
Oh ban teukeujot upie ngon mata  
Uyub istana jeungeuk le rijang

Sare geukalon boh ru ka hana  
Cut putroe muda ate meuguncang  
Sang-sang hana le ate lam dada  
Buco rasia bak ureueng dalam

Lompi geutupeue uleh ayahanda  
Cut putroe muda ate sang karam  
Cut putroe kalon siseun lingka  
Putroe pareksa ureueng meukawan

Bak jaroe Meugat boh rupi ka na  
Cut putroe muda lakee le rijang  
Hai Dalem Meugat keunoe nyanpi na  
Nyan boh ru hamba ba keunoe pulang

Cit beuklam ka sret uyub istana  
Keunoe nyan neuba laju beurijang  
Lem Meugat seuot meudhot suara  
Bek le that haba hai putroe suang

Akaiteu curek burekteu raya  
Pane dum raja keunoe troh datang  
Pane roe agam beuklam jiteuka  
Bak wayang seunda boh ru sret rijang

Hana le jithee sampoe jigisa  
Nyan jinoepi ka talakee pulang  
Pakon cut putroe sulet lagee na  
Deungon kee tuha peue peugah rantam

Meunan Lem Meugat buka suara  
Cut putroe muda seuot le rijang  
Pane na ureueng keunoe troh teuka  
Nyan sa jijaga uroel ngon malam

Keubiet nyang salah tan lon keurija  
Boh ru nyan sigra keunoe tapulang  
Lem Meugat seuot laju lom sigra  
Bek le that haba dum macam-macam

Asai meung ka troh ka peunoh hawa  
Keumalee raja hana ka waham  
Nyan sa kamoe dum jaga seulingka  
Mukah jiteuka keunoe u dalam

Hana katupeue keuaeb nama  
Peujeuheut raja duli sulotan  
Meunyo meukawen kon han ka suka  
Dikah ka rila jieh simalam

Patot keubiet roe ek katem saba  
Hana kusangka pubuet curang  
Kaeu kupeugah jinoe bak raja  
Mangat kaaja bek le lagee nyan

Putroe ka jimoe teubiet ie mata  
Hai Dalem nieba keunoe neupulang  
Sayang cut putroe jimoe tahat rugha  
Jitarek ija jireuet-reuet pinggang

Di Dalem Meugat ka troh bak raja  
Geukek le sigra u bale kumbang  
Sinan meusapat meuntroe panglima  
Wazi beuntara ngon uleebalang

Yoh nyan Lem Meugat geuseumah raja

Boh rupi geuba geumat bak tangan  
Beu ampon meuah e poteu raja  
Saboh rasia ulon sampie kan

Nyoe pat na dali bukeuti nyata  
Cut putroe muda sang laen macam  
Boh ru lon teumeung diyub istana  
Saleh pat raja keunan troh datang

Meunan Lem Meugat buka suara  
Di poteu raja muka ka masam  
Malee neuthat-that di nab bintara  
Deungon panglima dum uleebalang

Hana soe jeuet ngieng u ateueh raja  
Jipeukek bisa na miseue biram  
Turon le titah nibak meukuta  
Neuyue pareksa bak uleebalang

Ho ka dum meuntroe deungon bentara  
Deungon panglima dumna pahlawan  
Meunalee ulon ka deuh u lua  
Tulong seedara tapeukek pinggang

Beudoh taseutot nyang po hareuta  
Beudoh jak mita lua ngor dalam  
Watee meuteumeung keunoe peugisa  
Mangat tasula keudeh cong tapang

Ate lon saket malee lon rasa  
Beudoh jak mita jinoe beurijang  
Meunankeu titah nibak meukuta  
Deungon ie muka ka mirah padam

Beudoh meuntroe beurangkat sigra  
Deungon bintara na peuet limong nam  
Seureuta boh ru sajan ka geuba  
Lem Meugatpi na geukot sajan

Di teungku meuntroe deungon bintara  
Geujak le sigra nyan taloe jalan  
Soe-soe meuteumeung laju pareksa  
Wahe seedara nyoe soe po barang

Meunyo ka teuntee nyang po hareuta  
Nanggroe di raja keunan neupulang  
Lom neupeukawen deungon aneukda  
Meureudom Ratna putroe analan

Jiseuot le dum peugah sibeuna  
Dikamoe hana barang nyang meunan  
Habeh jeub jurong duson ngon banda  
Meuntroe jak mita ureueng po barang

Soe-soe meuteumeung bandum kheun hana  
Meuntroe peudhana susah pikeran  
Nakeu sijameueng oh lheueh nyan teuma  
Meugat beulaga meuteumeung rijang

Lem Meugat tanyong bak meuntroe sigra  
Nakeu meusu ngon po barang nyan  
Po meuntroe seuot geukheun le hana  
Lem meukuta teuma jikheun lom yoh nyan

Meunyao lagee nyan ureueng tamita  
Siumu donya hana meubayang  
Bah le ulon jak wahe bentara  
Meunyo buet gata pane na reumbang

Tuto Lem Meugat sangat that gasa  
Beungeh peurdana muka ka masam  
Ka meugrak jaroe geukeumeung tampa  
Jiplueng le sigra Meugat suang

Lem Meugat pindoe sidroe jibungka  
Geuseutot sigra taloe bineh blang  
Meung goh meuteumeung hana geugisa  
Meuntroe peudana laju beujalan

Ate geulisah susah lageena  
Meunyo goh lom na ureueng po barang  
Teutap di meuntroe teungoh geubungka  
Lon puwoe haba laen karangan

Seureuta buhu laju lon tuka  
Meuah seedara adek ngon abang

Meung na peunajoh meung na roh sak  
Mangat calitra meunyo got ragam  
Bukon le meugah pandrah ngon bayu  
Masa jiampu Jeupang Dai Tua  
Teuduek haba nyoe sinoe sigeutu  
Ngon Ammabakdu muwoe calitra

Keu Raja Jeumpa lon peugah laju  
Sideh hai teungku bak Musif Tapa  
Uroe ka seupot jilob cahya hu  
Neumarit laju ngon Musif Tapa

Idin keu hamba e po ma teungku  
Lon keumeung lalu bak putroe muda  
Beuklam na janji ngon putroe meulu  
Teulangke jiyue bak po du raja

Jiyue lakee droe jinoe beulaju  
Mangat bek karu singoh ngon lusa  
Oh ka lheueh idin neutren le laju  
Po bungong meulu neukeong guda

Ate lam dada meurasa rindu  
Neujak le laju u nanggroe Indra  
Guda ret bumoe jinoe jilalu  
Baroekon teungku jipo lam hawa

Riyeuk di laot jipot meu'u  
Aneuk leukek kutru didalam ceuntra  
Salen mubala deelat tuanku  
Nibak ri laku alamat ka na

Siblah ret barat cahya uroe hu  
Siblah ret timu angen ka teuka  
Sama teungoh blang na saboh pusu  
Naleuengpi lhu yub asan raya

Oh ban troh keunan deelat tuanku  
Neupiyoh laju preh teuka seunja  
Guda jimeurot naleueng get lhu  
Nibak bulee grue jimeusu geunta

Taloe peulana intan cahya hu  
Ka cukup dumpeue sigala rupa  
Raja yub asan sinan teukukui  
Ate that rindu keu putroe muda

Sayang boh pisang ka leukang bak mu  
Sayang putik u ka tupe seuba  
Sayang Lem Meugat ate ka tunu  
Sabab leupah su ngon meuntroe dumna

Ka keunong tampa meuputa takue  
Jinoe peue laku ulon keurija  
Lem Meugat geujak geupeusak napsu  
Yoh nyan troh laju dalam blang raya

Deungan kheundak po sidroe Tuhanku  
Yoh nyan deuh geueu sidroe peumuda  
Rupa that hibat cahya bintang hu  
Siulah laku sang aneuk raja

Didalam ate teupike laju  
Ureueng po boh ru nyoekeu pat ka na  
Meunyokeu gob nyan nyang beuklam lalu  
Ubak cut meulu dalam istana

Meung kon salah buet gob nyan peulaku  
Pubuet lam seungoe bak bineh paya  
Meunan teuringat Lem Meugat badu  
Leumah ceumuru Meugat cilaka

Lem Meugat sidroe ate ka kuyu  
Han geujak lalu jak peugah haba  
Yoh nyan u likot geuplueng meu'u  
Ngon meuntroe laju meureumpok teuma

Lem Meugat narit keubiet that lucu  
Geukheun le laju meunoe meuhaba  
Toh ka meuteumeung nyang ka tajak eu  
Bek nyang na meusu nyang leupah raya

Meung ba taseutot lam lungkiek dapu  
Beutuha umu meuteumeung hana

Tajak deungon kee mangat kupangeue  
Mangat deuh taeu lheueh kupeuraba

Ban meuntroe deungo meunan ban laku  
Ka geujak laju hana le haba  
Geuba ngon rakyat leungkap dum-dum peue  
Hingga troh laju bineh blang raya

Bak Raja Jeumpa yoh nyan deuh jieu  
Mata seumilu meuntroe peudana  
Hana soe kalon meunan ban laku  
Sang bintang timu meucahya-cahya

Geupeurab yoh nyan keunan le laju  
Ubak tuanku nyan Raja Jeumpa  
Di Raja Jeumpa pura han teupeue  
Ho laen laju geupaleng muka

Di teungku meuntroe bagoe sang kuyu  
Yoh nyan le laju tunduk keupala  
Rakyat sinaroe meunan cit laku  
Jturot laju meuntroe panglima

Geubri ngon saleuem keu bintang timu  
Meujeulih ngon su get that mulia  
Muda samplakoe neuseuot laju  
Yoh nyan sigeutu meuhadap muka

Di teungku meuntroe geujok le boh ru  
Deelat tuanku sambot le sigra  
Ban raja kalon u ateueh boh ru  
Yoh nyan le laju pucat ngon muka

Didalam ate pike ka karu  
Pakonkeu boh ru keunan ke jiba  
Ciut nyo atra droe po bintang timu  
Han jeuet kheun sapeue le Raja Jeumpa

Lam dada seungkak han le meugrak su  
Rasa ka kuyu di poteu raja  
Yoh nyan dimeuntroepi ka jitupeue  
Nyankeu po boh ru nyang len hana

Sabab jikalon meunan ban laku  
Kareuna jieu ka pucat muka  
Di teungku meuntroepi iem droe laju  
Sabab jitupeue nyan po hareuta

Di Raja Jeumpa ate ka tunu  
Neukheun le laju meunoe ban rupa  
Pakon hai meuntroe meunan ban laku  
Atra lon tacue nyoe ho le gata

Patot nyoe gata bangsa ceumeucue  
Lon kalon laku rameteu raya  
Peureute rampok ban bangsa badu  
Ulon deungo su lagee beulaga

Meunankeu neukheun deelat tuanku  
Meuntroepi laju hiram ie muka  
Ka meunyum malee lagee meunipu  
Isyarat laju ubak rakyat bha

Dumna pahlawan jitajo laju  
Deelat tuanku yoh nyan jimeung wa  
Ban raja kalon meunan ban laku  
Neusuet le laju peudeueng nyang raya

Peudeueng lam sarong neusuet le laju  
Yoh nyan neuhampu dumna rakyat bha  
Jitajo le dum keunan meuru-ru  
Barat ngon timu ban siseun lingka

Dumna pahlawan garang ngon seu'u  
'Titaji laju bak Raja Jeumpa  
Di Raja Juempa bacut tan kuyu  
Meutak le laju ban siseun lingka

Nyang beukah ulee ladom patah pha  
Han jan jihei du ka mate pana  
Raja neulumpat barat ngon timu  
Han jan deuh jieu mupang bak muka

Seureuta neukheun meunoe ban laku  
Gata ulon eu sang pungo gila

Hana tasayang gata ka umu  
Peuturot napsu sang teuga raya

Han tajak gisa tamita bantu  
Yoh goh kuhamputeu ban sineuna  
Sira neukheun nyan neucang le laju  
Barat ngon timu peudeueng neupuba

Rab na siteungoh nyang ka beh umu  
Rakyat ka seungoe mate meukeuba  
Ban meuntroe kalon meunan ban laku  
Jikheun le laju ubak bintara

Tabalek lagee jinoe le laju  
Bah le tajak eu pahlawan kha-kha  
Nyang keubai-keubai jipileh laju  
Han lut tahampu taphet lam mata

Jimat taloe jrak bak jaroe laju  
Yoh nyan jimaju bak Raja Jeumpa  
Deungonjisurak sigra jimaju  
Jiek meuru-ru ban siseun lingka

Meuhadap le ngon deelat tuanku  
Neutak le laju neuproh bak muka  
Ri-ri nyang teuka sigra neuhampu  
Sinan ka teudu ka hilang nyawa

Nyang mantong tinggai jikarat laju  
Jipeusak umu keu Raja Jeumpa  
Seureuta meuntroe geupeutoe laju  
Ngon ate seuu surak meutaga

Jireng uleh dumna seudadu  
Bak jaroe taeu dum jrak meulila  
Ngon coma beusoe dum sulu-sulu  
Ladom seudadu peudeueng ngon khanja

Deumpek ngon surak lagak dum taeu  
Jipeutoe laju bak Raja Jeumpa  
Diteungku meuntroepi ka geumeusu  
Geukheun le laju meunoe ban haba

Nyoe ho lom kaplueng cuba kheun laju  
Kupeulen umu jinoe beusigra  
Teugoe geuiem droe bunoe kon kaeu  
Keumeung eu laku teunaga gata

Keu kamoe takheun ureueng ceumeucue  
Ka kamoe bahue hareuta gata  
Takheun pancuri kamoe ban badu  
Kamoe peunipu takheun le gata

Nyang jinoe gata kamoe koh takue  
Meunan ka geuyue bunoé le raja  
Ate ngon darah ku puwoe laju  
Raya that napsu di raja muda

Nyan putroe muda gata peukaru  
Ek tinggai boh ru diyub istana  
Aneuk dara gop gata peunapsu  
Tapeukeuji du peuaeb nama

Nibak masa nyoe baro tatupeue  
Gata nyan ku hue keudeh bak raja  
Sira jikheun nyan jiek le laju  
Barat ngon timu ban siseun lingka

Beuthat ka jiek karat jimaju  
Hana cit kuyu di Raja Jeumpa  
Jilambong le jrat barat ngon timu  
Meusintue-sintue atueuh meukuta

Ri-ri meulayang neucang le laju  
Taeu meutabu ka sret u donya  
Maken jirapat karat meuu-u  
Po bintang timu sang meugriet raya

U dalam kawan neulob le laju  
Tadeungo meusu peudueng meugeunta  
Nyang keubai-keubai hana luet sapeue  
Watee neuhampu meuk dum keulua

Muda samlakoe meurasa tunu  
Sabab seudadu keubai lagee na

Deungon kheundak po sidroe Tuhanku  
Gudapi laju keunan jiteuka

Oh ban jikalon han le tuanku  
Hana deuh jieu dalam kawan bha  
Musoh dum palet po bungong meulu  
Teungoh meuhue-hue meuhila-hila

Yoh nyan le guda laju jibantu  
Jiplueng meuu-u keunan le sigra  
Jisipak rakyat barat ngon timu  
Ladom patah thu ladom patah pha

Guda jilumpat barat ngon timu  
Hana jan taeu ban kilat faja  
Nyang keubai bunoe jinoe ka kuyu  
Sabab jihampu le aneuk guda

Yoh nyan u likot jisurot laju  
Jiplueng meuu-u peusiblah nyawa  
Nyang teubiet utak sinan ka teudu  
Nyang mantong umu jiplueng meubura

Di Raja Jeumpa yoh nyanpi maju  
Barat ngon timu neulet le sigra  
U ateueh guda ka neuke laju  
Sabab ka seungoe dalam blang raya

Di teungku meuntroepi geuwoe laju  
Geuplueng meuu-u keudeh lam kuta  
Deungon pahlawan nyang mantong umu  
Jiplueng cot iku jiwoe bak raja

Yoh nyan dalam blang hana le karu  
Po bintang timipi ka neugisa  
Bak Musif Tapa ka neuwoe laju  
Oh troh u leupu uroe ka seunja

Neuke u rumoh teuma le laju  
Po ma bak dapu peurab pareksa  
Pakon tagisa hai bintang timu  
Peue na hai teungku meuteumeung bala

Di Raja Jeumpa neupeugah laju  
Jipulang boh ru le meuntroe raja  
Hingga ka jeuet prang meuhadu-hadu  
Kheundak Tuhanku leupah bak mara

Pahlawan teuga dum seu-u seu-u  
Ka habeh umu dalam blang raya  
Tinggai padum droe ka jiwoe laju  
Nyang mantong umu jiplueng lam kuta

Oh ka seungab prang hana le karu  
Dilonpi laju keunoe lon gisa  
Ban po ma deungo meunan ban laku  
Takalon laju ile ie mata

Alah hai aneuk po bintang timu  
Adat habeh umu ka tupeue hana  
Di Musif Tapa neubeudoh laju  
Naujak beuot bu neubri keu raja

Teutap keu raja sinan lam leupu  
Dua ngon ibu nyan Musif Tapa  
Haba lon puwoe jinoe sigeutu  
Keumeuntroe lalu nyang plueng lam kuta

Deungon pahlawan nyang garang seuu  
Hingga troh laju keunoe bak raja  
Jiseumah leugat deelat tuanku  
Yoh nyan jimeusu buka suara

Nyang kamoe seutot deelat tuanku  
Ureueng po boh ru meuteumeung jih ka  
Rupa jih hibat oh watee taeu  
Siulah laku sang aneuk raja

Sajan na guda cahya taeu hu  
Intan meululu deungon meutia  
Oh ban jikalon bak kamoe boh ru  
Jikheun kamoe cue boh ru meutia

Jicok le pulang rijang le laju

Han jan kheun sapeue kamoe jitampa  
Oah ban keumeung drob keunoe keumeung hue  
Jibeut le laju peudeueng ngon sigra

Rakyat dum jicang meutimpahn laju  
Le habeh umu dalam blang raya  
Utoh that meucang kareueng bak taeu  
Ateteu kuyu singkat bicara

Oh ban tatiek jrat leugat jihampu  
Barat ngon timu jilila-lila  
Nyankeu lon peugah deelat tuanku  
Han ek peulaku ban aneuk raja

Ban raja deungo meunan jibri su  
Jibeudoh le hu cahya ie muka  
Seureuta narit neukheun le laju  
Cukop that laku tapuwoe haba

Nyan sa pahlawan badan sang bak u  
Ek tacok boh ru keu po hareuta  
Padum na rakyat ka habeh umu  
Keubit raya su geusuen lageena

Rugoe dum pangkat kulhat be boh u  
Sapeue buet kuyue han jeuet keurija  
Meunankeu neukheun deelat tuanku  
Ate dum kuyu pahlawan dumna

Wazi ngon meuntroe han jeuet le meusu  
Bandum teukukue mublek-blek mata  
Raja neumarit yoh nyan le laju  
Kajak cok boh ru keunoe lom ka ba

Ku leukang pangkat kulet lam alue  
Hana keupeue dumna bintara  
Rugoe ku gaji deungon kubri bu  
Ate ku tunu rugoe neugara

Meunan di raja yoh nyan neumeusu  
Maken brat kuyu dumna bintara  
Sabab jitakot geupeuret paku  
Pakri bar laku jinoe jidaya

Di meuntroe susah di raja tunu  
Teutap sigeutu meuntroe ngon raja  
Teutap lam pike pakri ban laku  
Teutap lam kuyu dumna panglima

Uroe ka leuho tambo jimeusu  
Ngon Ammabakdu laen calitra  
Leumak ban dadeh mameh ban madu  
Jinoe hai teungku nyang leubeh gura

Seureuta kisah lon ubah laju  
Seureuta buhu sigo bandua  
Mangat meusambot eungkot deungon bu  
Mangat meujampu putroe ngon raja

Mangat roh nalalm ragam deungon su  
Mangat get seu-u ureueng nyang baca  
Ureueng nyang deungo sangat bek karu  
Mangat geutupeue peunutoh haba

Bukon le sayang takalon boh drien  
Aneuk meukawen didalam pangsa  
Deungo lon kheun proe sidroe meuseukin  
Hudep tan soe ngieng didalam donya

Hudep seungsara hamba nyang mukmin  
Ate that yakin dalam takua  
Di nanggroe Indra sinan beurmukim  
Rabbul alamin nyang po karonya

Zejahkeupi na sangat salihin  
Uriueng meuseukin dua ngon nisa  
Deungon kheundak sidroe nyang Halim  
Tuhan nyang Rahim neubri karonya  
Hame peurumoh ureueng meuseukin  
Ate that yakin geupreh budak na  
Geunap ngon bulueun yoh nyan beusalen  
Po bungong husen lahe u donya

Aneukpi agam bri Tuhan Halim  
Teutap lam rahim kandong ibunda  
Hingga nyan lahe po bungong kareng  
Oh lheueh beusalen teubiet suara

Deungon kheundak po sidroe nyang Karim  
Aneuk miseukin geukheun troh mata  
Ileumee nujum bandum jeuet yakin  
Hana meupaleng peue-peue nyang kata

Jeuoh deungon toe bandum jeuet jingieng  
Aneuk miseukin tuah lagee na  
Meunan kheundak po Rabbul Alamin  
Keu si meuseukin Tuhan karonya

Ureueng nanggroe le tahe dum jingieng  
Taeu dum teuhien jikalon rupa  
Carong meututo utoh ngon alem  
Han tom na laen meunan nyang ka-ka

Bak ateueng neuheun ureueng kawe bieng  
Sinyak tob eumpieng pade rambot sa  
Raja yue jak tueng po bungong karieng  
Keumeung ci yue ngieng keuhai buet nyang ka

Hingga troh jiba aneuk meuseukin  
Po bungong karieng dalam lingkue ma  
Oh troh bak raja po bungong karieng  
Jaroe ubak mieng beuot bandua

Horeumat raja seureuta takjim  
Aneuk meuseukin utoh lageena  
Di raja muda tahe bak neungieng  
Babah ka teuhien seungkak lam dada

Aneuk ban lahe didalam rahim  
Ek na jeuet mungkin buka bicara  
Oh puleh raja hireuen bak neungieng  
Bak ma meuseukin neukheun le nyata

Tapiduek keunoe sibungong langien  
Dilon that yakin meung peugah haba  
Jiploh le lingkue laju le jitren  
Jidong geunireng tuanku raja

Raja neutanyong keubuet nyang lazim  
Pakri ban mungken nyang ek bicara

Jaroe le jigrak budak meuseukin  
Lagi jireng deungon suara

Meuah hai raja seureuta takzim  
Ulon ka troh ngieng keubuet nyang ka-ka  
Meunyo neupateh bah le lon bareng  
Meunyo cit neutem bah lon peuhaba

Raja neuseuot rumeh ngon teukhem  
Bandum lon takzim ban titah gata  
Yoh nyan suot le budak mualem  
Boh ru meuleng-leng po Raja Jeumpa

Aneuk Abdullah tuah 'Alaihim  
Han ek jitunggeng barangri raja  
Hana ek soe poh nyawong tapeulen  
Han ek keureuleng han ek tadya

Beuthat beutaba tumbak ngon leumbeng  
Meung ube leumbeng han luet anggeeta  
Asoe that keubai badanpi that reng  
Umpama gaseng watee tangaza

Geutanyoe geucang meutunggeng-tunggeng  
Han jan tapaleng keunong bak muka  
Rakyat binasa meulaksa laksin  
Gob nyan han mungken talo tangaza

Meunyo tadya ngon cara laen  
Teuntee sang geutem pateh meukuta  
Tatueng ngon mangat bek muka ceukan  
Tabei seunalen bajee ngon ija

Tabri meuh pirak ganceng ngon peundeng  
Beuget tatakzim tapeumulia  
Teuntee geuseutot keunoe geuireng  
Teuntee roh geutem tamong lam kuta

Beuthat troh keunoe nyawong tapeulen  
Boh tapeukawen ngon putroe muda  
Meung ka troh keunoe peue-peue nyang mungken  
Asai ka geutem dilee tadya

Meung kon tamita cara geunireng  
Meunyo ngon laen han ek tadya  
Meunan meukuta nyang ka lon bareng  
Ka lheueh ulon ceng rugoe ngon laba

Nyan ka ulon kheun keueung ngon masen  
Neutem-han neutem hukum meukuta  
Meunan meututo kundo on lapeng  
Raja ka teukhem reumbang lageena

Laju jitamong u dalam dihen  
Hana neupaleng ka beutoi haba  
Putoh ngon pakat rapat beurundeng  
Ngon ureueng laen meuntroe panglima

Raja neucock meuh deungon seunalen  
Paki meuseukin laju jigisa  
Yoh nyan di raja hingga lom laen  
Neujok seunalen meuh ngon suasa

Keubungong jaroe samlakoe canden  
Seureuta laen teubee u muda  
Neuheu le sidroe meuntroe nyang canden  
Nyang bijak alem bak peugah haba

Ka geuyue jak tueng po bungong husen  
Geubri ngon ireng pahlawan dumna  
Hingga beurangkat meuireng-ireng  
Jroh that meujandreng geuantri banja

Deungon pahlawan leungat le geutren  
Tumbak ngon leumbeng ladom na jiba  
Na padum na treb lam musafiran  
Ka troh le geutren bak Musif Tapa

Tamong pinto rot meuireng-ireng  
Na miseue tabeng takalon rupa  
Sinan lon rumoh geuduek menjandreng  
Ladom di disampeng jijaga-jaga

Di Raja Jeumpa po bungong lapeng  
Yoh nyan le neungieng ureueng dum tauka  
Ka hijo-hijo on naleueng lakoe  
Uram meuduroe bisa lagee na

Buhu lon balek laen lon gantoe  
Deungo lon kheun proe kau Musif Tapa  
Oh neungieng ulon ureueng dum ka dhoe  
Dada sang seungkoe badan meungeumpa

Bak Raja Jeumpa neukheun le meunoe  
Wahe samlakoe gata mubala  
Gata jitipee nibak uroe nyoe  
Pakri ban jinoe wahe aneukda

Di Raja Jeumpa neukheun le meunoe  
Cit ka kheundak po ateueh hamba  
Hudep ngon mate laba ngon rugoe  
Bak Tuhan sidroe nyang po karonya

Meunankeu neukheun muda samlakoe  
Bacut hana yo dumnan ka bala  
Teuma seout lom uleh ma po droe  
Bek tajak saho wahe aneukda

Bek sagai tatreng keudeh u bumoe  
Roh jiboh taloe jiba bak raja  
Disinoe teiduek hai bungong geutoe  
Supaya sigo mate ngon po ma

Di Musif Tapa meunan hareutoe  
Seuot samlakoe meunoe lom haba  
Keu peue hai poma ulon jak som droe  
Sabab ulon nyoe kon aneuk dara

Kon dara baro linto ban jiwoe  
Inong jak som droe malee ngieng mata

Teungoh meututo muda samlakoe  
Ureueng di bumoe meuhei le sigra

Hingga geubuka haba le meuntroe  
Geubeuot jaroe atueh jeumala  
Putik boh timon bungong keureutoe  
Lanja cot uroe boh panjoe tuha

E Raja Jeumpa muda samlakoe  
Tatren aneuk droe keunoe beusigra  
Tatren hai aneuk tamumat jaroe  
Salah that baroe dilon ngon gata

Keubuet ka leupah bek le tapakoe  
Nibak uroe nyoe tameuah deesya  
Hana lon turi gata aneuk droe  
Lon sarap soe-soe keunoe roh teuka

Oh ban lon tupeue muda samlakoe  
Teulah lon dudoe rugoe lon ngaza  
Meunankeu narit bak teungku meuntroe  
Muda samlakoe beudoh le sigra

Neungui peukayan yoh nyan u asoe  
Dumna sinaroe meunurut raja  
Oh ka lheueh hase bandum seuleusoe  
Muda samlakoe beudoh le sigra

Neutren le uyub muda samlakoe  
Jak mumat jaroe ngon meuntroe raja  
Geusujud ret deh geusujud ret noe  
Lagee reusam droe ban adat raja

Geiduek geupiyoh leusoh peungaroer  
Bungkoh meuasoe yoh nyan geubuka  
Pajoh le ranub raja ngon meuntroe  
Yoh nyan geumuproe seun sibanja

Hai Raja Jeumpa muda samlakoe  
Nyoe bungong jaroe geubri le raja  
Yoh nyan geujok meuh na dua keutoe  
Le teungku meuntroe jampu suasa

Di Raja Jeumpa teungoh that laloe  
Di teungku meuntroe isyarat sigra  
Dumna pahlawan nyang usoe-usoe  
Ngon rante beusoe bak jaroe rata

Yoh nyan seun bacut laju jupeutoe  
Muda samlakoe laju ka jiwa  
Jiboh le rante gaki ngon jaroe  
Po bungong geutoe hana le daya

Di Raja Jeumpa ka na lam taloe  
Ngon rante beusoe jimat dum rata  
Gaduh kuasa muda samlakoe  
Kheundak nibak po sidumnan bala

Hajat jih ka troh napsu ka sampoe  
Di teungku meuntroe neukhem meubura  
Bukon le sayang bintang cot uroe  
Cahya dum soe broe reudok dum lingka

Bukan le sayang muda samlakoe  
Ka keunong taloe gob tipee daya  
Bukon le paleh tok-tok beuragoe  
Ka jigeureudeoe kayee dum nyang na

Bukon that paleh Lem Meugat sidroe  
Han ek jjiem droe saboh rasia  
Jitem peukanjai raja ngon putroe  
Keudeh ngon keunoe jihue-hue haba

Peumalee raja dikeue-keue meuntroe  
Bit paleh tuloe Meugat cilaka  
Dijih jipike hase beuna droe  
Akibat dudoe hana jikira

Hana jikira laba ngon rugoe  
Paleh ngon paloe hana jibida  
Teusia tuha ka teulhoh gigoe  
Bak pubrok nanggroe carong lageena

Meunyo na haba sianeuk jaroe

Laju jimupru jinoe sideupa  
Kayem teujadi meunan lam naggroe  
Nyang tuha pindoe kayem me haba

Ulon peuingat aduen ngon adoe  
Bek le lagee nyoe geutanyoe dumna  
Akan aeb gob get that tapiro  
Keaeb droe hana takira

Get tapiro meunyo gob meulho  
Tatem peukasyo miribee daya  
Nyoe pat umpama raja ngon putroe  
Lem Meugat pindoe nyang me-me haba

Cuba tapike wahe e sadoe  
Padumna paloe gob dum binasa  
Nyankeu seedara tacok keuconto  
Dalam haba nyoe rugoe ngon laba

Astagfirullah lon angkat jaroe  
Karoh meurampoe sipatah haba  
Jinoe ubak sot kisau lon puwoe  
Muda samlakoe lam taloe raya

Di Raja Jeumpa neukheun le meunoe  
Hai teungku meuntroe ka lheueh keugata  
Hase tatipee ulon nyoe sidroe  
Kheundak nibak po Tuhan nyang esa

Jinoe bak raja ulon tapuwoe  
Lon mumat jaroe lon meuah deesya  
Adat tapoh lon dileuen meuligoe  
Dikeue cut putroe Meureudum Ratna

Meunankeu neukheun muda samlakoe  
Jimat bak taloe jihue le sigra  
Ladom dilikot jitrom teupipoe  
Nyang ladom taloe Jimat bak punca

Keudeh bak raja laju jipuwoe  
Hingga ka sampoe bak jalan raya  
Di musif Tapa raya that neumoe

Akan samlakoe sayang neuraya

Pakri kupeugot meungkee nyoe binoe  
Wahe aneuk droe soekeu tueng bila  
Get that meusampe tacre di naggroe  
Tayue jak poh droe keunoe bak raja

Bak pihak galak keu sinyak putroe  
Hajat han sampoe tanyoe binasa  
Jinoe ka seunang di sinyak putroe  
Ka seureutoh droe ka mate raja

Ka lheueh ulon tham masa saboh roe  
Wahe samlokoe han tapeucaya  
Di gata takheuen ka hak disinoe  
Di ulon rangoe ate lam dada

Bukon le sayang musang eh uroe  
Ka keunong gandoe ka sret lan paya  
Bukon le sayang muda samlakoe  
Ka keunong taloe rante meulila

Bukon le sayang asan meuranjo  
Oh tarek uroe ka layee rata  
Kareuna boh ru ek karu buet nyoe  
Nyankeu jeuet kasyo teuhan rasia

Bukon le sayang keu kayee jatoe  
Ka jigo gojoe keu papeuen bahtra  
Wali ngon darong teu tan disinoe  
Gata lam taloe soe jak tueng bila

Keu Musif Tapa haba seb on noe  
Dawok bak geumoe geusro ie mata  
Keu Raja Jeumpa jinoe tapuwoe  
Didalam taloe teungoh jihila

Jipoh ngon jitrom meugum bak bumoe  
Raja neumanoe deungan ie mata  
Beukah ngon kulet keumong ngon asoe  
Teulhoh ngon gigoe darah keulua

Hingga ka rab le bineh meuligoe  
Jeuet takheun katoe ngon pinto kuta  
Yoh nyan jikalon le sinyak putroe  
Muda samlakoe teungoh meuntroe dra

Rante meugari gaki ngon jaroe  
Raja Jeumpa moe neuro ie mata  
Oh ban jikalon meunan le putroe  
Yoh nyan tumbok droe cut putroe muda

Jidong bak tingkap jeungeuk u bumoe  
Cut putroe rangoe ate lam dada  
Ie mata ile miseue jimanoe  
Jikheun le meunoe sipatah haba

Tajak u pasi tapot beuramoe  
Puwoe keu kamoe buleuen puasa  
Keubiet that tuah tuboh ulon nyoe  
Ban rab na lakoe keunong enanya

Bukon le sayang ija lam peutoe  
Ka tuha keudroe soe ngui jih hana  
Bukon le sayang tuboh lon sidroe  
Siumu nanggroe dalam deurita

Adat na teuka raja nyan keunoe  
Ka keunong taloe jipoh ngon jidra  
Han jeuet lon ingat wahe samlakoe  
Adat jeuet sigo mateteu dua

Neutinggai gampong neucré ngon nanggroe  
Jak seutot kamoe leumah rasia  
Hana lom meung troh neudong siuroe  
Umu ka sampoe keunong enanya

Ek han meusampe cita keu kamoe  
Cit ka na dudoe nyang ba peusuna  
Meunyo ka mate hai payong nanggroe  
Beu hareuem lakoe han le lon hawa

Bah puteh ok teulhoh ngon gigoe  
Han le lon gantoe lagi lon mita

Meung kon ngon raja nyang ka lon lumpoe  
Laen barangsoa hana lon hawa

Sabab ka sumpah dilee saboh roe  
Dua geutanyoe taikat cinta  
Jinoe di raja neulob lam taloe  
Dilon disinoe bah lon puasa

Bukon le paleh sitameh sagoe  
Hana got uroe nyang phon geucok lha  
Keu peue adat na tilam meusujoe  
Ulon eh sidroe lakoe lon hana

Raja ka jipoh deungon barangho  
Keubuet nyang kuto tan lon keureuja  
Adat ka mate wahe raja droe  
Oh uroe dudoe tameungieng mata

Meunyo seumeulheueh lon eu uroe nyoe  
Didalam naggroe hai po meukuta  
Meunankeu syae di tuan putroe  
Ka sret meataloe deungon ie mata

Bah teuduek haba keu putroe nyang moe  
Lon peugah jinoe keu Raja Jeumpa  
Hana tom reunggang hantam jiangkhoe  
Jipoh jikiloe jihue jihila

Di phon beungoh kon sampoe cot uroe  
Leumoh that asoe ka Raja Jeumpa  
Yoh nyan mupakat sabe keudroe-droe  
Jkheun bak meuntroe deungon panglima

Bah takoh takue jih nyan disinoe  
Kareuna uroepi ka that jula  
Darah ngon ate mantong tapuwoe  
Akan teungku po nyan raja muda

Mangat geupajoh geujeb doungon troe  
Nyan dua bagoe nyang napsu raja  
Putoh ngon pakat bandum sinaroe  
Yoh nyan algojo keunan jiteuka

Peudeueng ka jimat laju bak jaroe  
Dikeue samlakoe nyan Raja Jeumpa  
Marit le raja muda samlakoe  
Neukheun bak meuntroe deungon panglima

Meunyo kheundak poh ulon nyoe sidroe  
Taidin jinoe lon peulheueh naza  
Lon peulheueh hajat ngon Tuhan sidroe  
Ka leuho uroe ka troh kutika

Tapeulheueh ulon siat lam taloe  
Wahe rakan droe takubu pinta  
Meunan ka neukheun muda samlakoe  
Seuot le sidroe ureueng nyang tuha

Geupeugah laju ubak rakan droe  
Ka geuharutoe rugoe ngon laba  
Bah le tapeutroh ban hajat jih nyoe  
Bek teulah dudoe tanyoe meudeesya

Meung taenanya ureueng sidroe-droe  
Hajat peusampoe peue-peue nyang pinta  
Meuhan tapeutroh raya that paloe  
Tanyoe sinaroe dudoe binasa

Nyang doa ureueng taenanya nyoe  
Rijang that sampoe peue-peue jipinta  
Rijang neukabui le Tuhan sidroe  
Doa barangsoe nyang taenanya

Meunan meuhaba ureueng tuha nyoe  
Jipateh jinoe le meuntroe dum na  
Jipeulheueh rante gaki ngon jaroe  
Muda samlakoe jijaga lingka

Tueng ie seumbahyang teuma le dudoe  
Lheueh nyan neupeutoe yub iboh raya  
Neuek cong iboh leusoh peungaroe  
Ka luho uroe neubang le sigra

Di yub jijaga rata sinaroe  
Jimat ngon cakcoe pahlawan dum na

Di Raja Jeumpa muda samlakoe  
Neuseurah le droe bak po nyang Esa

Seumbahyang leuhopi ka seuleusoe  
Neuleueng le jaroe raja meudoa  
Di Musif Tapa meunan cit bagoe  
Geunap-nap uroe sabe meudoa

Neulakee beulheueh muda samlakoe  
Dalam banya nyoe beulheueh bak mara  
Meugrak teukeudi bri Tuhan sidroe  
Teukeujot jinoe nyan aneuk guda

Yoh masa neubang muda samlakoe  
Meuto-to asoe di aneuk guda  
Teuringat guda hoka ureueng po  
Jibeudoh dudoe laju jimita

Jimita keudeh jimita keunoe  
Hana meubunyoe di Raja Jeumpa  
Di aneuk guda susah han bagoe  
Muda samlakoe peue ka mubala

Oh lheueh nibak nyan teuma oh dudoe  
Deuh le jideungo saboh suara  
Didala hawa meubunyoe-bunyoe  
Sang-sang ureueng moe geulakee doa

Aneuk guda plang teureubang jinoe  
Jitakat su nyoe teumpat suara  
Meung na sikeujab leugat le sampoe  
Sujud ubak po samlakoe muda

Raja Jeumpa kheun mameung le dudoe  
Wahe ulon droe baro troh gata  
Cit ka bunoe kon lon cuboe-cuboe  
Oh noe hat uroe ka troh tateuka

Aneuk guda kheun lheueh nyan oh dudoe  
Ho ulon puwoe hai po meukuta  
Bak Musif Tapa atau u naggroe  
Atau bak putroe meureudum Ratna

Keudeh lam kuta ulon tapuwoe  
Dalam meuligoe bak putroe muda  
Oh lehueh takheun nyan muda samlakoe  
Guda ka jipo dalam istana

Laju bak tingkap neumumat jaroe  
Beudoh cut putroe neukalon rupa  
Jiwa ngon jicom muda samlakoe  
Seureuta jimoë jisro ie mata

Wahe e raja tanglong peungaroe  
Lon sarap bunoe ka hilang nyawa  
Sabab ka geupoh le ayah kamoe  
Geuyue bak meuntroe deungon bintara

Hana lon sangka nyang meunan bagoe  
Ateueh samlakoe keunong enanya  
Akan teutapi deungon doa kamoe  
Ka troh lom keunoe hai cahya mata

Mantong meutuh tuboh ulon nyoe  
Meuteumeung hiro lom po meukuta  
Neuseuot raja teuma lom meunoe  
Boh bek le tamoe hai putroe muda

Mantong raseuki dua geutanyoe  
Hajat beusampoe neulakee doa  
Jibeuot le bu ukeue samlakoe  
Jiduek cut putroe geunireng raja

Di Raja Jeumpa hingga srah jaroe  
Buka le dudoe hidang nyang raya  
Oh lheueh pajoh bu bandum seuleusoe  
Dalam meuligoe ka seungab haba

Ka teuduek haba raja ngon putroe  
Tapeugah jinoe akan bintara  
Teungoh jikawai muda samlakoe  
Deungon rakan droe bandum seumua

Ka na dua jeuem jidong jjiem droe  
Jipreh samlakoe cong iboh raya  
Hingga geutanyong le teungku meuntroe  
Hana jitren roe aneuk cilaka

Yoh nyan jitarek punca taloe  
Teupipoe-pipoe dumna panglima  
Jikalon hana muda samlakoe  
Ka teukab jaroe meuntroe bintara

Yoh nyan mupakat deungon rakan droe  
Bah takoh jinoe bak iboh raya  
Jicok le baci jimat u jaroe  
Iboh jikiloe reubah teuhanta

Iboh ka reubah ka jab bak bumoe  
Jicak le jinoe meuleua-leua  
Ka jibloh-jibloh keudeh ngon keunoe  
Mita samlakoe jikalon hana

Beungeh jih sangat jikap ngon jaroe  
Aneuk paluh nyoe saleh nyoe ho ka  
Yoh nyan phon tahei teukab ngon jaroe  
Sabe keudroe-droe meupandang muka

Maken lom hireuen jikeun lam pruet droe  
Ek na gadoh roe sang broh lam mata  
Teuma geumarit yoh nyan is meuntroe  
Peukeku tapa woe jinoe keu raja

Darah ngon ate pat tacok jinoe  
Paloe geutanyoe euntruck ngon raja  
Yoh nyan seuot le rakan lom sidroe  
Bah tasie jinoe kameng nyang raya

Ate ngon darah mangat tapuwoe  
Akan teungku droe nyan raja muda  
Bek peugah-peugah beuthat barangsoe  
Jimita jinoe kameng nyang raya

Keumah ngon pakat lagee haba nyoe  
Jimita jinoe kameng nyang raya

Kameng ka jisie darah jipuwoe  
Hingga troh sampoe keudeh bak raja

Ate ngon darah ka jipeujaroe  
Nyoe pat teungku droe napsu meukuta  
Neucok le raja hingga neuseudoe  
Ka mangat asoe di raja muda

Darah ngon ate neupajoh ka troe  
Neumarit jinoe ngon aneuk ban na  
Jinoe peue haba wahe aneuk droe  
Buet ka seuleusoe jinoé peue haba

Seuot le manyak angkat ngon jaroe  
Ampon teungku droe ka seumpurna  
Hajat ban ka troh napsu ka sampoe  
Meunan hareutoe budak ban nyata

Keu darah kameng han jihareutoe  
Jitakot paloe ngon rakyat dum na  
Jitakot beungeh raja keu meuntroe  
Takot geuangkhoe dum na panglima

Sidumnan akai aneuk manyak nyoe  
Han jihareutoe keu buet sibeuna  
Kon lagee meugat yoh saboh roe  
Akai brok tuloe tuha cilaka  
Deungon sabab nyan gob dum meupaloe  
Nyang meunan bagoe bek takeureuja  
Ka seungab haba ka aman nanggroe  
Ka teutap ohnoe saboh calitra

Meugrak teukeudi bri Tuhan sidroe  
Teuka lom dudoe saboh treuk bala  
Bak saboh watee teungoh cot uroe  
Teuka kleueng pindor jak 'peugah haba

Di Raja seunang teungoh duek keudroe  
Klueng di cong panjoe jimeusuara  
Hai raja muda pakon that laloe  
Ate kameng roe ka lheueh taseuba

Darah ngon ate ka lheueh taseudoe  
Di teungku meuntroe jitipee raja  
Jeh Raja Jeumpa dalam meuligoe  
Mantong ngon putroe dalam istana

Meungkeu jikheun ka na padum go  
Di raja nanggroe neutupeue basa  
Laju neukek le dalam meuligoe  
Po raja nanggroe ka beungeh raya

Neuhila peudeueng neumat bak jaroe  
Neutron le dudoe di raja muda  
Laju ka neujak bak sinyak putroe  
Hingga troh sampoe uleuen istana

Neuheu le sigra yoh nyan aneuk droe  
Seureuta sigo ngon Raja Jeumpa  
Wahe aneuk lon jantong ate droe  
Wahe sambinoe dan Raja Jeumpa

Tatrenkeu keunoe wahe cut putroe  
Tatren beusigo dua ngon raja  
Na lon peunikah laju le jinoe  
Kareuna lakoe ka na seudia

Ka lheueh na tatrhoh dalam meuligoe  
Ka got carong droe dum aneuk dara  
Nyang lon peukawen hana tapakoe  
Tamita keudroe hai nyak digata

Meunankeu neukheun le raja nanggroe  
Di sinyak putroe teuot meugeumpa  
Teuma jikheun le ubak samlakoe  
Uleh cut putroe Meureudum Ratna

Meung bek neutren-tren wahe teungku droe  
Neuduek disinoe neuiem droe saja  
Meunyo cit neutren takot paloe  
Ayah ulon nyoe geupoh meukuta

Meunan ka jikheun le sinyak putroe  
Pinto meuligoe jigunci sigra

Oh lheueh jigunci pinto meuligoe  
Jiduek bak sagoe jisro ie mata

Cut putroe ingat akan naseb droe  
Deungon samlakoe nyan Raja Jeumpa  
Saulaweuet teuka gata nyak keunoe  
Ate ulon nyoe ka seunang raya

Kareuna ka na judo cut putroe  
Cit ka treb peue roe lon preh-preh gata  
Nyankeu aneuk lon tatreng nyan keunoe  
Nak lon bri jinoe wakilah gata

Neumeuhei sabe le raja nanggroe  
Hana jipakoe uleh aneukda  
Raja ka beungeh neukab ngon jaroe  
Neuak le dudoe dalam istana

Raja peuek le ngon kapak beusoe  
Pinto meuligoe neukeumeung buka  
Laju jimarit budak nyang bunoe  
Hai tuanku droe e po meukuta

Neupiyoh dilee e payong nanggroe  
Teuntang hai buet nyoe bah tapareksa  
Bah tapareksa laba ngon rugoe  
Bek barangkaho buet takeureuja

Cit ka nyan judo di tuan putroe  
Kheundak nibak po Tuhan nyang Esa  
Gampong that jeuoh ka trohneu keunoe  
Dalam meuligoe ka troh neuhalal

Ka lheueh meujanji raja ngon putroe  
Yue jak lakee droe bak po meukuta  
Beuthat tatipee meuribee bagoe  
Raja Jeumpa nyoe hat cit binasa

Ka lheueh taikat gaki ngon jaroe  
Dalam meuligoe troh laom geuhala  
Disinan tanda laba ngon rugoe  
Judo cut putroe ureueng meung nama

Teuama bacut treuk ulon hareutoe  
Beuthat barangsoe jamee ban teuka  
Patot tatanyong peue na hajat droe  
Nyang troh nyan keunoe peue jijak mita

Meunyo cit tapoh laju barang ho  
Ureueng meurantoe jitem boh nyawa  
Meulada sineuk umpama conto  
Beuthat barangsoe haña jitaba

Hanajisayang keu tinggai nanggroe  
Laju jiniet droe ka mate pana  
Simanyak mirah meunan hareutoe  
Di raja nanggroe ka seunggab haba

Teuma lon peugah keu tuan putroe  
Jieu ayah droe ka beungeh raya  
Jidong bak pinto jikheun le meunoe  
Seurauta jimoe jibuka haba

Bukon le sayang kalang diasoe  
Beuthat tamanoe leukang jihana  
Wahe ayah lon pakonkeu meunan  
Akan ulon nyae tan le hareuga

Na sang nyum lon jak beujarak nanggroe  
Bah le lon boh u dalam rimba  
Bak meunoe sabe ate lon rangoe  
Bah le lam jeuem nyoe jinoe lon bungka

Nyoe pat istana deungon meuligoe  
Tilam meusujoe ngom tiree rawa  
Bandum tika eh lon pulang jinoe  
Akan ulon nyoe bek le neukira

Bukon le sayang sawek di jaroe  
Ka putoh taloe bak wayang seunda  
Cit ka ohnoe hak kheundak keu kamoe  
Lon tinggai nanggroe ka sro ie mata

Hana le guna lon duek disinoe  
Malam ngon uroe keunong seurapa

Meunankeu narit bak sinyak putroe  
Di raja nanggroe ka sro ie mata

Raja neubeudoh leugat le neuwoe  
Jiikot dudoë le manyak ban na  
Raja teupike dalam ate droe  
Umpama duroe dalam anggeeta

Watee taeungke ka saket asoe  
Meunyo taiem droe jibeungkak raya  
Meunoepi salah meudeh rugoe  
Meunoepi paloe meudehpi cupa

Umpama puree nibak hidong droe  
Beuthat khieng bangoe ka meunan jeumpa  
Meung buet jih salah di sinyak putroe  
Oh tapeureunoe jipeudong dawa

Teutapkeu susah di raja nanggroe  
Jinoe keu putroe lan puwoe haba  
Meugisa haba raja ngon putroe  
Beurangkat geuwoe u nanggroe Jeumpa

Musem keunong sa paya meuasoe  
Rata jeuep sagoe cangguek jimeusu  
Hingga ka seupot jilob ngon uroe  
Geukheun bak putroe deelat tuanku

Wahe adek cantek peungaroe  
Meukeumah adoe jinoe beulaju  
U nanggroe Jeumpa jinoe tajak woe  
Yoh goh lom uroe teuka lom po du

Meureudum Ratna peukeumah le droe  
Jingui u asoe ija beuleudru  
Jisok ngon subang jiboh patam dhoë  
Jisok gleueng jaroe intan cahya hu

Oh hase cukop di sinyak putroe  
Marit le dudoë di sinyak meulu  
Ngon sinyak ubat teuma lom dudoë  
Jikheun bak putroe meunoe nyan laku

Wahe e pocut bek tinggai kamoe  
Beuneuba jinoe wahe tuanku  
Beuak meusampe nyang kamoe  
Jinoe beusigo lor-ikot laju

Yoh nyan jiseuot le sinyak putroe  
Wahe cuda droe bek that karu  
Hana jeuet tajak sigo geutanyoe  
Pakri ban jinoe kandran cit satu

Jeuet kamoe jak tueng oh laen uroe  
Jinoe cuda droe siat tatunggu  
Meunankeu jikheun le sinyak putroe  
Yoh nyan jiem droe di sinyak meulu  
Ka seungab haba dayang ngon putroe  
Guda le sampoe keunan troh laju  
Hingga neukek le raja ngon putroe  
Gudapi jipo laju meu-u

Bak Musif Tapa hingga ka sampoe  
Neutren le jinoe deelat tuanku  
Guda jidong le di ateueh bumoe  
Beungoh le uroe ka puteh timu

Po Ni ka jaga dalam meuligoe  
Neueu samlakoe ngon putroe meulu  
Putroe tajo le oh teuma dudoe  
Jak mumat jaroe po bintang timu

Po Ni neusambot neukheun le meunoe  
Wahe aneuk droe bu panyang umu  
Wahe boh ate sare ka troh woe  
Lon sangka baroe ka habeh umu

Di Raja Jeumpa neuseuot meunoe  
Wahe po ma droe tulong Tuhanku  
Deungan na tuah bak sinyak putroe  
Troph lom ulon woe jak saweue ibu

Napsupi ka troh hajat ka sampoe  
Wahe po ma droe seulamat umu

Meunan ban narit muda samlakoe  
Teuma le dudoe geubeuot le bu

Oh lheueh pajoh bu teungku samlakoe  
Deungon po ma droe neumarit laju  
Po ma ulon ba jinoe lon puwoe  
Keu ngon cut putroe po bintang timu

Alah hai aneuk po bungong uroe  
Meung bek aneuk droe tamaba ibu  
Rumoh ulon soh tinggai hana soe  
Lom po ma sidroe ka tuha umu

Di Raja Jeumpa teume neujem droe  
Muda samlakoe hana le karu  
Yoh nyan neucok meuh kada sikatoe  
Keu bungong jaroe neubri keu ibu

Po ma sambot le ngon dua jaroe  
Neukheun le meunoe ulon tuanku  
Idin hai po ma kamoe meujak woe  
Beutroh u nanggroe bupanyang umu

Hana peue salah wahe aneuk droe  
Po ma ka neumoe yoh nyan le laju  
Kareuna po ma umu ka udoe  
Tinggai lon sidroe mate tan soe eu

Di Musif Tapa meunan neukheun proe  
Di sinyak putroepi ka moe laju  
Di putroe ubat teuringat keudroe  
Ka tinggai nanggroe po ma deungon du

Padum ek saket meunyo ngon dudoe  
Hana cit meueu keu guna po du  
Teungoh jiba e disinyak putroe  
Marit samlakoe yoh nyan le laju

Pakon jeuet tamoe hai bungong geutoe  
Laba ngon rugoe tapike laju  
Yoh mantong na rab gata ngon nanggroe  
Nak lon jak puwoe keudeh bak po du

Meunyo tan napsu taseutot kamoe  
Neukheun le jinoe hai bintang timu  
Yoh nyan seuot le di sinyak putroe  
Bukon teungku droe lon ingat keu du

Ulon niet ka lheueh tanom lam bumoe  
Lon niet ka geuwoe ubak Tuhanku  
Meunyo meukuta han neutueng kamoe  
Keu peue neuyue woe ulon tuanku

Got takoh takue laju disinoe  
Bek meunoe-meunoe ate lon tunu  
Nibak neupeugah meudeh ngon meunoe  
Bah le got jinoe dalam gle neuhue

Meukru seumangat wahe e putroe  
Bukon hai adoe hana meulon eu  
Nyang lon jak mita cit gata sidroe  
Ulon boh nanggroe hai bungong meulu

Gata hai adek lon niet nyawong droe  
Pakonkeu jeuet roe tayue koh takue  
**Meunankeu** haba nibak samlakoe  
Ate cut putroe yoh nyan phon seuu

Oh lheueh nibak nyan habaran nyang toe  
Guda ka sampoe keunan troh laju  
Oh ka lheueh idin nibak po ma droe  
Raja ngon putroe beurangkat laju

Neupasang guda le ban dua droe  
Dilikot putroe dikeue tuanku  
U dalam hawa guda ka jipo  
Huteuen ngon duroe laju jilalu

Bak pinto rimba hingga ka sampoe  
Neutron le jinoe deelat tuanku  
Yoh nyan piyoh le raja ngon putroe  
Di guda ragoe jjmeurot laju

Meung na sikeujab teuma oh dudoe  
Marit putroe deungon tuanku  
Idin hai ampon ulon jak manoe  
Hugob that asoe dilon hai teungku

Yoh nyan le seuot muda samlakoe  
Piyoh sambinoe siat tatunggu  
Ulon jak Ulon jak tawa ie laot danoe  
Nak jeuet tamanoe hai bungong meulu

Oh lheueh neutawa le raja nanggroe  
Beudoh cut putroe jak manoe laju  
Raja yub kayee dinan piyoh droe  
Neupreh cut putroe laloe bak neueu

Jipot le angen sijuek ngon asoe  
Di raja nanggroe teungeut le laju  
Ka grak teukeudi bri Tuhanku  
Teuka le keunoe yoh nyan jen hantu

Jikoh le takue muda samlakoe  
Ulee jibapo jisrom lam alue  
Raja ka mate di jen ka jiwoe  
Di sinyak putroe hana jitupeue  
  
Lam laot tawa teungoh jimanoe  
Di sinyak putroe kachuek ie laju  
Kachuek jimeusu lagu meubunyoe  
Siulah bagoe ka jibri tahu

Syum kasyum che wahe e putroe  
Pakon that laloe bak tameulagu  
Hana taingat jeh pat keu lakoe  
Teuka jen pindoe ka jikoh takue

Meunankeu jikheun uleh ie danoe  
Ate cut putroe yoh nyan phon ragu  
Di dalam ate na dum geutampoe  
Yoh nyan cut putroe jiteungoh laju

Salen basahan rujang bak asoe  
Keudeh bak lakoe jiplueng meuu-u

Oh ban troh keunan di tuan putroe  
Jiteugom laloe deelat tuanku

Jikalon ulee ka cre han meuho  
Cut putroe jimoelaju meuu-u  
Alah hai teungku pakonkeu meunoe  
Neutinggai kamoe wahe tuanku

Tinggai lon lam gle hana le soe pakoe  
Di tuanku droe ka habeh umu  
Bumate ulon laju beusigo  
Deungon teungku po e ya Tuhan

Adat lon hudep han meuho saho  
Jeuoh ngon nanggroe po ma deungon du  
Sayang jibae di sanyak putroe  
Dalam gle sidroe hana soe bantu

Binatang huteuen hingga dum sampoe  
Keunireng putroe jihudom laju  
Rimueng ngon gajah laen sinaroe  
Jirom cut putroe ate that gilu

Cut putroe neukheun laju le meunoe  
Wahe ulon droe ka peurab laju  
Ulon nyoe kakap beuleugat jinoe  
Cit ka kuniet droe hana le umu

Na sapat mate dua ngon lakoe  
Bandua kamoe meusapat kubu  
Meunankeu jikheun di sinyak putroe  
Binatang nyoe hana jimeusu

Di putroe riyoh gadoh bak poh droe  
Ija bak asoe habeh meusiseue  
Ok teugeureubang dipinggang saho  
Sang-sang ka pungo cut putroe meulu

Jikheun le panton sira ngon jimoel  
Meuulah bagoe buloh peurindu  
Bukon that sayang subang ban lon bloe  
Leukang peunatroe keunong keuleumbu

Bukon le sayang cut bang lon sidroe  
Goh lom lon hiro ka habeh umu  
Bukon le sayang aneuk leuk ragoe  
Han tom meung sigopi lom jikutru

Get that meusampe lon cre di naggroe  
Lon seutot lakoe deelat tuanku  
Lon tinggai kuta deungon meuligoe  
Lon tinggai nanggroe po ma deungon du

Oh troh dalam gle ka tinggai sidroe  
Teungku samlakoe ka habeh umu  
Teutap lam bae di tuan putroe  
Lon peugah jinoe keu putroe Bungsu

Meureudum Ratna nyaneu cuda droe  
Jeuet geukheun adoe le putroe Bungsu  
Nyan aneuk aduen ngon aneuk adoe  
Dua droe putroe laen-laen ku

Di putroe Bungsu nibak siuroe  
Ka deuh geudeungo yoh nyan saboh su  
Siula-ulah sang-sang ureueng moe  
Lagee su adoe jilakee bantu

Di putroe Bungsu peukeumah le droe  
Jingue u asoe peukayan laju  
Oh cukop hase bandum sinaroe  
Teureubang jinoe jitakat pat su

Ubak Meureudum hingga ka sampoe  
Jikalon adoe jiklik meuu-u  
Ka jipeurab le ret deh ngon ret noe  
Cuda ngon adoe ate that rindu

Wahe e adoe pakon roe tamoe  
Peugah bak kamoe jinoe beulaju  
Pakonkeu mate ureueng lakoe nyoe  
Pakonkeu meunoe soe nyang koh takue

Meusoe geuheu nan peue buet lam gle nyoe  
Ngon gata adoe peue na sikuphu

Meureudum Ratna seuot le meunoe  
Nyoe judo adoe hai cuda Bungsu

Nyan Raja Jeumpa nama geukheun proe  
Hajat kamoe woe u nanggroe teungku  
Ka grak teukeudi bri Tuhan sidroe  
Oh troh teumpat nyoe teuka jen hantu

Jikoh le takue teungku samlakoe  
Ulee han meuho jisrom lam alue  
Meunankeu jikheun buleuen siuroe  
Seout cuda droe cut putroe Bungsu

Meunyo ka meunan hai bungong geutoe  
Taseutot jinoe ulee nyan laju  
Oh ka meuteumeung keunoe tapuwoe  
Beudoh hai adoe bek le that karu

Binatang rimba yoh masa bunoe  
Ka habeh jiwoe bandum le laju  
Sabab ka na ngon dituan putroe  
Deungon cuda droe cut putroe Bungsu

Meureudum Ratna meubacut tan yo  
Jibloh lam duroe jitron lam alue  
Jak seutot ulee muda samlakoe  
Habeh dum jilho rata peunjuru  
Oh ban meuteumeung laju jipuwoe  
Ubak cuda droe jijak le laju  
Bungsu sambot le ngon dua jaroe  
Jipeukab dudoe laju bak takue

Deungon ajimat jiboh le putroe  
Deungon ie mawo jisiram laju  
Puleh le luka di raja naggroe  
Deungon kheundak po sidroe Tuhaniku

Laju lagee sot rupa ka muwoe  
Beureukat jaroe cut putroe Bungsu  
Nafah ka teubiet meuto ngon asoe  
Yoh nyan lakee droe di putroe Bungsu

Idin hai adek dilon kujak woe  
Bek jula uroe hai adoe teungku  
Idin bak hamba wahe cuda droe  
Nyawong ka muwoe deelat tuanku

Taucap syuko keu hadirat po  
Beuke lom dudoe tanyoe beuteumu  
Di putroe Bungsu ka leupah jiwoe  
Beudoh le dudoe deelat tuanku

Takalon darah mirah bak asoe  
Tanyong bak putroe yoh nyan le laju  
Wahe e adek pakonkeu meunoe  
Pane darah nyoe get that mirah hu

Teuma jipeugah le sinyak putroe  
Jikoh takue po uleh jen hantu  
Adat kon na troh cuda lon putroe  
Raja samlakoe han muwoe umu

Teuma tanyong lom le raja nanggroe  
Hokakeu jinoe nyan cuda Bungsu  
Bunoe hai raja ka leupah geuwoe  
Di cuda putroe malee keu teungku

Kareuna teungku ka jeuet keu adoe  
Nyankeu jeuet neuwoe di cuda Bungsu  
Ka seungab hana raja ngon putroe  
Beurangkat geuwoe u nanggroe laju

Neuek cong guda raja ngon guda  
Guda ka jipo laju meuu-u  
Ubak kayee lhee keunan ka sampie  
Neupiyoh sinoe deelat tuanku

Neuboh le geunta guda nyang ragoe  
Payong meurumboe neubuka laju  
Oh cukop hase bandum sinaroe  
Siulah bagoe matauroe hu

Oh lheueh nibak nyan beudoh lom neupo  
Neutakat nanggroe deelat tuanku

U nanggroe Jeumpa hingga ka sampie  
Raja ngon putroe neupeugot laku

Guda jilinggang lam awan jipo  
Suara bako miseue beureugu  
Sang-sang su canang meunankeu bagoe  
Di rakyat nanggroe yoh nyan ka karu

Jiplueng meuron-ron keudeh ngon keunoe  
Sabe Keudroe-droe teumanyong laju  
Meujan-jan jeuoh meujan-jan sang toe  
Hana jituhu barat ngon timu

Jiplueng meuron-ron lakoe binoe  
Jak deungo su nyoe meung pat meuu-u  
Teutap meuplueng-plueng keudeh ngon keunoe  
Sabe keudroe-droe jitanyong pat su

Meung pat meusu nyan nyang ka tadeungo  
Hum hai adoe hana meupat su  
Di dalam hawa muda samlakoe  
Dua ngon putroe neupeugot laku

Oh lheueh meunari keudeh ngon keunoe  
Lhab Mana dudoe neusujud laju  
Bak pinto kuta hingga ka sampie  
Raja ngon putroe neupiyoh laju

Tapiyoh gata siat disinoe  
Lon tamong sidroe bak cuda dulu  
Ulon jak bri thee lon yue tueng adoe  
Mangat geupuwoe u da lam laju

Oh ka lheueh idin bak tuan putroe  
Muda samlakoe neutanyong laju  
Leupah bak pinto rot tren meuligoe  
Yoh nyan cuda droe hingga deuh neueu

Laju geupeurab rot deh ngon rot noe  
Geucom ngon geumoe yoh nyan le laju  
Lheueh seumah cuda cut bang lom dudoe  
Waki ngon meuntroe peurab lom laju

Wazi panglima sinan meusaho  
Di bale pudoe dum teungku-teungku  
Yoh nyan marit le kande samlakoe  
Neujak tueng adoe jih putroe meulu

Jeh pat dilua lon keubah sidroe  
Ban troh lon puwoe di nanggroe Diu  
Ban cuda deungo meunan kheun adoe  
Ka teukab jaroe yoh nyan le laju

Meung pat hei adek takeubah putroe  
Tapeugah jinoe hai adoe teungku  
Jeh pat dilua wahe cuda droe  
Neujak tueng jinoe neupuwое laju  
Ban cuda deungo meunan kheun adoe  
Laju bak meuntroe yoh nyan neubri su  
Ka geucok le gong laju bak sagoe  
Geupeh le jinoe meutaga that t su  
Geutot meuriam rasa lham nanggroe  
Jeuh deungon toe rakyat troh laju  
Khuen keunong tujoh luroh on panjoe  
Watee cot uroe layee on labu

Peunoh ngon kuta sarat meuligoe  
Wazi ngon meuntroe leube ngon teungku  
Di raja bujang yoh nyan neukheun proe  
Tadeungo kamoe jinoe lon bri su

Nyoe Raja Jeumpa nyang ka ban troh woe  
Dua ngon putroe di nanggroe Diu  
Jeh pat dilua geukeubah putroe  
Beudoh geutanyoe tajak tueng laju

Ngon ranub bate leugat neupasoe  
Tajak tueng putroe beuget meulaku  
Sabab di jeuh ka troh nyan keunoe  
Bauget tapakoe bek malee sipu  
Meunankeu sabda bak raja nanggroe  
Baudoh sinaroe jijak le laju  
Siti Geulima ulee keumudoe  
Jijak tueng adoe cut putroe Diu

Ngon ranub geumat bak jaroe  
Hingga ka sampoe bak putroe meulu  
Siti Geulima lanja le peutoe  
Jak sapa adoe po bintang timu

Narit meusambot mangat tadeungo  
Jikheun bak adoe yoh nyan le laju  
Putik boh mancang karang boh panjoe  
Lincah cot uroe ta jampu-jampu  
Lon meuniet buleuen jatuh u bumoe  
Meung nateu keunoe hai adoe teungku  
Oh seungab cuda seuot le adoe  
Angkat ngon jaroe get that meulaku  
Jipeukek seumbah akan cuda droe  
Jikheun le meunoe le sinyak meulu  
Cong kayee raya na umpungunoe  
Aneuk leuek ragoe goh jeuet jikutru

E cuda payong ka na lon keunoe  
Meukat untong droe mita sisuep bu  
Cong kayee raya tok-tok beuragoe  
Aneuk tulo po dalam Blang Malu

Di nanggroe jeuoh ka troh lon keunoe  
Habeh meuseue-seue barat ngon timu  
Neutem peuguna wahe cuda droe  
Lon ureueng binoe hana jeuet sapeue

Jampang neumuntee jeuet lon teumampoe  
Jampang neumeugoe leumo ulon hue  
Meunankeu narit bak sinyak putroe  
Mameh han bagoe miseue ie madu

Siti Geulima seuot le meunoe  
Narit bak adoe geujawueb laju  
Kapai jibungka ulua nanggroe  
Lam bakat tampoe meutunggeng iku

Bek roh hai adek nyang meunan bagoe  
Lon meuniet adoe intan cahya hu  
Lon meuniet gata meutia pudoe  
Bu mangat asoe beupanyang umu

Lon peumulia lagee kada droe  
Daleh cit adoe nyan ureueng Diu  
Geujok le ranub leuh cuda droe  
Nyoepat hai adoe ranub sigapu

Nyoepat ranub tho tawo bak panjoe  
Pajoh hai adoe seuleupong pageue  
Keueueng ngon masam intan taiem droe  
Bek tahareutoe barat ngon timu

Meukru seumangat wahe cuda droe  
Jiseuot adoe yoh nyan le laju  
Dalam Blang Bireuen ureueng meueumpoe  
Kawan leumo woe di Gle Cot Gapu

Bak droenyan cuda na cit sidumnoe  
Nibak adoe nyoe hana ka hana sapeue  
Di nanggroe jeuoh ulon troh keunoe  
Sidroe lon jatoe ban tong-tong gapu

Di gob dum geujak cukop sinaroe  
Wazi ngon meuntroe tanda seudadu  
Meung ijapi tan dilon bak asoe  
Lon niet lon boh droe hai cuda teungku

Meukru seumangat wahe eadoe  
Hana lon pakoe keu bungkoh boh ru  
Asai meung kata ka na hai adoe  
Laen sinaroe dilon tan keupeue

Ka seungab haba ret deh ngon ret noe  
Geucok cut putroe geupuwoe laju  
Geuboh lam usong tanglong peungaroe  
Intan ngon pudoe blet blet cahya hu

Jipeh ngon canang dum macam bagoe  
Jiarak putroe jroh that meulaku  
Dalam istana hingga ka sampoe  
Peiduek cut putroe yoh nyan le laju

Ateueh keuta meuh tilaam meusujoe  
Oh lheueh nyan dudoe geubeuot le bu

Ka cukop hase bandum sinaroe  
Geubeuot jaroet teuma le laju

Peusinget geupet wahe eadoe  
Peubasah jaroet hai bungongmeulu  
Pajoh hai adek meung bu siseun troe  
Ngon asam kiroet gule on paku

Meung eungkot amasenpi tan disinoe  
Eungkot teunggiroe bek tameunapsu  
Meukru seumangat hai cuda putroe  
Sirasa ka troe oh ban lon eu bu

Asai makanan nyoe gule rampoe  
Mangat that asoe hai cuda teungku  
Geupajoh le bu yoh nyan le dudoe  
Disiman sidroe po bintang timu

Hana meusapat deungon samlakoe  
Tan na geiduek toe deelat tuanku  
Pinah ngon hidang yoh nyan seuleusoe  
Haba lon peutoe bek panyang buhu

Hingga ka malam jilob ngon uroe  
Yoh nyan cut putroe laju beuradu  
Hana meusapat raja ngon putroe  
Ureueng dua droe maukleh keuleumbu

Yoh nyan teupike uleh cuda droe  
Hingga oh dudoe muphom le laju  
Bak Raja Jeumpa cuda tanyong proe  
Pakon jeuet meunoe hai adoe teungku

Pakon han sapat gata ngon putroe  
Peue na meupaloe ngon putroe meulu  
Di Raja Jeumpa seuot le meunoe  
Goh mumat jaroet kamoe ngon teungku

Goh lom meunikah kamoe ngon putroe  
Ka moe dua droe goh jeuet meujampu

Putroe ion baplueng dalam meuligoe  
Uleh ayah droe hana geuteupeue

Kareuna ulon ka rab meupaloe  
Lam geunap uroe sabe gob buru  
Meunan neujawueub leh samlakoe  
Uleh Cuda droe muphom le laju

Di Raja Jeumpapi ka neuiem droe  
Lagee kheun adoepi ka seutuju  
Teuntee jadi prang akibat dudoe  
Jijak cok putroe teuma le po du

Bah le beusigra kaman beujinoe  
Peukawen adoe ngon putroe meulu  
Putoh ngon pakat ureueng ban lhee droe  
Dalam meuligoe hana soe tupeue

Jikukuek manok ka beungoh uroe  
Bandum sinaroe jaga le laju  
Beudoh le cuda dua ngon lakoe  
Keudeh ka geuwoe blang Seupeueng laju

Tinggi Lhab Mana raja ngon putroe  
Ka teiduek ohnoe dilee sigeutu  
Lon puwoe haba akan cuda droe  
Hingga ka sampoe u dalam leupu

Turon le sabda bak raja nanggroe  
Neuheu le meuntroe keunan troh laju  
Raja bujang kheun teuma le dudoe  
Peugah bak meuntroe deelat tuanku

Kamoe meuhajat peukawon adoe  
Dungan cut putroe jinoe beulaju  
Takrah ngon rakyat bandum lam nanggroe  
Jeuoh deungon toe bandum taseuru

Meunankeu sabda bak raja nanggroe  
Beudoh di meuntroe yoh nyan le laju  
Geupeh deungon gong teumeunggong bunyoe  
Sideh ngon sinoe rakyat troh laju

Peunoh ngon kuta sarat meuligoe  
Jibeuot jaroe deelat tuanku  
Meung paue neupangge bandum kamoe nyoe  
Nyang ka troh keunoe barat ngon timu

Wase tan jibri toh siri nanggroe  
Siri toh putroe raja meunapsu  
Mupatkeu musuh ka troh nyan keunoe  
Jiprang geutanyoe deelat tuanku

Turon le sabda bak raja naggroe  
Bukon keu putroe ulon meunapsu  
Bukonkeu musuh nyang tan troh keunoe  
Bukonkeu nanggroe nyang nyang ka na karu

Nyang jeuet ulon hei gata dum keunoe  
Peukawen adoe ngon putroe meulu  
Tabagi dua jinoe geutanyoe  
Ladom ret putroe sideh tatunggu

Blah Raja Jeumpa di Balang Seupeueng nyoe  
Lhab Mana putroe sideh meununggu  
Mangat meuato linto ngon putroe  
Bek na meusaho meujampu-jampu

Cut putroe utoh jeuoh that nanggroe  
Nyang geuba keunoe bek malee sipu  
Meunankeu sabda bak raja nanggroe  
Rakyat sinaroe teumanyong laju

Titah tuanku di ulee kamoe  
Pa jan jadeh nyoe deelat tuanku  
Pajan keurija keumala nanggroe  
Bak padum uroe mangat lon tupeue  
  
Peugah tuanku laju bak kamoe  
Di raja nanggroe neupeugah laju  
Buleuen Muaram bak siploh roe  
Boh gaca putroe po bintang timu

Malam limong blah linto tapuwoe  
Oh nankeu sampoe ulon beri tahu

Wa tee ka meujan pakat seuleusoe  
Rakyat ka jiwoe maseng u leupu

Tinggi lam kuta nyan raja nanggroe  
Deungon judo droe po bungong meulu  
Di Raja Bujang neukheun bak meuntroe  
Tapeugot jinoe surat beulaju

U Darul Aman kirem beusampoe  
Keudeh u meuntroe deelat tuanku  
Surat kireman peukawen adoe  
Hingga seuleusoe surat lheueh laju

Antosan intat surat le jinoe  
Keudeh keu meuntroe di nanggroe teungku  
U Darul Aman hingga ka sampoe  
Antosan dudoe jok surat laju

Hingga ka geucok surat le meuntroe  
Geubaca asoe muphom le laju  
Le meuntroe Buman oh lheueh nyan dudoe  
Rakyat lam nanggroe goukrah le laju

Oh ban troh keunan jibeut jaroe  
Laju tanyong proe peue na meunapsu  
Di meuntroe Buman yoh nyan hareutoe  
Surat na sampoe nibak tuanku

Raja meuhat jat peukawen adoe  
Geuundang tanyoe deelat tuanku  
Buleuen Muharam bak siploh uroe  
Tajak geutanyoe keudeh beulaju

Beuna ngon neume keu bungong jaroe  
Meunan di meuntroe ka geubri su  
Oh lheueh geupeugah bandum seuleusoe  
Rakyat ka jiwoe maseng u leupu

Antosan Jeumpapi gisa dudoe  
Keudeh u nanggroe laju geutuji  
U dalam kuta hingga ka sampoe  
Bak raja nanggroe jipeutoe laju

Jipeuek seumah jiangkat jaroe  
Ka jihareutoe meunoe ban laku  
Di Darul Aman wahe teungku droe  
Ka peuhase droe deelat tuanku

Meunan antosan ka jihareutoe  
Di raja naggroe marit le laju  
Laju neupeugah yoh nyan bak meuntroe  
Neukheun le meunde deelat tuanku

Keudeh Lhab Mana ulon kujak woe  
Gata disinoe jamee tatusgu  
Ngon meuntroe Buman gata disinoe  
Bahle dikamoe ret putroe meulu

Oh lheueh neupeugah meunan bak meuntroe  
Di raja nanggroe beurangkat laju  
Keudeh Lhab Mana hingga ka sampoe  
Geukheun bak adoe samlakoe teungku

U deh Blang Seupeueng di gata tawoe  
Gata ngon meuntroe sideh peulaku  
Di Raja Jeumpa beurangkat geuwoe  
Hingga troh sampoe Blang Seupeueng laju

U Darul Aman ulon hareutoe  
Teuduek haba nyoe dilee sigeutu  
E ya Tuhanu neutulong kamoe  
Beuek seuleusoe lon suson buhu

Beuseunang ate beumangat asoe  
Beukeku sampoe hajat ngon napsu  
Haba bek panyang nalam ngon rampoe  
Ureueng nyang deungo bek le keuliru

Ayat lon balek titek lon gantoe  
Ragam bunyoe e ya sang-sang ka tabeue  
Jeh bungong jeumpa ka mala lam on  
Bungong sitahan meususon banja

Keu meuntroe Buman jinoe lon paphon  
Hingga meuhimpon wazi panglima

Inong ngon agam kawan ngon kaum  
Wali ngon karong wareh syeedara

Cukop ngon beuban ragam ngon hukom  
Rayek seuneuon geuba keu raja  
Hingga beurangkat leugat le geutron  
Meuato turon ban laku kada

Panglima meuntroe dikeue awai phon  
Geubuka payong di atueuh guda  
Cukop ngon tandra jaga peulindong  
Pahlawan agong nyang teuga-teuga

Ngon reugu tandra jiikot langsung  
Tango jipeh gong meusu meutaga  
Lom ureueng inong likot nyan ladom  
Ureueng meukawom sukee meubangsa

Lheueh nyan sipai lagi meuron-ron  
Get that meususon meubanja-banja  
Leupah Cot Gapu laju u Geudong  
Nyang neumat hukon lam nanggroe Jeumpa

Peunab u tunong laju meuron-ron  
Ka troh u Geudong meuntroe panglima  
Laju Blang Seupeueng lheueh nyan le geutron  
Hingga troh lansong tamong lam kuta

Peiduek ngon beuban keubah seuneuon  
Jamee nyang agong geupeumulia  
Nyang meuntroe-meuntroe tamong lam geudong  
Nyang kawom-kawom dalam astana

Marit le meuntroe nyang po mat hukom  
Neuwasiет bak lon le poteu raja  
Titah tuanku nyang raja payong  
Gata deungon lon sinoe keurija

Tanyoe ret linto hari teungku ampon  
Neuwasiет bak lon uleh meukuta  
Di meuntroe Buman neujawueb lansong  
Ka kamoe seuon atueuh jeumala

Hingga troh watee lagee geukheun phon  
Yoh nyan peuseuon le Raja Jeumpa  
Rakyat lam nanggroepi ka meuhimpon  
Tamong meuron-ron bandum lam kuta

Geubagi dua rakyat lam gampong  
Teuma nyang ladom keuden Lhab Mana  
Ngon ranub bate hase dalam on  
Keu putroe tanglong geuba le gaca

Cut putroe Ratna gaca geupuphon  
Laju peuseuon le ahli maja  
Hingga ka malam geupasang tanglong  
Geupeh deungon gong geusok biola

Agam ngon dara hingga meuhimpon  
Nibak malam phon peurasan raya  
Malam keuduapi ka meusambong  
Hingga le lansong malam keutiga

Malam nyang keu lhee teuntee get jitron  
Sabab get alon peurasan gura  
Dum aneuk Aceh jimeuen rincong  
Jigrob-grob lambong jitob bak dada

Ladom sok lidah ladom sok hidong  
Ladom jitaluem nyan peumpeueng kaca  
Bandum khalifah leupah that muphom  
Doa peurabon sabe jibaca

Ureueng nyang kalon teuglong ban patong  
Ganje bak hukom takalon rupa  
Beungoh le uroe peungeueh lam gampong  
Ka seungab su gong teudoh biola

Habeh peurasan laen geupuphon  
Uroe nyan lansong geumeukeurija  
Leumo dum reubah nyang teumbon-teumbon  
Rakyat lam gampong meuuroe raya

Nyang leupah pajoh pruet-pruet ka busong  
Teuma nyang ladom jipuwoepi na

Lon koh bakalawah reubah geurundong  
Lon cot boh murong roh pisang tuha

Lon niet keuteumpat ka jeuet keusirong  
Meuah hai kawom hana lon saja  
Dalam meuligoe cut putroe tanglong  
Peungui le lansong cut putroe muda

Geucot ngon andam ban reusam gampong  
Peungui ija krong kasab sutra  
Ngon simplah dada cahya sang tanglong  
Lheueh nyan geugantung subang meucintra

Hana peue habeh meuceh lon suson  
Maklum ha i kawom adat purba  
Alat meuligoepi bagoe tanglong  
Macam-macam dum takalon rupa

Peureumadani meuhayon-hayon  
Lheueh nyan geususon ngon singgasana  
Teumpat duek raja keumala tanjong  
Meukek ngon meutren cahya peureuda

Ngon ayu-ayu cahya hu-hu lon  
Sang-sang bakat tren dimieng kuala  
Blah dara baro ohnoe tapuntong  
Keudeh Blang Seupeueng jinoe tamula

Nak mupat tanggam uram ngon ujung  
Mangat meusa mbong iku ngon punca  
Ret linto baro jinoe tapuphon  
Sinanpi lansong geumeukeurija

Ka na lam kuta seedara kawom  
Han payah himpon le guranta  
Dua droe meuntroe peutimang hukom  
Cit ka awai phon geubagi dua

Oh lheueh keurija malam le lansong  
Linto geupeutren yoh nyan ka geuba  
Dum ureueng inong dilee nyang jak phon  
Taeu meuron-ron tuha ngon muda

Panglima meuntroe dudoe le lansong  
Seureuta kawom wazi bintara  
Lheueh nyan sipai lagi meususon  
Deungon seuneuon atueh keupala

Peurakan ranub ngon teubee meuon  
Ngon u meulason asam ngon sira  
Leupah Blang Seupeueng ka troh Cot Leusong  
Geulumpang Payong keunan sampoe ka

Hingga troh keunan geupalu le gong  
Mangat geupuphom linto ka teuka  
Geutet meuriam meualon-alon  
Ka geubri lageuem keudeh Lhab Mana

Sidehpi meutum laju geupuphon  
Rakyat ka jitren preh ureueng teuka  
Sinoepi geujak langkah meuayon  
Cit ka meususon geuantri banja

Hingga ka leupah Geulumpang Payong  
Tamong lam gampong kuta Lhab Mana  
Blah dara baro yoh nyan ka geutren  
Ka geujak ampeueng jamee ban teuka

Peurumoh meuntroe dilee nyang jak phon  
Geubuka payong indah wareuna  
Ngon ranub bate tangke meususon  
Assalamualaikum phon-phon geusapa

Dum ureueng inong peutamong lansong  
Meuato turon meunurut kada  
Oh leupah inong tamong lam geudong  
Yoh nyan geupuphon di agam teuma

Taeu bak geudong jroh that meususon  
Ureueng po gampong kuta Lhab Mana  
Ureueng nyang teuka buka haba phon  
Assalamualaikum teungku syekhuna

Kamoe di jeuoh nyoe ho ka meutron  
Idin beulansong tamong lam kuta

Alaikumussalam hai teungku payong  
Meuh narit lon wahe seedara

Han jeuet tatamong dilee lam geudong  
Tadong bak jurong tapeugah haba  
Goh lom meuturi teungku deungon lon  
Saleh pat gampong keunoepi teuka

Peue na meukeusud seedara kawom  
Keunoe ka neutren peue neujak mita  
Di meuntroe Buman geuseuot lansong  
Jaroe geuseuon ateueh jeumala

Deungo seedara meupanton  
Meusilee ujung tuto meuputa  
Di Kuta Raja banda Peunayong  
Teumpat meurawon dum aneuk muda  
Pakon seedara gata sangka lon  
Tapeudong lam mbon kamoe ban teuka  
Sideh Blang Seupeueng keunoe kamoe tren  
Hajat lam jantong mita seedara

Meuttinggai nanggroe meucre ngon gampong  
Keunoe meuarong meubloh ngon paya  
Meugah na sinoe nyang bungong tanjong  
Didalam keubon kuta Lhab Mana

Didalam ate kamoe that rihon  
Bungong sikuntom kamoe meuhawa  
Pineueng boh awe gambe boh lakom  
Bungong jaroe lon akan seedara

Nyoe Raja Jeumpa cahya ban tanglong  
Tatueng hai kawom akan seedara  
Hajat peutamong keunan lam geudong  
Tajak peuteumeung ngon putroe muda

Seupreuek breueh pade peureutek ie on  
Seedara kawom beuta peuguna  
Salah neuteugah susah neutulong  
Pat-pat nyang sironq patot taaja

Hana meutuoh adat ngon hukom  
Kamoe nyoe duson jeuoh that banda  
Bak jamee teuka haba ka puntong  
Yoh nyan geusambong uleh po kuta

Meukru seumangat rahmat meuhimpon  
Kamoe meuseuon atueuh jaumala  
Meunyo ka meunan seedara kawom  
Tamong beulansong laju lam kuta

Meuah seedara meung na meusinggong  
Uram ngon ujung hana meung saja  
Hingga geutamong laju meuron-ron  
Peiduek seuneuon oh troh lam kuta

Piyoh bak teumpat leugat le lansong  
Meunurut hukom ban lagee kada  
Di meuntroe-meuntroe atueuh bale rong  
Di raja payong bak singgasana

Dumna sipai atueuh panteue krong  
Nyang kawom-kawom dalam astana  
Geubeuot hidang yoh nyan le lansong  
Cit ka meususon ban laku jeumba

Di raja-raja hidang meususon  
Geuboh lam dalong akan panglima  
Akan sipai bri bu meususon  
Sie leumo teumbon ngon eungkot kada

Raja ngon meuntroe sie kameng teumbon  
Panglima agong sie keubeue raya  
Oh lheueh pajoh bu hidang geupeutron  
Peurab le lansong syiah ulama

Keu Raja Jeumpa nikah geupuphon  
Ngon putroe tanglong Meureudum Ratna  
Kabui ngon hijab leugat le lansong  
Oh lheueh nyan bandum geulakee doa

Cok Raja Jeumpa keumala tanjung  
Geujak peuteumeung Meureudum Ratna

Dalam astana jeumpa bee hirom  
Geupeudeuk lansong meujandreng dua  
Raja ngon putroe pudoe ban tanglong  
Get that meutanggong sabe that padra  
Soe-soe nyang kalon teuglong ban patong  
Dak jeuet bek tatreng bek le tagisa

Ate geumbira suka ngon rihon  
Didalam jantong maseng keulua  
Jibeut le bu keu tungku ampon  
Sahab kasab mbon jampu peureuda

Peurab cut putroe sambinoe tanglong  
Hidang meususon buka le sigra  
Jipeusrah jaroe samlakoe payong  
Bandum muphom cut putroe muda

Oh lheueh pajoh bu hidang jipeutron  
Ranubjisuleueng keu poteu raja  
Oh jula malam bintang meuhayon  
Di gob ka jitron jiwoe u nanggroe

Tinggai lam kuta seedara kawom  
Jamee nyang agong meuntroe panglima  
Dalam meuligoe putroe ngon ampon  
Panyot geupeuleh malam ka jula

Tamong lam tiree geucom bee harom  
Tarek keulubong putroe ngon raja  
Oh troh lam tire lagee pakri hom  
Han ek lon puphom ujung ngon punca

Beungoh ngon uroe sigo ka geutron  
Geucok ngon sabon jak menoel sigra  
Oh ka lheueh manoe putroe ngon ampon  
Geukek le lansong dalam astana

Bu cit ka hase sinan lam dalong  
Makeuen ngon minom putroe ngon raja  
Meunankeu sabe kande kande zaibaton  
Teutap lam rihon aman seuntosa

Putroe ngon raja teutap lam untong  
Han tom meusigong sipatah kata  
Di meuntroe Buman yoh nyan ka geutron  
Geumohon ampon idin bak raja

Oh lheueh idin geuwoe u gampong  
Seureuta bandum wazi panglima  
U Darul Aman hingga troh lansong  
Oh nan ka puntong saboh calitra

Di Raja Bujang yoh nyanpi geutron  
Keudeh Blang Seupeueng laju geugisa  
Teutap lam kuta peutimang hukom  
Ngon judo payong Siti Geulima

Di Raja Jeumpa Keumala tanjung  
Peutimang hukom kuta Lhab Mana  
Cukop ngon tandra jaga meusuon  
Meuato turon meuhambo-hambo

Teuduek haba nyoe ohnoe ka puntong  
Syahdan adapon jinoe tamula  
Ka puteh-puteh sibungong tupah  
Ka mirah-mirah sibungong husen

Bahle lon balek ngon laen harap  
Jonoe lon ubah ngon buhu laen  
Siti Geulima deungo lon peugah  
Pikeran leumah didalam dihen

Ubak cuda droe laju jipeugah  
Raja meutuah manyoh ngon meusyen  
Jinoe hai teungku pakri ban ulah  
Raja Jeumpa sah ka lheueh meukawen

Beuthat bumeunan geutanyoe goh glah  
Sabab meunikah ngon putroe aseng  
Lompi putroe nyan droe jih seuleuh  
Teuntee tan meugah tanyoe peukawen

Jinoe leubeh get teungku meutuah  
Si Jeumpa mirah peunikah laen

Bah le tamita putroe nyang ceudeh  
Jinoe bubagah nak tapeukawen

Siti Geulima meunan peuneugah  
Yoh nyan geubantah le cuda canden  
Sang hana meuoh nyang meunan ulah  
Sang tapubeuah putroe ban kawen

Di nanggroe Indra keunoe jilangkah  
Siat le bagah ka tameucandreng  
Sang bak muka jih ka tacok darah  
Malee seuleupah sibungong husen

Lompi hai cuda deungo lon peugah  
Adoe meutuahpi sang han jitem  
Sabab putroe nyoe judo jih sah  
Sayang meuleupah manyoh ngon meusyen

Paneukeu jitem laen meunikah  
Beuthat tapieugah lahe ngon baten  
Siti Geulima seuot le bagah  
Buet nyoe bahle bah taci beurundeng

Siraja Jeumpa keunoe yue langkah  
Mangat tapeugah pakri ban lajem  
Ka seungab haba pakat ka sudah  
Geuheui le bagah meuntroe nyang canden

Keudeh Lhab Mana raja yue langkah  
Meuntroepi bagah laju ka geutron  
Bak Raja Jeumpa hingga troh langkah  
Geupeuk seumah sujud ngon taklem

Ampon tuanku raja duli syah  
Cuda yue langkah napsu that ngeuren  
Saleh peue haba nyang keumeung peugah  
Rupa sang ulah na peue nyang peunteng

Raja Jeumpa ngo meunan ban ulah  
Geujak bak zaujah geulakee idin  
Idin keu ulon tanglong meutatah  
Cuda yue langkah saleh peue meuchen

Cut putroe seuot ngon insya Allah  
Ie gigoe leumah rumeh teukhem-khem  
Oh lheueh nibak nyan beudoh jiseumah  
Raja meulangkah laju le neutren

Neucok le guda raja meutuah  
Neukek le pantah po bungong husen  
Keudeh Blang Seupeueng laju meulangkah  
Meuntroepi bagah laju jiireng

Keudeh lam kuta hingga troh langkah  
Po banta indah cong guda neutren  
Geujak meuteumeung ngon cuda bagah  
Meunan cit ulah ngon ureueng laen

Lheueh mumat jaroe raja duli syah  
Neupiyoh payah po bungong husen  
Geubeuot le ranub didalam karah  
Haba geupeugah peue-peue nyang mungken

Lheueh pajoh ranub sigo mirah  
Hidang le bagah deundayang peutren  
Oh lheueh pajoh bu hidang jipinah  
Cuda le bagah duek digeunireng

Siti Geulima teuma le peugah  
Adek meutuah nyang that ulon chen  
Nyangkeu jeuet adek cuda yue langkah  
Raya seuleupah napsu lam dihen

Harap tapeureh adoe meutuah  
Lon bek tabantah wahe teungku ben  
Di Raja Jeumpa seuot le bagah  
Cuda neupeugah lahe ngon baten

Peue-peue nyang napsu hana lon ubah  
Bandum lon keubah u dalam dihen  
Meunyo ka meunan adoe meutuah  
Deungo lon peugah hai bintang canden

Beunget tasimak bek salah-salah  
Bandum takeubah didalam baten

Kareuna cuda ate that susah  
Adek meutuah goh lom peukawen

Beuthat beukana cut putroe ceudah  
Ulon goh lom glah hai puteh licen  
Jinoe hai adek deungo lon peugah  
Ulon peunikah gata nyang laen

Nyang putroe Indra kadroe seuleuah  
Nyang jinoepi bah cuda peukawen  
Nyang jihpi tatueng adoe meutuah  
Nyang lon peuleumahpi cit beutatem

Siti Geulima meunan peuneugah  
Di raja indah muka sang ceuken  
Ka teuduek tahe teuhah ngon babah  
Ate geulisah didalam dihen

Meung sikrak haba han jeuet lon peugah  
Seungkak ngon nafah lidah meuganceng  
Napsu lam ate neukeumeung bantah  
Geutakot salah meunyo han geutem

Kareuna cuda gantoe ma ngon yah  
Nyankeu jeuet susah po bintang canden  
Meunoepi irang meudehpi salah  
Yoh nyan le bagah pura-pura khem

Neupeukreueh su atepi gadoh susah  
Seuot le bagah po bungong husen  
Meunyo ka meunan cuda meutuah  
Ulon paban bah cit ka buet lazem

Akan teutapi lon lakee meuah  
Bek jeuet keu salah kon na peue laen  
Ulon meutanggoh cuda meutuah  
Lusa lon langkah lontuan kheun tem

Oh lheueh lon timang seunang ngon susah  
Cuda meutuah nyankeu beuidin  
Lhee uroe timpo keunoe lon langkah  
Ngon tulong Allah rabbal alamin

Meunyo ka meunan adoe meutuah  
Hana peue salah ka lon bri idin  
Ka putoh narit laju ka keumah  
Raja deelat syah laju ka neutren

Keudeh Lhab Mana sampoe le sudah  
Ka sajan zaujah cut putroe leunteng  
Ateueh keuta meuh neupiyoh payah  
Cut putroe ceudah duek digeunireng

Oh lheueh pajoh bu raja duli syah  
Ranub lam karah ka lheueh neusunteng  
Cut putroe suleueng laju le bagah  
Raja khalifah rumeh teukhem-khem

Keu putroe buleuen geusuleueng supah  
Duek poh beurakah manyo ngon meusyen  
Yoh nyan teumanyong cut bungong karah  
Cuda yue langkah peue na nyang ngeuren

Bak ulon teungku bacut neupeugah  
Peue na nyang susah lahe ngon baten  
Yoh nyan seuot le raja duli syah  
Deungo lon peugah hai puteh licen

Cuda geuheu lon keudeh yue langkah  
Ulon geupeugah keumaung peukawen  
Beuna taidin adek meutuah  
Cuda peunikah ulon ngon laen

Meunyo tan idin e bungong tupah  
Ulon paban bah hai puteh licen  
Baro troh ohnan raja neupeugah  
Cut putroe bagah ie mata meuleng-leng

Peuleumah reumeh beungeh bek leumah  
Cut putroe indah teuseuheh teukhem  
Saureuta jikheun meunoe ban ulah  
Kheundak bak Allah cit meunan lazem

Han jeuet ulon tham teungku meunikah  
Cit jroh seuleupah teungku meukawen

Peurintah cuda han jeuet tabantah  
Deesya bak Allah lahe ngon baten

Sebab ulon nyoepl tan paidah  
Umpama kuah ka leupah masen  
Umpama ija ragoe ka ubah  
Asoe ka beukah tacom beureusen

Bukon le sayang keumeuh keureutah  
Wareuna ubah ka troh seumusem  
Masa uroe jeh neutem seuleuah  
Jinoe neukeubah neumita laen

Bak pihak hana po ma ngon ayah  
Han lon peugah lahe ngon baten  
E cuda payong ulon paban bah  
Meusampoe leupah keunoe neupeutren

Lon neuseumadu laju le bagah  
Ngon lon goh ramah neumita laen  
Pie ngon guna hana le leumah  
Napsu ka puah lahe ngon baten

Jikoh ngon takue teungku ka reubah  
Ulon seuleuah puleh lom jitem  
Sijuek ulon top hugob ulon peuhah  
Oh watee susah lon peukhem-peukhem

Di Kubu Batee na asee jiawah  
Tajak han leupah Blang Sanagadeng  
Oh teungoh malam teungku neukheun grah  
Meung ie saboh na digeunireng

Di Gle Banggalang na kawan gajah  
Dicot Bu Kulah na rimieng kureng  
Bak meunoe-meunoe teungku meutuah  
Keudeh bak ayah ulon takirem

Raket bak pisang bak meudang galah  
Beuladeh ka leupah jeumeurang cut lem  
Rakaet ka neutiek tan le paedah  
Dalam ie ampah meutunggeng-tunggeng

Adat naseb lon meunankeu ulah  
Dak miseue gajah hana le gadeng  
Peureulee parang jampang ceumeucah  
Adat bupayah asahpi neutem

Peureulee keu lon yoh masa ceudah  
Adat ngon ayah muprangpi neutem  
Jinoe ka tuha tan le paedah  
Kulet ka ubah hana le licen

Bee ukheue reudeup oh neucom nafah  
Teuntee neuminah neuweh ho laen  
Peurawan tan le reule ka sudah  
Tekpi ka reubah tan le meulambong

Putik jambee ie talhab keu lincah  
Nyang hitam leubah jeh boh jambee kleng  
Bantai ngon kaso tan le paedah  
Bah le ulon plah tiree ngon tabeng

Teungku hana le neutren ka leupah  
Neuwoe bak zaujah peureumoh laen  
Neutinggai ulon sidroe lam susah  
Bak soe lon peugah napsu ngon baten

Oh lon tiek gaki keunong peuratah  
Teungku bak zaujah jadeh meukhem-khem  
Meunankeu putroe rampoe jipeugah  
Ie mata bobah ile meuleng-leng

Teuma neuseuot raja duli syah  
E putroe ceudah nyang puteh licen  
Meung pura-pura haba lon peugah  
Macam dum ulah ulon tariwang

Dilon meuwayang haba beurakah  
Di gata bagah ulon tarubeng  
Beuthat cuda bri laen nyang ceudah  
Maken get leupah keu gata lon syen

Di lon keu gata cinta han ubah  
Beuthat beuleumah nyang ceudah laen

Nibak pike lon adek meutuah  
Gata han susah oh lon meukawen

Meung ka na laen gata han payah  
Teuduek-duek dasyah keudroe teukhem-khem  
Keu geunantoe droe tayue peue mudah  
Taboh peurintah keu jih beukayem

Tayue taguen bu tayue seumeurah  
Ga ta han payah hai puteh licen  
Dak tabloe ija keu jih nyang murah  
Peue-peue nyang mudah get ija puplen

Bah hukum gata bandum peurintah  
Taniet tabloe sah hamba meuseuken  
Oh tajak jarak na soe na soe tijik taih  
Nyankeu lon peugah hai puteh licen

Nyankeu meukeusud judo meutuah  
E putroe ceudah harap beutatem  
Sabab ngon cuda han jeuet lon bantah  
Han jeuet lon ubah janji meupateng

Meunyo han lon tem cudapi marah  
Han jeuet lon ilah ngon cara laen  
Di Raja Jeumpa meunan neupeugah  
Maken meutatah putroe that gigeng

Meunyo ka meunan judo meutuah  
Junoe buba gah nyawong neupeulen  
Oh ka mate lon raja duli syah  
Teungku ka bebaih meukawen laen

Meunyo mantong lon teungku jeuet susah  
Le putroe ceudah teungku jirubeng  
Cut putroe meugleueng kurseueng nafakah  
Meuang saboh glah muweuek ho laen

Meunyo tan le lon ampon meutuah  
Napsu ka puah lahe ngon baten  
Han meulheueng malam cut putroe ceudah  
Ka seunang laupah jikubeng-kubeng

Meureudum Ratna meunan jipeugah  
Muka ka mirah po bungong husen  
Di Raja Jeumpa seuot le bagah  
Seureuta marah mukapi ceukan

Hai judo payong lon bek tamarah  
Meutamah-tamah taqob ngon leumbeng  
Ka lheueh lon saba dua lhee patah  
Bak pie leupah keu gata lon chen

Sabab lon cok gata lam susah  
Sideh bak ayah keunoe lon peutren  
Padumna nyawong dilon rab punah  
Bak lon seuleuah po puteh licen

Ate geupajoh geujeb ngon darah  
Ka geubeureukah geupoh meutunggeng  
Beuthat bumeanun judo meutuah  
Gata bek susah bah le ulon tren

Bah lon jak lam gle nak rimueng seupah  
Hai putroe ceudah gata bek gigeng  
Di Raja Jeumpa neubeudoh bagah  
Laju meukeumah po bitang canden

Neucok ngon peudeueng neulhat ngon siwah  
Dua lhee langkah raja ka neutren  
Yoh nyan jipeurab cut putroe ceudah  
Laju le bagah jimat bak keuieng

E deelat ampon lon neupeumeuh  
Narit ka salah tuto meudeungkeng  
Di Raja Jeumpa meulawan bagah  
Pura peureubah droe neupeutunggeng

Raja ka teukhem oh neweu ulah  
Neupa leng bagah muka ho laen  
Bak Putroe Ratna han neupeuleumah  
Raja peusiblah nak meudeueh baten

Di cut putroepi ka habeh ilah  
Teungku meutuah bek dilee tatren

Ulon bri idin raja duli syah  
Hana peue salah jeuet neumeukawen

Kareuna raja lon gaseh leupah  
Ulon paban bah po bungong canden  
Nibak tan teungku lon eu han leumah  
Jeuet neumeunikah neumita laen

Asai ulon nyos bak teungku keubah  
Asai nafakah beu teungku kirem  
Beuthat meukarang ulon paban bah  
Asa i bek leupah teungku ho laen

Cut Putroe Ratna meunan jipeugah  
Teuduek le bagah po bintang canden  
Seureuta putroe sambinoe ceudah  
Yoh nyan le bagah jiduek geunireng

Laju meusabda raja duli syah  
Meunoe neupeugah po bungong husen  
Meunyo ka idin judo meutuah  
Idin lon langkah bak bak cuda lon tren

Idin tuanku hana peue salah  
Jinoe neulangkah bagah teungku ben  
Idinpi ka lheueh bak putroe ceudah  
Laju deelat syah yoh nyan ka neutren

Neupasang guda sigra le bagah  
Jiplueng that tangkah guda seunalen  
Cut putroe tahe bak pinto susah  
Ie mate bobah laju ka jitren

Bukon le sayang awan ka mirah  
Siat ka ubah wareuna laen  
Bukon le sayang raja duli syah  
Siat ka leupah teungku ka neutren

Peuturot haba cuda peurintah  
Raja khalifah neuyeu meukawen  
Ulon nyoe sidroe peuekeu na salah  
Nyankeu jeuet balah meunoe ban ladem

Bukon le sayang kalam ka patah  
Beusot keureutah daweuet han jitren  
Teungku lon gasih get that lon papah  
Han tom lon bantah meung sigo musem

Watee teungku eh lon urot ramah  
Oh watee basah ija lon salen  
Oh watee hugob lon pot ngon kipah  
Teungku bek leupah neujak ho laen

Bak masa jinoe meunoe ban ulah  
Rugoe peunayah lon peuek peutren  
Cut putroe jimoë ie mata zaujah  
Sabab ka leupah po raja canden

Maken ka jeuoh hana le leumah  
Maken that susah cut putroe leunteng  
Bah teuduek haba putroe nyang susah  
Raja duli syah jinoe taireng

Kuta Blang Seupeueng tamong ka leupah  
Raja khalifah cong gudea neutren  
Dalam astana neukek le bagah  
Laju neuseumah cuda ngon culem

Oh ka lheueh piyoh raja duli syah  
Hidang le bagah deundayang peutren  
Oh lheueh pajoh bu dumpeue ka sudah  
Cuda le bagah duek digeunireng

Wahe adek lon po bungong tupah  
Janji ka leupah pakri ban mungken  
Po Raja Jeumpa seuot le bagah  
Hana lon ubah meung ube leubeng

Lon tuan ikot cuda peurintah  
Jinoe le bagah meunikah laen  
Siti Geulima seunang seuleupah  
Turon le titah po bungong lapeng

Bak wazi meuntroe sidroe nyang gagah  
Putroe peurintah jak teung cut linteng

Jiyue tueng putroe keunoe beubagah  
Cit ka geukeubah peuet droe nyang canden

Wazi jijak le hingga troh langkah  
Laju jipeugah titah cut linteng  
Tuan putroe peuet yoh nyan meukeumah  
Jiboh ngon simplah boh anteng-anteng

Hase peukayan nyang sangat indah  
Yoh nyan meulangkah laju ka jitren  
Jibuka payong ayon ngon langkah  
Aleh jitingkah na miseue gaseng

Takalon jijak naleueng han bicah  
Su gleueng dua blah ka keutang keuteng  
Barangsoe kalon tijoh ie babah  
Lom ceudah-ceudah deundayang ireng

Dalam astana hingga ka leupah  
Jipiyoh payah cut putroe linteng  
Siti Geulima peujamee bagah  
Geujok ngon kipah geuleueng ngon tabeng

Geubot ngon ie geubri juadah  
Meunurut ulah cut putroe linteng  
Di Raja Jeumpa meuson le bagah  
Hanakeu leumah po bintang canden

Jeh putroe peuet droe laju seumeugah  
Cut banta ceudah keunan keureuleng  
Cuda tanyong bak raja duli syah  
Ban peuet droe nyan sah nyang toh nyang tatem

Di Raja Jeumpa seuot le bagah  
Ban peuet tan ceudah payah that lon tem  
Pakonkeu meunan adoe meutuah  
Tacuba peugah pat toh nyang mireng

Ban peuet putroe nyan bak lon na salah  
Deungo lon peugah nyan maseng-maseng  
Buhu lon ba lek titek lon ubak  
Mangat roh harah watee lon salen

Meubanja-banja bungong sitahon  
Meususon-suson bungong keureutah  
Di Raja Jeumpa po puteh ie mbon  
Bak cuda payong yoh nyan neupeugah

Nyang saboh paleh musang teureujon  
Muka sabe con sang-sang na susah  
Oh jieulakoe bagoe na racon  
Narit meusigong sabe lam marah

Keudue paleh ceurape lho mbon  
Agampi jitren dijihpi leupah  
Diinong bisoe laloe meurawon  
Agam jeuap gampong mita nafakah

Nyang keulhee paleh nyan amak ayon  
Pade lam krong siat ka keumah  
Bacut tan himat di inong busong  
Hareute jitren miseue geupinah

Nyang keupeuet paleh tikoh lam umpueng  
Inong cue makeuen nyang brok seuleupah  
Cue atra lakoe puwoe keu aduen  
Sabe tiep buleuen ka jipeusiblah

Nyankeu hai cuda haba ulon kheun  
Masen ngon keueueng ka lheueh lon peugah  
Siti Geulima ka tahe hireuen  
Teuduek teujunun ate ka susah

Sipatah haba han jan le neukheun  
Han jeuet neudabeueng ban adoe peugah  
Meunyo ka han jeuet hai adoe buleuen  
Ka hana bulueng bagi ngon tuah

Meunyokeu meunan hai cuda neukheun  
Idin keu ulon jinoe bubagah  
Idin lon jak woe keudeh u mideuen  
Cut putroe meugleueng kadang na susah

Masa ulon tren keunos Blang Seupeueng  
Jidong bak rinyeun ie mata bobah

Di Raja Jeumpa meunang ka neukhen  
Bak cuda buleuen idin le bagah

Raja Jeumpa tren rinyeun meulheueng-lheueng  
Ka sampoe uleuen po buleuen peuet blah  
U ateueh guda sigra neutimpeueng  
Guda ka jiplueng laju le bagah

Keudeh Lhab Mana ka sampoe meukheung  
Neukek le mameueng laju bak zeejah  
Dalam meuligoe putroe teujunun  
Ile mata jron jeureuen ile meulimpah

Cut putroe tahe teuduek tumpang keueng  
Ingar keu aduen bunoe ka leupah  
Oh ban jikalon ka na bak rinyeun  
Jibeudoh meucreung laju jak seumah

Oh lheueh jiseumah cut putroe buleuen  
Cut banta mameueng peuek le leupah  
Peiduek bak tahta cahya meuseun breun  
Jiduek lam leumueng cut putroe indah

Cut Putroe Ratna teukhem teusinyom  
Tanyong bak aduen haba sipatah  
Pajan keurija nyang ka lheueh geukheun  
Le cuda buleuen nyang ka geupeugah

Pajan phon gaca cut putroe meugleueng  
Rakyat u mideuen pajan phon geukrah  
Di Raja Jeumpapi ka teusinyom  
Bek le that peue kheun hai buleuen peuet blah

Hana jadeh le kande meugantung  
Saboh han jeuet tueng siputroe ceudah  
Meung han jeuet keu ngon gata dek buleuen  
Peurangui bajeueng inong kreueh babah

Seb gata sidroe hai adoe meugleueng  
Sapeue tan kureueng hat pat weuek tamah  
Oh ban putroe ngo meunan raja kheun  
Teukhem teusinyom cut putroe indah

Seunang ngon ate hana le seuum  
Teutap lam mideuen meugaseh leupah  
Deundayang khadam diwie ngon uneuen  
Bacut tan kureueng siat tan susah

Cukop ngon tandra jaga di mideuen  
Bacut tan kureueng deungon peukasa  
Seungab jeureukha hana le beuneueng  
Deungo ulon kheun nyoe laen kisah

Ammabakdu laju lon surat  
Muwoe riwayat keu Raja Muda  
Nibak siuroe raja beudeelat  
Neutanyong leugat bak nujum ban na

Bak aneuk meuseukin raja neusasat  
Pakri muslihat wahe aneukda  
Kareuna ulon junoe malee that  
Hana lon sarap meunoe nyan rupa

Aneuk lon jicok jirampah leugat  
Get that jiharap kendroe jih teuga  
Jithee droe useueng peudeueng tajam that  
Ulonjisarap hana teunaga

Sinyak manyak cut jiseuot leugat  
Cit ka patot that gob nyan po jeumba  
Nyan Raja Jeumpa cit kha ngon kuat  
Han ek takarat adat tangaza

Geutanyoe talo mate ngon rakyat  
Tuah raya that nyan raja Jeumpa  
Miseue dak taprang tanyoe meularat  
Oh akhe meuhat seubot aneukda

Si nujum budak meunan riwayat  
Maken suum that ate di raja  
Beuthat beumate meugule lam jeurat  
Nyang jih nyan meuhat bah le lon ngaza

Han patot sagai akai jeuheut that  
Aneuk lon meuhat keu peue jijak ba

Han ek kutheun le ate seuum that  
Malee bak rakyat rugoe keu raja

Malee bak hukom sirong bak adat  
Gaduh martabat nan nanggroe Indra  
Meung hana kuprang laju kukarat  
Malee raya that ban sigom donya

Dak mate aneuk na taeu ngon jeurat  
Meung gaduh adat han pat tamita  
Meunankeu sabda raja beudeelat  
Seuot le leugat si nujum ban na

Ampon tuanku raja beupangkat  
Cit ka patot that jih nyan tangaza  
Bukon ulon tham hai raja deelat  
Ulon bri ingat rugoe ngon laba

Hana jan habeh budak riwayat  
Di raja leugat neuhei peudana  
Peudana meuntroe sampoe le leugat  
Meusabda meuhat tuanku raja

Tabeudoh laju tajak krah rakyat  
Timu ngon barat beuhabeh teuka  
Deungon pahlawan bandum beusiap  
Beucukop leungkap wazi panglima

Oh lheueh peurintah meuntroe beurangkat  
Timu ngon barat ka jiseuranta  
Mideuen ka peunoh kuta ka sarat  
Ka jitren rakyat balatandra

Cukop ngon beude hase dum alat  
Bandum ka siap leungkap seudia  
Jipeukek seumah keu raja deelat  
Jarroe jiangkat atueh jeumala

Ampon ampon tuanku raja beupangkat  
Peue na meularat neupangge hamba  
Toh sisri nanggroe nyang ka meusungkap  
Laot ngon darat pat wase hana

Di Raja Muda neuseuot leugat  
Nyang ulon harap bandum bak gata  
Tapeungon ulon le gata siat  
Lon meung beurangkat u nanggroe Jeumpa

Lon kheundak jak prang siraja jeungkat  
Seunambong hayat dilon ka jiba  
Kujak cok pulang jinoe beuleugat  
Tapeungon siat wahe seedara

Tacok mayet lon tatiek lam jeurat  
Nak bek jiupat le ureueng donya  
Dak han tapuwoe beutroh u teumpat  
Tulong tiek siat lam mon tuha

Seuot pahlawan yoh nyan le leugat  
Ampon meuharap wahe meukuta  
Han peue tuanku keudeh beurangkat  
Na kamoe rakyat jak prang Jeumpa

Di raja duli neuduek bak teumpat  
Bah kamoe hambat nyan Raja Jeumpa  
Cut Putroe Ratna lon puwoe leugat  
Keupeue mehmoh that di po meukuta

Meunankeu narik nibak dum rakyat  
Neujawueub leugat lom Raja Muda  
Meunyo ka meunan kaman bek lambat  
Bah tabeurangkat jinoe beusigra

Hingga meuhase sare dum leungkap  
Cukop ngon alat meuriam lila  
Bandum pahlawan nyang hibat-hibat  
Rata dum jimat cokma raya

Di uleebalangpi saboh babat  
Meupangkat-pangkat meujeumba-jeumba  
Saboh pasukan wazi ngon rakyat  
Laju beurangkat u nanggroe Jeumpa

Di Raja Muda nyang leupah hibat  
Neungui dum alat peukayan raja

Siwah meutampok bak keuieng neulhat  
Bak jaroe neumat peudeueng suasa

U ateueh gajah meukandran leugat  
Nyang ireng deelat di ateueh guda  
Padum treb lawet raja beurangkat  
Ka troh bak teumpat nyan laot tawa

Neupiyoh keunan meung na sikeujab  
Duek istirahat dum balatandra  
Oh puleh payah laju beurangkat  
Ka neupeuteupat lam rimba raya

U Darul Aman keunan troh leugat  
Ngon sidroe rakyat meuhadap muka  
Jieu angkatan cukop that hibat  
Jitanyong leugat meunoe meuhaba

Hai uleebalang rakan ngon sahbat  
Ho neubeurangkat rakyat dum neuba  
Lon eu angkatan garang ngon hibat  
Lon kalon alat meulaksin laksa

Seuot le meupeung ureueng beurangkat  
Pakon cabak that babah di gata  
Kamoe teungoh jak keupeue tasasat  
Kamoe beurangkat meujak prang Jeumpa

Meung na roh wali deungon keurabat  
Tajak woe leugat tapeukong kuta  
Ureueng teumanyong jijawueub leugat  
Kamoe hai sahbat ta n roh seedara

Bandua pihak haba ka seungab  
Laju beurangkat angkatan dumna  
Di bujang bunoe jiplueng le leugat  
Laju teudhab-dhab u dalam kuta

Oh troh bak meuntroe jaroe jiangkat  
Jipeugah leugat meunurut haba  
Hai teungku meuntroe bunoe lon lihat  
Angkatan le that jijak prang Jeumpa

Ayahanda putroe ka geubeurangkat  
Geuba ngon rakyat di nanggroe Indra  
Ban meuntroe deungo meunan riwayat  
Geukrah le rakyat keunan lam kuta

Hingga ka datang keunan meusapat  
Mideuen ka sarat meuntroe panglima  
Wazi **bintara** sukee meupakat  
Pahlawan le that dum teuga-teuga

Di meuntroe Buman yoh nyan kheun leugat  
Pakri ban pakat wahe seedara  
Jeh Raja Muda ka troh beurangkat  
Geuba ngon rakyat geujak prang Jeumpa

Peue meutatulong peugah beuteupat  
Pakri ban mangat pike bak gata  
Sidroe panglima seuot le leugat  
Bak kamoe deelat tan dua haba

Nyan nanggroe Jeumpa barangsoe gogat  
Cit ka putoh that tabantu sigra  
Nyan Raja Bujang po makam teumpat  
Mantong tadeelat le tanyoe dumna

Meuhan tatulong bandum rugoe that  
Teusia meuhat dumna panglima  
Rugoe geugaji geubri ngon pangkat  
Ek tatem lihat oh jipoh raja

Meunannkeu ragam macam jijaweuen  
Meukeumah leugat siap seudia  
Geucok ngon kandran geupeudieng leugat  
Laju beurangkat u nanggroe Jeumpa

Nyan meuntroe Buman nyang leupah cakap  
Geupimpin rakyat dum balatandra  
Hingga le sampoe ka toe bak teumpat  
Geupiyoh meuhat rab bineh rimba

Geupeugot kimah bandum ka siap  
Ka cukop leungkap dum jaga-jaga

Geupeudeuk beuban simpan ngon alat  
Dum istirahat meuntroe panglima

Le Raja Muda han deuh geulihat  
Kareuna teumpat padok ngon rimba  
Di Raja Muda laju beurangkat  
Hingga sampoe rab ngon bineh kuta

Kuta Blang Seupeueng Ka deuh geulihat  
Meupiyoh leugat dum balatandra  
Piyoh dum sinan geupeugot teumpat  
Kuta ka siap di Raja Muda

Cukop ngon jaga rata jeuep teumpat  
Timu ngon barat dalam ngon luar  
Malam ngon uroe sampoe le leugat  
Geupeudeuk pakat didalam kuta

Raja Muda kheun yoh nyan le meuhat  
Pakri ban mangat wahe panglima  
Atawa dilee takirem surat  
Bah tayue intat cut Putroe Ratna

Meuntroe seuot le jaroe jiangkat  
Cit'meunan mangat hai po meukuta  
Hingga seuleusoe geupeugot surat  
Beungoh le leugat jiteubiet faja

Sidroe antosan laju geuheu le leugat  
Geuyue jak intat surat keu raja  
Yoh nyan antosan laju beurangkat  
Jicok ngon surat jiek cong guda

Bak pinto kuta sampoe le leugat  
Jaroe jiangkat bak ureueng jaga  
Idin lon tamong u dalam siat  
Lon jak jok surat keu poteu raja

Nyang jaga pinto tanyong le leugat  
Panekeu teumpat keunoe tateuka  
Di nanggroe Indra kamoe beurangkat  
Raja beupangkat nan Raja Muda

Jibuka pinto teuma le leugat  
Laju jipeurab keunan bak raja  
Jibri horeumat jaroe jiangkat  
Meujeulih adat jihadap raja

Peubeudoh ulee jijok le surat  
Le raja deelat neusambot sigra  
Laju bak meuntroe raja jok leugat  
Raja yue lihat peue na beurita

Meunoe phon mula haba lam surat  
Deungon horeumat sangat mulia  
Beusama ini kamoe meuharap  
Tapulang leugat cut putroe muda

Di nanggroe Indra keunoe beurangkat  
Cukop ngon rakyat alat seunjata  
Meunyo kapulang ngon cara mangat  
Keunoe taintat singoh beusigra

Meuhan tapulang taingat beuthat  
Kupoh ngon rakyat kuprang ngon kuta  
Oh nankeu haba didalam surat  
Tanda tangan cap bak Raja Muda

Habeh seueleusoe meuntroe beuet surat  
Di raja deelat ka mirah muka  
Di Raja Bujang beungehne that-that  
Haba lam surat peudeh ngon gasa

Di keue antosan neupriek-priek surat  
Seureuta meuhat neubuka haba  
Beudoh tajak woe laju beuleugat  
Takheun beuteupat keudeh baj raja

Ngon ujung peudeueng putroe kuintat  
Nak kueu kuat nyan Raja Muda  
Meunyo keu putroe bek le kaharap  
Nyan judo meuhat po Raja Jeumpa

Raja Bujang kheun meunan ka teupat  
Jiteubiet leugat antosan gisa

Oh troh jigisa bak raja deelat  
Jisujud leugat jiseumah raja

Ampon tuanku hanpeue tahrap  
Han geutem intat cut putroe muda  
Bak ujung peudeueng ka geukheun teupat  
Nak ngeuthee kuat nyan Raja Muda

Di Raja Muda yoh nyan beungeh that  
Neuseuot leugat meunoe meusabda  
Meunyo ka meunan singoh beurangkat  
Bah le beuleugat nyang prang tangaza

Meunankeu sunggoh ka putoh pakat  
Ka geucok sikap geujak prang kuta  
Malampi jula laju le meuhat  
Bah teiduek siat keu RajaMuda

Keu Raja Bujang meuwoe riwayat  
Geupeudeuk pakat meuntroe panglima  
Blah Raja Jeumpa haba geuintat  
Antosan meuhat beurangkat sigra

Keudeh Lhab Mana sampoe le leugat  
Laju jipeurab bak Raja Jeumpa  
Sujud ngon seumah jibri horeumat  
Jipeugah leugat meunoe meuhaba

Ampon tuanku po raja deelat  
Angkatan le that keunoe ka teuka  
Ayah cut putroe e keunoe beurangkat  
Kareuna hajat jak tueng aneukda

Meuhan tapulang ngon cara mangatt  
Lusa nyan meuhat jiprang lam kuta  
Meunankeu haba lan tuan intat  
Surohan deelat raja kakanda

Diraja Jeumpa seuot le leugat  
Pakri ban pakat nibak kakanda  
Ubak cut abang lon plulang meuhat  
Bak ulon teupat lon ikot saja

Meunyo cut abang hana le hayat  
Baro ulon mat tampok kuasa  
Meunan di Raja haba ka teupat  
Jaweueb le leugat antosan teuka

Di Raja Bujang ka putoh pakat  
Geulawan meuhat nyan Raja Muda  
Ohnoekue haba nyang ka lon intat  
Akan meundapat maklum bak raja

Patoh ngon narit haba ka teupat  
Jaroe geumumat antosan gisa  
Leupah antosan pulang u teumpat  
Meuwoe riwayat keu Raja Jeumpa

Waleepun bunoe haba sang brok that  
Bak dali adat sang han geungaza  
Teutapi jinoe laju beusias  
Neukrah ngon rakyat kata Lhab Mana

Teuka le ureueng mideuen ka seurat  
Cukop ngon alat siap seudia  
Cukop ngon beude hase ngon ubat  
Pahlawan kuat dum teuga-teuga

Meuntroe panglima bintara rakyat  
Bandum meusapat keunan lam kuta  
Di Raja Jeumpa meusabda leugat  
Wahe dum rakyat meuntroe pangliama

Ayah cut putroe keunoe beurangkat  
Gob nyan meuhajat jak tueng aneukda  
Geutanyoe geuprang ulon geuikat  
Pakri ban pakat meuhat bak gata

Seuot lam kawan yoh nyan le leugat  
Kamoe nyoe meuhat siap seudia  
Waleepun mate hana le hayat  
Cut putroe ubat bek geueu rupa

Bah kamoe ampeueng ngon peudeueng teupat  
Di ampon duli neuiem droe saja

Bahle buet kamoe meuntroe ngon rakyat  
Bah kamoe hambat nyan Raja Muda

Jilakee idin keumeing beurangkat  
Seuot le leugat nyan Raja Jeumpa  
Piyoh geutanyoe disinoe siat  
Bahle talihat nyan buet kakanda

Bah di Blang Seupeueng dilee geukarat  
Meung ka meularat tabantu sigra  
Po Raja Jeumpa meunan bri ingat  
Ohnoe ka seungab nyang di Lhab Mana

Nyang di Blang Seupeueng lon kheun lom meuhat  
Bandum ka siap alat seunjata  
Beude meuriam tunam ngon nubat  
Maseng bak tempat ka lheueh seudia

Nibak malam nyan disinan teutap  
Sigala rakyat didalam kuta  
Geupreh-preh pajan lawan beurangkat  
Hingga le leugat malam ka jula

Siblah ret timu na bintang takat  
Siblah ret barat na bintang kala  
Jikukuek manok na saboh sapat  
Kutika ka rab jiteubiet faja

Hana lom peungeuh mantong seupot glap  
Rata jeuep teumpat ureueng goh jaga  
Cicem goh jipo mantong that seungab  
Teungoh that mangat teungeut dum indra

Kutika angen jitren meuhab-hab  
Kutika mangat taeh seuninya  
Kutika laot ribot ngon bakat  
Kutika kilat oh watee faja

Nibak masa nyam deungo lon surat  
Peurintah leugat di Raja Muda  
Bak meuntroe Sarah neupeugah leugat  
Ka jeuet peusiap alat seunjata

Taato bareh beuhabeh leungkap  
Taato rakyat deungon panglima  
Di meuntroe Sarah tugaah beurangkat  
Suroh bak deelat nyan Raja Muda

Gob nyan pimpin prang uroe nyan meuhat  
Geubri ngon rakyat na dua laksa  
Jipeh deungon gong nafiri ngon dhab  
Teubiet le leuet dalam blang raya  
Jiek le laju na miseue lalat  
Nyang na na pangkat dum atueh guda  
Tango jisurak gunjak ngon hibat  
Na miseue kilat lam laot raya

Di Raja Bujang neuthee le leugat  
Kareuna ka rab dum ureueng teuka  
Neubri peurintah bagah le meuhat  
Yue teubiet leugat dumna panglima

Hase ngon beude sare ngon alat  
Yoh nyan beurangkat meuntroe panglima  
Deungon pahlawan sajan ngon rakyat  
Sampoe le leugat bak blang nyang raya

Geupeh deungon gong geusambong ngon dhab  
Tanda alamat jadeh prang raya  
Retdehpi jipreh retnoe jikarat  
Yoh nyan meuhadap bandue tandra

Meutum ngon beude meuble ngon kilat  
Jiteubiet asap meubura-bura  
Phon-phon jipeulheueh meuriham nubat  
Takalon le that aneuk keulua

Retdeh geutimbak retnoe geutakat  
Takalon rakyat mate meutimpa  
Hingga geupeuek laju keunan rab  
Yoh nyan mumat-mat laju muwa-wa

Suara peudeueng na ban su bakat  
Jibeudoh kilat meuk dum keulua

Ladom deungon kreh jiureh leugat  
Ladom nyang kuat seumeuen cokma

Ladom nyang beuhe jitajo leugat  
Hana jiingat nyawong keulua  
Nyang keuba-keubai get that jikarat  
Nyang jeungkat-jeungkat meuseunoh teuga

Soe-soe nyang talo sinan ka teupat  
Ka habeh hayat ka hilang nyawa  
Han jeuet takalon dum mate rakyat  
Han ek tahi sab meuhat ngon hingga

Bandua pihak na miseue kilat  
Teueh dum teupat dalam blang raya  
Darah dum ile bek le na ingat  
Umpama meuhat hujeuen keunong sa

Uroepi ka trang poh lapan ka rab  
Meuprang meukarat ba ndua tandra  
Retdehpi useueng retnoepi cakap  
Sabe martabat goh lom na bida

Bungong rawatu meulu bee mangat  
Teungoh lon mat-mat ka angen puba  
Keu meuntroe Buman ulon riwayat  
Geuteupeue meuhat jadeh prang raya

Deungon angkatan bandum ka leungkap  
Laju beurangkat lam sap prang raya  
Di ateueh kandran dum hibat-hibat  
Hingga le meuhat keunan sampoe ka

Geupleh ngon tambo geuyub hareubab  
Geupleh deungon dhab kiam ngon subra  
Di Raja Muda sangka geusarap  
Ureueng nyan meuhat waham seedara

Blah Raja Muda yoh nyan galak that  
Maken geukarat laju geungaza

Di meuntroe Buman yoh nyan le leugat  
Geutarek meuhat nyan alam raja

Nan Raja Bujang nyang po alamat  
Yoh nyan meugriet that blah Raja Muda  
Di meuntroe Buman keunan ka geukrap  
Sangat that hibat deungon peukasa

Di ateueh gajah meukandran leugat  
Nyang laen rakyat di ateueh guda  
Ngon ureueng musoh laju meuhadap  
Yoh nyan le leugat jadéh prang raya

Deungon pahlawan dum kuat-kuat  
Ka geupoh rakyat blah raja muda  
Di ureueng Jeumpa geumbira that  
Nyan ka troh sahbat nyang that seutia

Retdeh ngon retnoe yoh nyan geukarat  
Laju geuhadap bak Raja Muda  
Musoh di teungoh yoh nyan ka arat  
Ureueng po teumpat ban siseun lingka

Han jeuet tapike mate dum rakyat  
Maken geukarat di ureueng Jeumpa  
Yoh nyan blah musoh sunggoh meularat  
Kareuna le that ka mate dum tandra

Teumajisurot teumakot jitbat  
Laju le leugat tamong lam kuta  
Di Raja Muda yoh nyan geulihat  
Hana le rakyat dalam blang raya

Neukab ngon gigoe beungeh neuthat-that  
Neureugam leugat peudeueng nyang raya  
U ateueh gajah bagah neulumpat  
Seureuta meuhat dumna panglima

Nyang goh lom muprang meung saboh saat  
Watee nyoe meuhat geumasok aza  
Teuma pahlawan nyang kuat-kuat  
Geudeking deelat nyan Raja Muda

U dalam sap prang laju beurangkat  
Geutarek meuhat nyan alam raja  
Geupeh deungon gong surak kuyak that  
Sigala rakyat yoh nyan lom gisa

Nyang ka plueng bunoe jigisa leugat  
Kareuna deelat ka geujak ngaza  
Nibak masa nyan muprang gunjak that  
Timu ngon barat meupuseng gisa

Keudehpi mate keudehpi ranap  
Hana teuhisap rakyat nyang pana  
Uroe teungoh trang rasa sang geulap  
Jibeudoh asap bak jipleung guda

Jipo meuk peudeueng seumeureueng kilat  
Tadeungo ratab nyang luka-luka  
Di meuntroe Buman yoh nyan meuhadap  
Teumanyong leugat le raja muda

Meusoe geuheu nan gata hai sahbat  
Meung patkeu teumpat tamat kuasa  
Putik pisang tong jantong pisang klat  
Pakon beungeh that nan Raja Muda

Di nangroe indra keurajeuen teumpat  
Ulon meuhajat nyang cok aneukda  
Lom meuntroe Buman geuseuot leugat  
Geutanyoe meuhat bukon blah raja

Lon deungo tuto teukabo that-that  
Akaiteu jeungkat bicara hana  
Ohban tadeungo meunan le deelat  
Laju neulumpat nyan Raja Muda

Neusuet ngon peudeueng meuering tajam that  
Ka neutak leugat nyan meuntroe sigra  
Keunong pha gajah siblah meutat-tat  
Meuntroe kheun leugat yoh nyan bak raja

Deungon binatang gata beuhe that  
Ngon jih tan seubab tajak meuseunda

Di meuntroe Buman yoh nyan geulumpat  
Neutren le leugat cong gajah raya

Di Raja Muda maken meukarat  
Meuntroe nyan meuhat neutak le sigra  
Di meuntroe Buman neutheun-theun meuhat  
Bacut tan seumpat neubalah raja

Di Raja Muda neutak neukarat  
Beungeh neuthat di Raja Muda  
Di meuntroe Buman neutheun-theun meuhat  
Tajam geulumpat peusiblah nyawa

Di raja ka hek malee neuthat-that  
Meuntroe that cakap neukilah saja  
Po meuntroe Buman geukheun le leugat  
Bek that takarat payahteu nyang na

Han troh ban napsu han peue tahaрап  
Tajak woe leugat yoh goh binasa  
Raja ngon meuntroe sabe that pangkat  
Keunoe han silab keudeh han ceudra

Ureueng nyan dua ohnan ka teutap  
Teungoh that hibat hadu teunaga  
Nyang saboh pihak teuma di rakyat  
Maken jikarat dumna panglima

Dalam blang luah leupah that hibat  
Sabe martabat timang that padra  
Teutap haba nyan disinan siat  
Muwoe riwayat kuta Lhab Mana

Han ek le saba sigala rakyat  
Jila kee leugat idin bak raja  
Kareuna hal prang sang-sang meukarat  
Ka troh ohnoe hat goh lom na reuda

Idin nyan keukamoe jinoe beurangkat  
Tamong lam jihat ngon Raja Muda  
Meunankeu narit sigala rakyat  
Neuseuot leugat nyan Raja Jeumpa

Wahe seedara tasaba siat  
Ulon jak peurab bak putroe muda  
Dalam meuligoe neukek le leugat  
Bak pira k lipat Meureudum Ratna

Idin hai judo kamoe beurangkat  
Prang ka meukarat kamoe jak ngaza  
Ban putroe deungo meunan riwayat  
Ile meudrab-drab deungon ie mata

Alah hai teungku lontoan harap  
Neusayang beuthat keu lon nyang hina  
Meubek tuanku tunu neuthat-that  
Neusaba siat e po meukuta

Neukeumeung jak poh ayah lon meuhat  
Nyankeu meugriet that neukeumeung ngaza  
Dua boh nanggroe nyang ka na rakyat  
Laen neukarat jinoe keumeung ba

Di Darul Aman keunoepi meuhat  
Dum kuat-kuat geuba panglima  
Nyang di Blang Seupeueng ureueng kha-kha that  
Neukrah lom rakyat kuta Lhab Mana

Ayah ulon nyoe cit sidroe meuhat  
Neukeumeung hambat ngon habeh nyawa  
Meunan cut putroe yoh nyan riwayat  
Sira meuratab jisro ie mata

Meunyo ka meunan hai ampon deelat  
Mangat sapat jeurat deungon ayahanda  
Neukoh takue lon jinoe beuleugat  
Meusampoe that-that lon ureueng neuba

Bak pihak hana kaum keurabat  
Rakan ngon sahbat disinoe hana  
Dak mate kamoe disinoe teupat  
Hana soe lihat e po meukuta

Di sinyak putroe jimoemaken brat  
Jicruep le leugat bak gaki raja

Di Raja Jeumpa neukheun le leugat  
Keu peue riyoh that hai ayeuem mata

Meunyo na sayang keu ayah meuhat  
Jinoe beuleugat beudoh jak publa  
Meuhan geumeugot jaroe geumumat  
Hana peue harap gob nyan binasa

Meunan meusabda bak raja deelat  
Meukeumah leugat cut Putroe Ratna  
Puerumoh meuntroe peurumoh rakyat  
Mepnangkat-pangkat dum muda-muda

Deungon deundayang sajan beurangkat  
Ceudah-ceudah that dum aneuk dara  
Na limong ploh droe binoe meusapat  
Laju beurangkat dalam blang raya

Di atueh kandran dum hibat-hibat  
Bak jaroe jimat saboh beundera  
Alam nyang puteh jitarek leugat  
Tanda alamat meudame raja

Dilikot putroe samlakoe deelat  
Seureuta rakyat meuntroe panglima  
U dalam sap prang sampoe ka meuhat  
Bandum ka seungab lagee geupula

Bandua pihak ka piyoh siat  
Sabab geulihat cut putroe muda  
Ngon alam puteh bak jaroe geummat  
Keunan geupeura b laju lam tandra

Retnoe ngon retdeh beude ka seungab  
Cut putroe leugat jak eu ayahanda  
Deungon rakan droe putroe jiintat  
Meukandran meuhat dum rata-rata

Di Raja Muda deuh le geulihat  
Peudeueng nyang geummat sret le ngon sigra  
Di meuntroe Buman meunan cit meuhat  
Sabab geulihat nyan putroe muda

Ubak ayah droe putroe le peurab  
Geusujud leugat deungon ie mata  
Bak gaki ayah sujud khideumat  
Taeu meudrab-drab tijoh ie mata

Meuah deesya lon hai ayah deelat  
Salah raja that deungon ayahanda  
Meuhan na ampon ulon nyoe meuhat  
Neupoh beumate nak mate pana

Neupoh beumate neuseubee lam jeurat  
Bek le teuringat singoh ngon lusa  
Cut putroe jimoe laju maken that  
Seuot le leugat nyan Raja Muda

Ka kupeuampon hai bungong riwat  
Bek le riyoh that hai bijeh mata  
Teuma lom jikheun le putroe ubat  
Jaroe neumumat deungon aneukda

Jeh Raja Jeumpa Keumala hikeumat  
Gob nyanpi hajat jak meuah deesya  
Neutem hai ayah jaroe neumumat  
Mangat seulamat tanyoe lam banya  
Hana peue salah hai bungong riwat  
Yue keunoe peurab laju beusigra  
Di meuntroe Buman yoh nyan beurangkat  
Geujak tueng deelat nyan Raja Jeumpa

Hingga troh sampoe meuntroe jak intat  
Jaroe geumumat laju bändua  
Oh lheueh ngon raja teuma ngon rakyat  
Bandum le peurab meuntroe panglima

Oh ka lheueh meuah geumeudeuk sapat  
Putroe cut ubat dayang ngon raja  
Di Raja Bujang teubiet leugat  
Neueu ka seungab nyan prang ka reuda

Laju dalam blang ka neupeuteupat  
Leumah neulihat nyan Raja Jeumpa

Deungon judo droe sinan meusapat  
Seureuta meuhat deundayang dumna

Di Raja Bujang ka tahe neuthat  
Saleh peue sabab roh dara-dara  
Di Raja Muda neubeudoh leugat  
Tajo neupeurab neupumulia

Retdeh geusujud retnoe khideumat  
Geubri horeumat ngon sabe raja  
Oh lheueh mat jaroe bandua deelat  
Geupiyoh leugat duek peugah haba

Sinan dalam blang bandum meusapat  
Muprang ka seunag sabab dame ka  
Hujeuen ka teudoh rudok ngon kilat  
Leumah ret barat uroe cuaca

Muprang hana le beude ka seungab  
Jaroe geumumat seobot aneukda  
Keu Raja Muda muwoe riwayat  
Neukheun le leugat bak Raja Jeumpa

Jinoe hai aneuk ayahaha harap  
Tajak woe siat u nanggroe indra  
Seuot le rijang po bintang takat  
Mulia sangat narit ayahaha

Bak kamoei hai ayah nyang rab  
Keunoe bak teumpat kut Lhab Mana  
Tapiyoh sinoe dilee sikeujab  
Taistirahat meung sikutika

Meunyo na umu mubri hadarat  
Jeuet tabeurangkat u nanggroe Indra  
Di Raja Muda seuot le leugat  
Meukruseumangat wahe aneukda

Oh lheueh nibak nyan laju beurangkat  
Seureuta rakyat han ek takira  
Sinyak cut putroe dilee beurangkat  
Jak peugot teumpat dalam astana

Oh lheueh nyan meuntroe seureuta rakyat  
Oh lheueh nyan deelat ban lhee droe raja  
Hingga lam kuta keudeh meusapat  
Piyoh bak teumpat meunurut kada

Geusie ngon keubeue leumo lom meuhat  
Peujamee leugat ban Raja Muda  
Ngon meuntroe Buman sinan meusapat  
Seureuta rakyat deungon panglima

Geubeuot kanduri ban laku adat  
Hingga ka siap bandum sineuna  
Oh lheueh pajoh bu teungku ngon deelat  
Marit le leugat nyan Raja Jeumpa

Ateueh ayah droe jaroe geuangkat  
Lon tuan harap wahe ayahanda  
Kareuna kamoe bunoe neupakat  
Gisa u teumpat u nanggroe Indra

Sabab nyan jinoe kamoe han seumpat  
Meutanggoh siat kamoe ayahanda  
Meung ka troh ayah keudeh u teumpat  
Likot nyan meuhat teuka aneukda

Buleuen leumah nyoe kamoe meuharap  
Aneuk bumeuhat keudeh tateuka  
Putoh ngon narit haba ka teupat  
Jaroe geumumat deungon aneukda

Seureuta laen dumna keurabat  
Sabe mupakat meuntroe panglima  
Neulakee idin lheueh nyan lom meuhat  
Gisa u teumpat di Raja Muda

Seureuta wazi meuntroe ngon rakyat  
Hingga troh leugat u nanggroe Indra  
Di meuntroe Buman lheueh nyan lom meuhat  
Maseng u teumpat laju geugisa

Oh lheueh nyan teuma haba nyang singkat  
Ka troh u teumpat dum raja-raja

Di Raja Jeumpa tinggai bak teumpat  
Deungon cut ubat Meureudum Ratna

Meugaseh sayang leukang tan siat  
Sabe lam nikmat meusuka-suka  
Deungon deundayang chadam ngon hadap  
Ngon raja deelat cut putroe muda

Lawet ngon lawan keumudian meuhat  
Cut putroe ubat marit ngon raja  
Wahe tuanku ampon syah deelat  
Dilon teuringat akan ayahanda

Di ulon sabe ate lon weueh that  
Bah tawoe siat u nanggroe Indra  
Di Raja Jeumpa neuseuot leugat  
Cit ka patot that wahe adekda

Dilon hai putroe teugoe-goe lon that  
Sang-sang han mangat meutan tateuka  
Goh lom tasaweue padum treb lambat  
Bah jinoe meuhat geutanyoe bungka

Hingga peuhase sigala alat  
Top pade leugat mita ngon saka  
Geuwot le doi-doi ladom meuseukat  
Geukrah ngon rakyat tuha ngon muda

Kada sireutoh ka troh le leugat  
Ureueng nyang cakap sukee meubangsa  
Hana peureulee rame that rakyat  
Kareuna sabab jeuoh tasapa

Di sinyak putroe ate ka mangat  
Hingga troh bak hat watee geubungka  
U ateueh kandran geupeudieng leugat  
Hingga beurangkat meuntroe panglima

Ngon Raja Bujang sajan beurangkat  
Seureuta meuhat Siti Geulima  
Di Raja Jeumpapi saboh babat  
Nyang ireng meuhat wazi panglima

Cut Putroe Ratnapi saboh babat  
Deunda yang nyang mat dum muda-muda  
Hingga ka hase sare ka leungkap  
Laju beurangkat poh lawa guda

Ngon kandran guda bandum beurangkat  
Raja ngon rakyat laju meusapa  
Na padum lawet hana treb lambat  
Hingga laju rab u rianggroe Indra

Ka troh dalam blang sigala rakyat  
Dum hibat-hibat di atueuh guda  
Le ureueng gampong ka deuh jilihat  
Jiplueng le leugat u dalam kuta

Bak Raja Muda jaroe jiangkat  
Leupah meukarat jipeugah haba  
Ampon tuanku ka bulat-bulat  
Lon kalon jeh pat dalam blang raya

Sira jikheun nyan lidah meutat-tat  
Takalon jasad jipeuget geumpa  
Umpama ureueng teumakot that-that  
Jikarat-karat bak peugah haba

Oh jikheun deelat roh bulat-bulat  
Raja beungeh that mirah ngon muka  
Seureuta geudhot gata nyang leugat  
Ka peugah meuhat meunurut haba

Oh kameututo pakon meugriet that  
Narit han teupat han meupeue haba  
Ampon tuanku ulon ka silab  
Meuah hai deelat hana lon saja

Bunoe dalam blang lon tuan lihat  
Cut putroe ubat ngon Raja Jeumpa  
Di atueuh kandran garang ngon hibat  
Seureuta rakyat wazi panglima

Ban raja deungo meunan riwayat  
Neukrah le rakyat deungon bintara

Hingga meusaho keunan meusapat  
Neupeugah leugat le Raja Muda

Jeh sinyak putroe ka jiwoe jeh pat  
Tajak tueng siat puwoe lam kuta  
Ladom nyang laen jak peugot teumpat  
Tapreh beuget that tapeumulia

Nyang jak tueng putroe laju beurangkat  
Nyang peugot teumpat sinan lam kuta  
Nyang jak drob keubeue jihei le leugat  
Laju jiikat nibak u dara

Nyang jak preh Jamee sukee meupangkat  
Dum hibat-hibat meuntroe panglima  
Keudeh bineh blang geujalan leugat  
Ka deuh geulihat cut putroe muda

Di atueh kandran po bintang takat  
Geupeudieng alat dum atueh guda  
Hana meung sidroe nyang jak meudarat  
Beuthat beurakyat sukee panglima

Inong ngon agam peukayan hibat  
Jibeudoh kilat meucahya-cahya  
Get that meureusam nyan ragam adat  
Bacut tan silab salah wareuna

Hingga di jeuoh ka troh keunan rab  
Geutet le leugat meuriam raya  
Phon-phon geupeulheueh le nyang po teumpat  
Sang-sang kiamat di nanggroe Indra

Meutum disinoe jibeudoh kilat  
Meugrum le meuhat bak jamee teuka  
Miseue dilaoj jibeudoh bakat  
Meunankeu adat buet raja-raja

Tunong ngon baroh timu ngon barat  
Ka teuka rakyat jak kalon rupa  
Geucok cut putroe geupuwoe leugat  
Ireng le meuhat uleh panglima

Oh troh lam kuta dum raja deelat  
Jaroem geumumat di Raja Jeumpa  
Laju bak ayah bagah geupeurab  
Sujud khideumat geupumulia

Lheueh nyan bak umi lagi geupeurab  
Jaroem geumumat deungon ibunda  
Di Raja Bujang meunan cit meuhat  
Lheueh nyan peurab putroe Geulima

Lheueh nyan peurab droe cut putroe ubat  
Geubri horeumat ayah ngon bunda  
Di po ma putroe neumoe le leugat  
Kasrat meudrab-drab deungon ie mata

Wahe aneuk lon seunambong hayat  
Kheundak hadarat ka meunoe jeumba  
Didalam ate sabe teuringat  
Aneuk lon sarap hana meuho ka

Teuma seuot le kande meulakat  
Kheundak hadarat ka meunoe jeumba  
Kareuna mantong nyawong lam jasad  
Meuteumeung lihat rupa ibunda

Teuma khanduripi hase leungkap  
Laju geuangkat keu raja-raja  
Di ureueng inongpi saboh teumpat  
Meunurut babat meujeumba-jeumba

Oh lheueh pajoh bu han peue taingat  
Geubeuot leugat deungon ceurana  
Geupajoh ranub geidueuk meusapat  
Putroe ngon deelat dalam astana

Uroepi malam yoh nyan le meuhat  
Jak eh le leugat putroe ngon raja  
Geujak eh laju ma seng bak teumpat  
Geuploh keurawat ka hek meusapa

Beungoh le uroe sampoe ubak hat  
Beundoh le leugat dalam astana

Hase makanan minuman ladat  
Ngon ie seureubab ladom ie kahwa

Oh lheueh makanan putroe ngon deelat  
Piyoh ba k teumpat duek peugah haba  
Cut putroe Ratna ulon riwayat  
Yoh nyan jipeurab ubak ayahanda

Oh troh bak ayah jipeugah leugat  
Jaroé jiangkat ateuah jeumala  
Ampoé ayahanda raya that hajat  
Aneukda harap neukaboi pinta

Kareuna ulon dilee ganje that  
Nyanteu jeuet sabab lon tuan bungka  
Nyang lakee ulon hai ayah deelat  
Ban dalem Meugat bri keu hamba

Kareuna gob nyan akai jeuheut that  
Meulangga adat geuba peusuna  
Sampoe jadi prang mate dum rakyat  
Kareuna sabab Meugat cilaka

Nyanteu ayahanda nyang ulon harap  
Neuseurah leugat nyang ulon pinta  
Teuma seuot le di raja deelat  
Ban-ban nyang pakat nibak aneukda

Kareuna pale cilaka Meugat  
Dilonpi meuhat ka rab cilaka  
Oh lheueh nibak nyan baha nyang singkat  
Geuhei lem Meugat le putroe cuda

Lem Meugatpi troh keunan geupeurab  
Cut putroe takad deungon seunjata  
Timbak ngon beude mate meuwat-wat  
Sinan ka teupat nyawong keulua

Di sinyak putroe ate ka mangat  
Ka habeh hayat bangsa peusuna  
Peurintah putroe jinoe bak rakyat  
Mayet le Meugat yue tanom sigra

Oh lheueh seumanoe geuba u jeurat  
Tamat riwayat Meugat lam donya  
Jinoe lon sambong ujung ngon ayat  
Putroe ngon dalam astana

Ayah ngon bunda seureuta sapat  
Han tom na siat jarak sideupa  
Na padum masa disinan teutap  
Cut putroe ubat di nanggroe Indra

Tiep uroe sabe jitren dum rakyat  
Jaroje jimumat ngon putroe muda  
Sabab tan jieu dilee ka treb that  
Meukarat-karat tamong lam kuta

Nyang ladom jiwoe ladom beurangkat  
Sabe tiep saat hana tom reuda  
Jak saweeu putroe ngon raja deelat  
Sabab meugah that nyan Raja Jeumpa

Ba bungong jaroe meunurut adat  
Peurumoh rakyat jiba u muda  
Peurumoh geusyik jiba meuseukat  
Meunan cit adat judo bintara

Han peue lon teh reh leubeh panyang that  
Bah le lon singkat peupaneuk haba  
Hingga padum treb disinan teutap  
Tinggai bak teumpat di nanggroe Indra

Nibak siuroe putroe ngon deelat  
Marit le leugat po Raja Jeumpa  
Alah hai a dek po bintang takat  
Tanyoe ka treb that nibak ayahanda

Bah le tajak woe geutanyoe siat  
Dudoe lom meuhat keunoe tagisa  
Hana peue salah hai ampon deelat  
Ban-ban nyang pakat nibak meukuta

Jinoe bak ayah bah le lon peurab  
Lon kheun beuteupat geutanyoe gisa

Cut putroe jitren laju le leugat  
Keudeh jipeurab ubak ayahanda

Oh lheueh jiseumah jipeugah pakat  
Kamoe meuhajat gisa u Jeumpa  
Kareuna kamoe sinoe ka terb that  
Idin beuleugat wahe ayahanda

Ayah neuseuot leumbut ngon sahbat  
Ka sret meudrab-drab deungon ie mata  
Alah hai aneuk po bungong riwat  
Sayang lon that-that po bijeh mata

Han jeuet ulon tham gata beurangkat  
Kareuna sabab lakoeteu nyang ba  
Nyang na nibak lon doa seulamat  
Beujeuoh laknat beujarak mara

Di sinyak putroepi Jimoe leugat  
Han jeuet jiingat akan ayahanda  
Oh ka lheueh idin bak ayah deelat  
Po bungong riwat jitren le sigra

Ubak samlakoe jipeutoe leugat  
Putroe riwayat narit ayahanda  
Po ma ngon ayah ka idin meuhat  
Singoh beurangkat tanyoe tagisa

Jilob le uroe malampi ka glap  
Jak eh bak teumpat dum maseng jeumba  
Oh beungoh uroe geubeudoh leugat  
Peukeumah alat peue-peue dum nyang na

Geulakee idin nibak po teumpat  
Laju beurangkat geuwoe u Jeumpa  
Di Raja Muda neumoe maken brat  
Po bungong riwatpi maken rukha

Di po samlakoe laju beurangkat  
Seureuta rakyat meuthroe panglima  
Nyang jak pahon dikeue cut putroe ubat  
Seureuta sapat deundayang dumna

Hingga teuma haba lon peurab  
Laju beurangkat bandum sineuna  
Padumna lawet hingga lom lambat  
Ka troh bak teumpat u Nanggroe Jeumpa

Maseng teumpat droe geuwoe le leugat  
Teuma di rakyat woe rumoh tangga  
Di Raja Bujang meunan cit meuhat  
Blang Seupeueng leugat deungon judonya

Di Raja Jeumpa ngon putroe ubat  
Neuwoe bak teumpat kuta Lhab Mana  
Hingga ka seunang ka troh bak tempat  
Ate ka mangat troh rumoh tangga

Di Raja Jeumpapi sukaan that  
Disinan sapat ngon Putroe Ratna  
Deungon duendayang sajan dum hadap  
Han tom na siat cre di astana

Nyang jaga kuta seunjata leungkap  
Pahlawan hibat dum teuga-teuga  
Bak asai teunan beuneueng siurat  
Hingga treb lambat ka jeuet keu ija

Putroe ngon raja lon peuduek siat  
Bah sinan teutap dilee lam kuta  
Dalam gle paru kayem su reungkah  
Gunong Seulawah meupucak dua

Deungon ajaeb subhanallah  
Jinoe lon kisah keu Raja Cina  
Get that meusyeuhu lagi ngon meugah  
Jimat peurintah peuet blah boh raja

Peuet blah boh nanggroe dalam jih jajah  
Wase dum jiprah le Raja Cina  
Sabab that beuhe lagi ngon gagah  
Hana tom kalah dalam prang raya

Sakti jih le hana peue peugah  
Keubai sileupah di Raja Cina

Nibak siuroe raja deungo gah  
Na putroe ceudah di Pulo Ruja

Meureudum Ratna nama gob peugah  
Judo khalifah nyan Raja Jeumpa  
Putroe that ilok beok tan salah  
Rata daerah meusyeuhu nama

Di Raja Cina ate ka susah  
Keu putroe ceudah dijih meuhawa  
Hajat keumeung cok pakri ban ilah  
Putroe nyang meugah judo jih ka na

Jiduek han keunong jidongpi salah  
Ate geulisah keu putroe muda  
Sang-sang cit sajan teubayang leumah  
Meunankeu ulah tiep-tiep kutika

Hingga bak hingga raja lam susah  
Meuthee le bagah bak judonya  
Nan Ratna Umbak rancak seuleupah  
Meunyankeu zeejah di Raja Cina

Ileumee nujum utoh seuleupah  
Deuh jieu leumah nyang goh lom nyata  
Nibak siuroe cut putroe ceudah  
Jitanyong bagah bak judonya

Tajak u pasi ta jak koh lipah  
Pucok peureubah u barat daya  
Pakon tuanku lon eu that susah  
Siulah-ulah na peue neukira

Jeh dileuen rumoh timoh bak birah  
Dileuen meunasah timoh meuria  
Meunurut angen ulon deungo gah  
Sang ka na leumah laen nyang muda

Bukon le sayang lon pandang siwah  
Ka jimeureupah ngon cicem pala  
Lon neuseumadu teungku duli syah  
Ngon putroe ceudah di nanggroe Jeumpa

Takawe rapeueng dalam krueng Lipah  
Kawepi patah eungkotpi hana  
Meureudum Ratna bek that neugagah  
Oh akhe teulah rugoe mubahra

Napsu han hase malee meutatah  
Rakyat dum punah mate binasa  
Judo putroe nyan ureueng meutuah  
Aneuk Abdullah nan Raja Jeumpa

Akan teutapi raja duli syah  
Siputroe ceudah meuteumeung cit ba  
Keu peue roe guna meurugoe payah  
Raja khalifah jitipee daya

Keu peue roe guna neukalon wajah  
Napsu han leupah peupuleh hawa  
Diteungku dawok teugok ie babah  
Meutamah-tamah ate neuluka

Di ratna Umbak meunan jipeugah  
Beungeh meuleupah di Raja Cina  
Seureuta jidhot deungon jimarah  
Meu peue ka peugah inong cilaka

Surot keumeung trom inong meujadah  
Bek le beurakah hai tauen puta  
Di Ratna umbak seuot le bagah  
Lon bek neumarah hai po meukuta

Di lonpi galak keu putroe ceudah  
Bah taseulaah le tanyoe dua  
Kareuna ulon tan le paidah  
Jinoe ka leumah nyang leubeh muda

Di Ratna Umbak teumimplak bagah  
Raja geulisah meutamah rugha  
Di raja jitren laju jiminah  
Muka jih mirah ban aneuk saga

Keudeh bak bale laju meulangkah  
Laju jiseumbah uleh bintara

Jikolan raja muka that mirah  
Hana tom leumah meunan nyang ka ka

Marit le raja sigra jipeugah  
Jibri peurintah ubak panglima  
Wahe e meuntroe deungo kupeugah  
Rakyat dum takrah jinoe beusigra

Ube na nanggroe nyang kupeurintah  
Keunoe beubagah beutroh jiteuka  
Ube nyang ka jeuet jimat peukakah  
Beutroh jilangkah keunoe lam kuta

Soe-soe nyang tinggai jih kupeusalah  
Badan jih kuplah peuek cong sula  
Di Raja Cina meunan peurintah  
Beudoh le pantah meuntroe panglima

Jicok le guda nyang tajam pantah  
Seureuta pantah ka jipoh lawa  
Rata jeuep nanggroe meuntroe keumeukrah  
Laju jipeugah surohan raja

Keudeh lam kuta bandum meulangkah  
Beuna peukakah alat seunjata  
Saleh peue napsu raja peurintah  
Siulah-ulah neumeung prang raya

Oh lheueh nibak nyan haba nyang ringkah  
Rakyat bahrullah keunan ka teuka  
Peuet blah nanggroe meusaho bagah  
Nyang meugah-meugah meuntroe panglima

Geusyik ngon waki wazi khalifah  
Nujumpi langkah deungan peundita  
Hana meung sidroe nyang na jikeubah  
Meunurut titah peurintah raja

Oh ka meuhimpun dum raja peuet blah  
Jipeuek seumah jideelat raja  
Ampon tuanku raja nyang meugah  
Ka troh meulangkah ka moe sineuna

Peue na meuseuke raja duli syah  
Raja neupeugah kamoe useuha  
Siri toh nanggroe langga peurintah  
Nyang ka peusiblah wase kuala

Saleh pat putroe nyang kheundak rampah  
Kamoe seuleuah puwoe keu raja  
Pat na meusugang ceukang kreueh babah  
Neucuba peugah duli meukuta

Turun le sabda raja khalifah  
Rata daerah wase bandum na  
Rata jeuep raja turot peurintah  
Bacut tan salah dusun ngon kuta

Nyang na sigeutu napsu lon peugah  
Cut putroe ceudah nyang ulon suka  
Di nanggroe jeumpa meusyeuhu leupah  
Nama geupeugah Meureudum Ratna

Ek hase tacok nyan putroe ceudah  
Taci seuleuah wahe peundita  
Yoh nyan di nujum kitab jipeuhah  
Jikalon harap jipupoh angka

Jitob le kitab yoh nyan jipeugah  
Jaroe dua blah atueh jeumala  
Ampon tuanku raja khalifah  
Han ek tailah keu putroe muda

Judo cut putroe ureueng nyang meugah  
Raya that tuah nyan Raja Jeumpa  
Bitpi meunan nyan ka ulon peugah  
Cut putroe ceudah hase cit neuba

Akan teutapi hana paidah  
Akai le leupah Meureudum Ratna  
Napsu han sampoe ate nyang susah  
Tijoh ie babah di raja nyang na

Meunan di nujum nyangka jipeugah  
Meutamah mirah muka di raja

Deungon kurangkan yoh nyan peurintah  
Laju jipeugah bak raja-raja

Ho ka dum raja nyang kupeurintah  
Bandum dibawah nyang kee kuasa  
Kacok ngon alat rakyat dum kakrah  
Beudoh beubagah ka jak prang Jeumpa

Bek na teumakot deungon tagundah  
Beuthat bumeugah nyan Raja Jeumpa  
Putroe nyan tacok jih bek takeubah  
Tapoh bubagah nyan Raja Jeumpa

Di Raja Cina meunan peurintah  
Beudoh le bagah dum raja-raja  
Jicok ngon alat dumna peukakah  
Rakyat bahrullah ikot seureuta

Deungon pahlawan nyang meugah-meugah  
Lom juah-juh dumna bintara  
Jicok meuriam gulam keumurah  
Laju jilangkah umieng kuala

Jiek lam sampan dum raja peuet blah  
Layeue jipeuhah sampan jibungka  
Jipot ngon angen reumbang seuleupah  
Kapaipi bagah lam laot raya

Takalon laot seupot seuleupah  
Miseue bak lipah dum kapai bungka  
Di Raja Cina hana le susah  
Siulah-ulah sampoe ban pinta

Didalam kapai hana peue peugah  
Get meuriah meusuka-suka  
Geusok biula canang jitingkah  
Suroh khalifah nyan Raja Cina

Deungon peurasan macam dum ulah  
Peugaduhan susah peuhilang duka  
Kapaipi jijak gunjak seuleupah  
Jitakat arah u barat daya

Uroe ngon malam beujalan bagah  
Laot bahrullah kapai jibungka  
Umbak meualon riyeuek dum bicah  
Kapai jilangkah jijak prang Jeumpa

Bah teuduek ohnan dilee sibingkah  
Lon puwoe kisah u nanggroe Jeumpa  
Ayat lon balek titek lon ubah  
Ngon tulong Allah beuseumpurna

Jalan Blang Padang Lapangan Gajah  
Cukup meuriah watee peurasan  
Cina lam laot siat takeubah  
Tapuwoe kisah laen karangan

Meureudum Ratna ngon raja meugah  
Bacut tan susah sabe lam aman  
Nibak simalam raja duli syah  
Rasia leumah nanggroe sang karam

Jiek ie laot subhanallah  
Ngon riyeuek bicah ka meugeulumbang  
Kuta meuligoe sampoe ngob sudah  
Cut putroe ceudah hanyot le yoh nyan

Teuka lom angen yoh nyan lom bagah  
Raja duli syah jipot u manyang  
Teungoh that raja neuseunang nafah  
Teukeujot bagah raja sulotan

Oh ban teukeujot raja duli syah  
Ie mata jojah meukarang-karang  
Raja ka neumoe ate that susah  
Jikalon bagah le putroe intan

Ubak judo droe cut putroe seumah  
Neucuba peugah wahe junjongan  
Nibak malam nyoe peue na nyang susah  
Peue na kasalah di ulon tuan

Bek le tuanku ate neususah  
Takue lon bagah jinoe neureupang

Keu peue lom guna teuma neukeubah  
Nibak jeuet susah duli sulotan

Meukru seumangat hai putroe ceudah  
Gata tan salah hai intan karang  
Nyang jeuet ulon moe hai buleuen peuet blah  
Dilon na leumah saboh buruhan

Na nyum lon lumpoe adoe meutuah  
Ie laot bicah ka meugeulumbang  
Kuta meuligoe sampie ngob sudah  
Adoe meutuah gata nyang karam

Jipot lom angen oh lheueh nyan bagah  
Kayee dum reubah meutimphan-timphan  
Ulon jibapo han meuho arah  
Siulah-ulah ulon ka pangsan

Lheueh nyan teukeujot laju le bagah  
Nyangkeu jeuet susah hai bintang karang  
Meureudum Ratna seuot le bagah  
Teungku meutuah bala troh datang

Troh Raja Cina teuma jilangkah  
Ulon jirampah tuanku jiprang  
Nyankeu meukeusud rasia leumah  
Teutapi Allah nyang thee leubeh trang

Di tuan putroe laloe seumeugah  
Suboh le bagah cuaca alam  
Raja u bale laju meulangkah  
Jipeukek seumah le meuntroe bujang

Lheueh nyan bak raja turon le titah  
Neubri peurintah bak uleebalang  
Rakyat ngon nujum bandum neuyue krah  
Ulama syiah deungon pahlawan

Geusyik ngon waki imam meunasah  
Meunan cit ulah haria peukan  
Meunan bak raja haba peurintah  
Beudoh le bagah di tandi bujang

Hana peue habeh meuceh lon peugah  
Hingga troh langkah keunan u dalam  
Seureuta nujum ureueng nyang ceudah  
Meusa ho bagah ngon tuha lapan

Rata jeuep gampong duson daerah  
Seureuta langkah ngon Raja Bujang  
Oh ka lheueh piyoh kada lhee nafah  
Turon le titah nibak sulton

Wahe dum nujum guree lon nyang sah  
Dilon na leumah saboh buruhan  
Meupeukeu takbi guree ci peugah  
Ate that susah di ulon tuan

Awai ngon akhe raja neupeugah  
Rasia leumah meulumpoe beuklam  
Sigala nujum seunang le nafah  
Yoh nyan ka leumah dalam pikeran

Nujum angkat le jaroe dua blah  
Ampon khalifah meuah keulaman  
Takbi rasia raja duli syah  
Raua that syekkah keunoe troh datang

Troh Raja Cina teuma jilangkah  
Ampon duli syah geutanyoe jiprang  
Jicok ngon putroe jipuwoe bagah  
Hase jirampah pocut buleuen trang

Nyankeu meukuta rasia leumah  
Nyang ka lon peugah ube troh lon pham  
Yoh nyan teujunun rakyat bahrullah  
Yoh nyan phon susah dumna pahlawan

Di Raja Jeumpapi teuka gundah  
Turon le titah bak syahi alam  
Nyan ka tadeungo dum nujum peugah  
Putroe jirampah geutanyoe jiprang

Pakri ban pike kande meutuah  
Pakri ban ulah jinoe tajalan

Sauot le meuntroe dudoe neupeugah  
Ubak duli syah junjongan alam

Meunyo goh kamoe disinoe reubah  
Cut putroe indah han mubri pandang  
Bah le dum kamoe manoe ngon darah  
Ngon tulong Allah Cina nyan taprang

Meunan di meuntroe bagoe neupeugah  
Duli khalifah seuot le yoh nyan  
Wahe kakanda raja duli syah  
Pakri peurintah jinoe bak cut bang

Goh lom seuleusoe ban adoe peugah  
Seuot le pantah di Raja Bujang  
Wahe adek lon tanglon meutatah  
Gata bek susah meung mantong abang

Gata bek tatren hai buleuen peuet blah  
Bah lon peurintah masalah prang  
Meung ka mate lon taeu ka reubah  
Nyan phon teuseurah bak droeteu intan

Ka seungab haba raja khalifah  
Jinoe meukeumah dum sikalian  
Di Raja Bujang yoh nyan peurintah  
Peuhase bagah dumna alat prang

Peuget le benteng ato kafilah  
Turon peurintah bak Raja Bujang  
Kuta dipasi meuriti sudah  
Get that-that ceudah geuboh ngon pacang

Sideh Mane phon u Jangka leupah  
Peudada sudah sampie meureuntang  
Timu ngon barat ka siap keumah  
Rata daerah kuta meureuntang

Cukop ngon asoe meubagoe sudah  
Cukop peukakah deungan pahlawan  
Cukop meuriang deungan keumurah  
Cukop kafilah ngon uleebalang

Geupreh-preh Cina keunan jilangkah  
Preh-preh peurintah pajan jadi prang  
Ureueng lam benteng bah teiduek kisah  
Jinoe ta peugah keu syahi alam

Di Raja Jeumpa cahya meuh mirah  
Tanyong le pantah ubak cut abang  
Jinoe pakri ban cut bang meutuah  
Hokeu ta pinah cut putroe seudang

Raja Bujang kheun yoh nyan le bagah  
Ngon cuda jih bah disinan diam  
Keudeh Blang Seupeueng tapuwoe pantah  
Bah tapeusiblah bak teumpat laman

Pakat seuleusoe geupuwoe bagah  
Putroe geupinah deungon deundayang  
Teutap Blang Seupeueng cut putroe ceudah  
Deungon duli syah nyan judo badan

Keu Raja Jeumpa ohnoe lon keubah  
Tapuwoe kisah Cina beujalan  
Seureuta buhu sigeutu ubah  
Lon jiseuleuah saboh-saboh dan

Pucok krueng Jeunieb meusarah-meusarah  
Pucok krueng Pandrah meulinggong-linggong  
Keu Raja Cina jinoe lon peugah  
Laot bahrullah laju jiarong

Hingga padum treb lawet ka sudah  
Jikalon leumah le ujung gampong  
Di ateueh jangka kapai jisinggah  
Yoh nyan le leumah ka jiteurupong

Nyang nanggroe Jeumpa hingga ka leumah  
Raja Ramjadah leupah meuuntong  
Ngon kuta pasi meuriti sudah  
Raja nyan bagah pike lam jantong

Ka awai jithee kee troh langkah  
Pakonkeu bagah awai that muphom

Cukop ngon kuta leungka ka sudah  
Ka hase keumah jipreh troh lansong

Di Raja Cina marit le bagah  
Jitanyong pantah laju bak nujum  
Pakri ban nyang get jinoe peurintah  
Bah le bubagah taprang beulansong

Nujum seuot le ampon khalifah  
Raja meutuah meutanggoh bak lon  
Tapreh kutika nyang reumbang ceudah  
Bek dilee bagah tamong lam gampong

Deungon ileumee ulon seuleuah  
Meunyo roh langkah kadang meuuntong  
Jilhom le saoh yoh nyan le bagah  
Jipreh peurintah bak ahli nujum

Ka padum uroe sapeue tan leumah  
Mupakat bagah yoh nyan le bandum  
Bak Raja Cina teuma peurintah  
Laen ban ulah jinoe tapuphon

Tapeugot surat dilee nyang ceudah  
Haba tapeugah ban-ban nyang maklum  
Jicok le kalam deungon keureutah  
Surat le bagah jipeuget lansung

Oh lheueh jipeuget laju jigeutah  
Jiyue jak bagah keudeh lam geudong  
Meuntroe Chong Huat laju meulangkah  
Saboh kafilah jiba peulindong

Siribee rakyat kuat ngon gagah  
Cukop peukakah pahlawan agong  
Na saboh kapai nyang raya leupah  
Beurangkat bagah meunuju gampong

Di mieng kuala jipiyoh payah  
Neukalon leumah le raja payong  
Di Raja Bujang yoh nyan peurintah  
Jak kalon bagah pane troh ureueng

Meuntroe beudoh le sare meukeumah  
Sampan le bagah laju geudayong  
Bak kapai Cina keunan ka sudah  
Meuntroe le bagah geutanyong lansong

Panekeu gata rakan meutuah  
Peue na peukakah lam kapai kurong  
Meunyo meuneukat meunan cit ulah  
Wase bubagah tabayeue bandum

Meunyo kapai prang riwang bubagah  
Yoh goh lom bagah kuproh ban-ban dum  
Meuntroe Chong Huat seuot le pantah  
Awai ka meugah peue lom tatanyong

Ulon nyoe suroh raja duli syah  
Deungon keureutah nyoe pat na sion  
Cina jok surat teuma le bagah  
Neusambot pantah geupuwoe lansong

Bak raja nanggroe sampoe le sudah  
Meuntroe peuseumbah bak raja payong  
Raja yue baca sigra le pantah  
Meuntroepi bagah neubuka sarong

Haba lam surat get that meuriah  
Saleuem ngon seumah mula jipuphon  
Kamoe di jeuoh ka troh meulangkah  
Keu putroe ceudah raya napsu lon

Harap takirem keunoe bubagah  
Bek na tabantah meung ube jarom  
Meunyo hana troh ingat bubagah  
Rakyat dum susah rinyah lam gampong

Dimieng kuala kupreh troh langkah  
Cut putroe indah intat beulansong  
Meunyo hana troh lagee kupeugah  
Nangggroeteu bicah banda ngon duson

Rakyat meung sidroe han kukeubah  
Pahlawan meugah dum kuboh pasong

Putroe nyan kucok kupuwoe bagah  
Lakoe jih kuplah kutiek lam urong

Haba lam surat meunankeu surah  
Muka ka mirah di raja payong  
Oh lheueh nibak nyan turon le titah  
Surat tabalah jinoe beulansong

Meuntroe cok kalam ngon keureutah  
Surat le bagah yoh nyan geupuphon  
Haba lam surat mangat seuleupah  
Deungo lon peugah uram ngon ujung

Deungon horeumat surat lon balah  
Atek bek susah hai raja payong  
Tekheun talakee cut putroe ceudah  
Hana peue salah lon intat lansong

Hak bulueng gata cit ka lon keubah  
Lon preh troh langkah cit ka padum thon  
Nyang judo gata rupa that ceudah  
Bulee jih mirah jieh diyub krong

Nyankeu hai raja bak kamoe mudah  
Tacok bubagah puwoe u gampong  
Meureudum Ratna kon hak jeumba kah  
Kon mudah-mudah gata kheundak tueng

Ohnankeu haba ngon cara ringkah  
Geulipat bagah pasoe lam sarong  
Oh lheueh nibak nyan meuntroe meulangkah  
Simpan le bagah laju geudayong

Bak kapai Cina hingga troh sudah  
Meuntroe cok bagah surat meugulong  
Kapai Chong Huat gisa le bagah  
Laot bahrullah laju jiarong

Surat bak jaroe peujaroe bagah  
Laju jipeuhah jiploh lam sarong  
Oh ban jibaca lia ngon peudah  
Muka ka mirah jipeuek sudong

Raja beudoh le deungon amarah  
Jimeung grob pantah lam laot jitron  
Nujum ka jimat yoh nyan le bagah  
Raja duli syah peumeuah ampon

Saba hai raja bek that amarah  
Bah tapeurintah bak ureueng bandum  
Meunyo tuanku sidroe meulangkah  
Hana paidah pahlawan agong

Meudeh ngon meunoe dum nujum peugah  
Puleh amarah di raja payong  
Uroe ka malam awan ka mirah  
Raja that susah lam kapai kurong

Jikukuek manok suboh le bagah  
Turon le titah bak teungku nujum  
Dum saoh kapai jiyue bot pantah  
Ka jeuet meulangkah jinoe tapuphon

Kareuna wateepi jroh meuleupah  
Meunan peurintah bak teungku nujum  
Yoh nyan beurangkat leugat le bagah  
Lam riyeuk bicah kapai jiarong

Kuala Jangka ladom jilangkah  
Peudada leupah ladom jiarong  
Keudeh Krueng Menepi rame leupah  
Lhab Mana bagah phon-phon jikeupong

Aneuk meuriam yoh nyan jimuntah  
Taeukeu reubah dumna bak aron  
U dalam kuta jitakat arah  
Aneuk dum bicah tadeungo am-um

Ureueng lam kuta teukeujot leupah  
Geubeudoh bagah geucok teurupong  
Geukalon kapai ka jai meuleupah  
Deungon keumurah jiek meuron-ron

Panglima Gantoe teuma peurintah  
Ka geuyue balah laju beulansong

Yoh nyan didalam meuriam muntah  
Aneuk meruah lagee geusinthong

Hingga seun saboh kapai le bicah  
Nyang laen bagah laju jihudom  
Di Raja Cina maken amarah  
Bacut tan ugah didalam jantong

Limong boh nya ng lham lapan jitamah  
Jikarat bagah peutoe u gampong  
Deungon meuriam laju jibalah  
Aneuk dum bicah lagee hujeuen tron

Meugum di laot aneuk keumurah  
Meutum geubalah sinoe di gampong  
Nibak uroe nyan Subhanallah  
Saho tan tiwah sabe that untong

Uroe teungoh trang yoh nyan clam sudah  
Hana peue peugah dum asap racon  
Dumna binatang gaduh aruwah  
Teukeujot leupah jiplueng meuron

Ie laot hijo ka jeuet keu mirah  
Meujampu darah u darat jitron  
Yee ngon paroe ka troe meuleupah  
Raseuki mudah bak uroe nyan phon

Bitpi le mate ate tan ugah  
Jikarat bagah laju meuron-ron  
Umieng kuala sampoe ka sudah  
Kapai jikeubah jiek lam gampong

Tango jisurak kuyak sileupah  
Deungon jiarah tadeungo kheng khong  
Jimat ngon peudeueng bintang dum jicah  
Hingga ke leupah jipeuek lansong

Rab bineh kuta ka troh jilangkah  
Karab-rab leupah tamong lam geudong  
Geusyik Nyak Ahmat teuringat bagah  
Ka geupeurintah yue teubiet lansong

Ho ka dum rakan pahlawan meugah  
Geutanyoe sudah dum Cina keupong  
Dum pageue kuta taeu ka bicah  
Teubiet bubagah talet hai kaom

Meugrub jilumpat rakyat bahrullah  
Pahlawan meugah dum teumbon-teumbon  
Cokma ngon cakcoe bak jaroe tan glah  
Riyoh ngon reundha surak meuong-ong

Bandua pihak metak meurupah  
Ladom nyang reubah ladom teupanggong  
Ladom meugule mate meudarah  
Nyang ladom beukah ka wah boh hidong

Nyang ladom rusak ladom meukilah  
Nyang ladom patah jiklik meuong-ong  
Keunoe ngon keudeh hana lom tiwah  
Sabe that gagah tuah ngon untong

Naleueng habeh ji tanoh ka mirah  
Meureupah-reupah taeu meucron-cron  
Panglima Tulot keubit that payah  
Cina le leupah keunan jihudom

Hana jipike mate ngon patah  
Maken jigagah jiek meuron-ron  
Rata jeuep kuta nyan prang ka bicah  
Maseng kafilah jipeusak untong

Di langet manyang bintang meuriti  
Cahya beurseri oh malam jula  
Keu Raja Bujang deungon lon rawi  
Oh ka neueu ri nyan prang that padra

Neucok deungon kreh neulhat ngon bari  
Ka neungui lagi peukayan raja  
Neuba pahlawan kanan ngon kiri  
Tuanku duli neumasok ngaza

Gajah balohan meukandran duli

Laen hai akhi di ateueh guda  
Geupeh ngon geundrang geuyub napiri  
Geutarek lagi ngon alam raja

Alam sikureueng cap peudeueng duli  
Bintang lom lagi buleuen sinan na  
U dalam sap prang raja meunari  
Yoh nyan teuka le rakyat Cina

Jikalon raja sangat ugahri  
Laen sipai deungon panglima  
Masa nyankeu prang garang han sakri  
Cina Yahudi le that binasa

Cina ka talo jiundo diri  
Surot u pasi umieng kuala  
Di Raja Bujang neucaang han sakri  
Neulet ban piti dum rakyat Cina

Nyang ladom mate meugule lam ie  
Han jan jititi lam kapai raya  
Nyang ladom Cina nyang na beurani  
Jilangue pasi seulamat nyawa

Seulamat umu mantong raseuki  
Ka troh keumbali keudeh bak raja  
Oh troh keudeh bak raja duli  
Lajujisudi toh putroe ka ba

Nyang ka kamuprang padumna lawo  
Ka hek kunanti kupreh kagisa  
Yoh nyan seuot le dumna sipai  
Di ampon duli putroe neukira

Nyan sa dikamoe nyawong habeh li  
Ka keunong tadi bak ureueng Jeumpa  
Jilet ngon jicang ka saban sakri  
Meugrob lam pasi langue kuala

Nujum ka geutham dilee mulai  
Di ampon duli hana neukira  
Jinoe tarasa malee ngon keuji  
Putroe han jibri tanyoe binasa

Meunankeu jikheun meuntroe wazi  
Raja Cinapi malee jiraya  
Susah ngon tunu meujampu banci  
Sabab sipai le that binasa

Teutap lam ate teupike duli  
Sabab ka undi talo lam ngaza  
Keu raja Cina ohnan beureunti  
Tagisa rawi u nanggroe Jeumpa

Lam kayee rehueng umpung meurpati  
Aneuk keudidi dimieng kuala  
Oh habeh Cina bandum jilari  
Raja Johari tamong lam kuta

Seureuta tandra dumna sipai  
Geusyik ngon waki dumna bintara  
U bale keumbang geiduek meuriti  
Maseng dum meuntri laporan jiba

Padumna tandra nyang tan keumbali  
Padum sipai nyang ka binasa  
Seureuta raja neubri mupeuti  
Rata jeuep pasi beukong tajaga

Bek roe tapike prang nyoe ka undi  
Jirieang lagi nyan raja Cina  
Meunan khalifah peurintah neubri  
Rakyat keumbali maseng lam kuta

Maseng dum jaga rata jeuep pasi  
Ulee ngon ili rata jeuep kuta  
Di Raja Bujang riwang keumbali  
Ubak isteuri Siti Geulima

Oh troh Blang Seupeueng diampon duli  
Jitron sinyak ti jipeumulia  
Neucok deungon ie dalam seurahi  
Ka neusragh gaki tuanku raja

Le Raja Jeumpa teuma neusudi  
Saleh cit pakri buet prang kakanda

Di Raja Bujang jaweueb le neubri  
Ngon tulong Rabbi ka talo Cina

Kuta Lhab Mana ulon seundiri  
Sinan habeh kri muprang ngon Cina  
Cina ka talo undo u pasi  
Jiplueng sang piti u laot raya

Rata jeuep kuta muprang ka sunyi  
Akan teutapi lam jaga-jaga  
Di Raja Bujang meunan neurawi  
Po bintang pari ka seungab haba

Oh lheueh nibak nyan geubeuot khanduri  
Keu ampon r uli ngon putroe muda  
Di Raja Jeumpa teutap lam sangsi  
Cina paseuti lagi jigisa

Teutap lam susah di raja duli  
Meugisa rawi u nanggroe Cina  
Ngon Ammabakdu laju lon singkrak  
Ratna Umbak ulon calitra

Jipreh-preh troh lakoe nyang ka jak  
Sampoe ohnoe hak goh lom meugisa  
Saleh cit tan le mate teukeupak  
Bak pie galak keu putroe muda

Teuma teupike di Ratna Umbak  
Bah le ulon jak jinoe pareksa  
Han ek kutheun le ate ku palak  
Meung hana kujak u nanggroe Jeumpa

Beudoh le laju di Ratna Umbak  
Keudeh bak bapak peurab le sigra  
Oh troh bak ayah di Ratna Umbak  
Narit dua krak ka jicalitra

Idin keu ulon jinoe hai bapak  
Ulon kheundak jak u Pulo Raja  
Ban napsu aneuk hana jitulak  
Di Ratna Umbak nyankeu ayahanda

Di Raja Silan seunang ngon galak  
Rakyat seureuntak jikrah le sigra  
Di Buniara jihkeu mat pucak  
Di Ratna Umbak ate that suka

Rakyat ka jitren rata jeuep suwak  
Keunan meusak sak u dalam kuta  
Cukop peukakah parang ngon tumbak  
Cukop meusigak bajee teumaga

Marit le raja kuasa mat hak  
Geutanyoe tajak u nanggroe Jeumpa  
Tajak bantu prang nyan lakoe sinyak  
Ka treb that jijak hana meugisa

Meunan bak raja haba dua krak  
Deumpek ngon surak dumna panglima  
Tanda seutuju meujampu galak  
Beundoh seureuntak laju jibungka

Seureuta putroe cut Ratna Umbak  
Beusama bapak nyan Silan raja  
Kapai beurangkat laku ka jijak  
Jitakat ubak nyan naggroe Jeumpa

Ka troh u Jangka hingga ka jijak  
Kapai ka nampak bak Raja Cina  
Dalam ie laot meuhayak-hayak  
Beuthat beujarak jituri cit ka

Kapai nyang dikeue cut putroe Umbak  
Dilikot bapak kapai tuan tha  
Ka deuh bendera hingga meuprak-prak  
Meutamah galak di raja Cina

Ret deh ngon ret noe lalu meurumpok  
Deungon diarak-jibri mulia

Di raja Cina peurab bak Bapak  
Laju jisingkrak kapai tuan tha

Peurab lom d udoe cut putroe Umbak  
Sujud bak tapak judo jih raja  
Lheueh peugah haba kada dua krak  
Raja Silan jak ho laen teuma

Tinggai ngon lakoe cut putroe Umbak  
Narit meutimplak phon-phon jibuka  
Muka nyang ceuken teukhen sang galak  
Lompi meulibak deungon ie mata

Tuanku ampon tanglong mubhak-bhak  
Ulon that galak ke putroe muda  
Keuepeue roe neusom leupah that jarak  
Cuba peunampak lon kalon rupa

Jeh pat di gampong nyoe ho ka neujak  
Lon meung eu cut nyak Meureudum Ratna  
Kareuna cantek baek that sigak  
Ek puseng utak soe kalon rupa

Oh lheueh lon kalon bangon ngon sigak  
Dilon bah lon jak laju lon gisa  
Bah tinggai raja sinoe ngon cut nyak  
Mangat peunoh hak di putroe muda

Sabab keu ulon tan le neugalak  
Ka na nyang rancak nyan putroe Jeumpa  
Keupeue lom guna nyoe Ratna Umbak  
Badan ka apak umu ka tuha

Meudeh ngon meunoe cut putroe timplak  
Ate ka palak di raja Cina  
Peudeueng lam sarong meucreueng jirantak  
Laju jimeutak timang bak muka

Tajo le nujum ka geukheun sikrak  
Jaroe bak talak jiangkat sigra  
Bek that tuanku tunu ngon palak  
Bit kureueng utak nyoe kaum hawa

Meungka jiratoh peue-peue nyang galak  
Narit nyang rusak hana jikira  
Yoh nyan di raja teiduek teuhenyak  
Peudeueng ka jisal lam sarong teuma

Marit lom dudoe cut putroe Umbak  
Peupuleh palak judo jih raja  
Ampo tuanku lampu mubhak-bhak  
Ate bek rusak hai pi meukuta

Meunyo tuanku han troh ban kheundak  
Bahle ulon jak tueng putroe muda  
Lon prang ngon kuta sigra teupipak  
Putroe lon rinthak keunoe ulon ba

Bahle buet ulon dua ngon bapak  
Nak gadoh rancak nyan ureueng Jeumpa  
Meunan ban narit di Ratna Umbak  
Atepi galak di po meukuta

Cit patot putroe jinoe beulayak  
Buet lon agak cit broh gata  
Tagaseh sayang po bungong meurak  
Ulon bek rusak sampoe binasa

Ulon ka malee puseng ngon utak  
Ka leupah lon jak keunoe u Jeumpa  
Meung goh troh napsu sampoe ban kheundak  
Beuhareuem tapak han le kugisa

Ka seungab haba ban dua pihak  
Di Ratna Umbak jiluem kutika  
Jipreh got uroe sampoe ban kheundak  
Cit ka patot hak meunan biasa

Piyoh lam kapai di laot jarak  
Kapai lam umbak meugisa-gisa  
Jidong meuriti lagi meusigak  
Umpama pucak gunong nyang raya

Sinyak tob eumpieng keuieng meuhayak  
Ureueng teungoh jak teudong meugisa

Bah teuduek haba nyan Ratna Umbak  
Jipreh-preh hak nyang jroh kutika

Tulo ek asee bulee jikeuprak  
Siwah jimeutak sideh lam hawa  
Buhu lon balek titek lon rumbak  
Kisah lon peujak u nanggroe Indra

Ngon Ammabakdu buhu lon tuka  
Kisah meuputa jinoe ho laen  
Nibak siuroe di Raja Muda  
Di nanggroe Indra dibale gadeng

Geudeauk meuhadap deungon bintara  
Deungon seureuta nujum nyang alem  
Simanyak hujum jikheun le sigra  
E po meukuta taseumbah dan taklem

Peuperangan brat that di nanggroe Jeumpa  
Ngon raja Cina akai jih sureng  
Jikeumeung jak tueng Meureudum Ratna  
Di Raja Jeumpa susah alaihem'

Phon-phon ka talo dum ureueng Cina  
Jinoe hai raja ka teuka laen  
Trok raja Silan di tuan Cina  
Ngon aneuk dara jih get that alem

Nan Ratna Umbak rancak han tara  
Ileumee mantra sangat that licen  
Meunankeu judo di raja Cina  
Didalam donya nit sa ngon laen

Simanyak nujum meunan beukata  
Di Raja Muda muka ka ceuken  
Rakyat lam naggroe neuyue seuranta  
Tuha ngon muda teuma ka jitren

Deungon pahlawan nyang teuga-teuga  
Meuntroe bintara dum ureueng ireng  
Bak raja nanggroe turon le sabda  
U nanggroe Jeumpa geutanyoe tatren

Tabantu lansong tulong aneukda  
Jiprang le Cina po bungong husen  
Ulon goh reupang bek panyang haba  
Beudoh le bungka meuireng-ireng

Taeu meukandran gajah ngon guda  
Deungon seunjata cokma ngon leumbeng  
Hingga sampoe le u Laot Twa  
Di Raja Muda Ingat lam dihen

Ret Darul Aman keunaan tabungka  
Taci pareksa meutroe nyang canden  
Meunankeu neukheun le Raja Muda  
Geujak le sigra ret nan ke geutren

U Darul Aman hingga sampoe ka  
Seureuta tandra bandum peungireng  
Di meutroe Buman geukalon rupa  
Geubri mulia laju ban ladem

Peutamong laju u dalam kuta  
Geupeukek lanja u bale gadeng  
Lheueh pajoh bu di Raja Muda  
Meungtroe pareksa ngon narit taklem

Ampon tuanku meukuta donya  
Lon kalon rupa sang-sang meulaen  
Lon kalon alat leungkap ngon tandra  
Saleh peue bala cuba neubareng

Teuma seuot le di Raja Muda  
Deungon seureuta sare teukhem-khem  
Wahe e meutroe eh peue roe haba  
Sidum noe bala cit mantong taiem

Nyan sare kaprang di nanggroe Jeumpa  
Ngon Raja Cina ka padum musem  
Hana jan habeh raja meusabda  
Dimeuntroepi ka muka ceuken

Muka ka pucat badan meugeumpa  
Takot le raja pangkat geupeutren

Hingga di meuntroe laju seuranta  
Neukrah ngon tandra geubri seunalen

Oh cukop alat siap seudia  
Beurangkat sigra meuntroe nyang canden  
Dua angkatan yoh nyan le bungka  
Pahlawan kha-kha hana ngon bandeng

Bah teuduek haba raja nyang bungka  
Lon puwoe haba jinoe ho laen  
Di Ratna Umbak ngon Raja Cina  
Deungon ayahanda nujum nyang alem

Jipeuduek pakat ban peuet seureuta  
Jroh that kutika jinoe jeuet tatren  
Nibak uroe nyoe bahle tangaza  
Meunan beukata nujum nyang alem

Di Raja Silan Peuhase tandra  
Dum alat ngaza meunan cit ladem  
Cut Ratna Umbak beudoh le sigra  
Jilhoh lam kuta cut putroe leunteng

Deuh jikalon nyan Raja Jeumpa  
Dalam astana judo disampeng  
Di Ratna Umbak laju beukata  
Beudoh ayahanda jinoe nak tatren  
Nibak uroe nyoe jroh that kutika  
Rata kuala kapai tagandeng  
Cut Ratna Umbak meunan beukata  
Kapai prang dumna peuudep meusen

Laju jitamong rata kuala  
Jigrob dum tandra meuireng-ireng  
Jiplueng meu'u-u bak pageue kuta  
Pacang ngon suda jitak u sampeng

Ureueng didalam ate ka lia  
Badan meugeumpa pikeran puseng  
Tinggai sidroe-droe nyang kreueh kuasa  
Meuriam lila laju jigandeng

Nakeu sineuk-neuk nyang lheueh seunjata  
Geusangga-sangga meunankeu ladem  
Leupah that meugriet ureueng lam kuta  
Dumna anggeeta rasa meuganceng

Meung sidroe han jeuet teubiet ulua  
Musoh dum lingka jipreh ngon leumbeng  
Meunankeu bandum rata jeuep kuta  
Susah seungsara akai dum puseng

Kuala Deli pasi Lhok Pawoh  
Kuala susoh raya that sawa  
Teuduek haba nyoe ohnoe taputoh  
Ureueng teungoh troh jinoe tamula

Di Raja muda ngon meuntroe utoh  
Surak dum riyoh teungoh geubungka  
Ubak Cot Gapu laju keunan troh  
Teuma ka geubloh dalam blang raya

Rot Paya Jagat geupeukah aroh  
Teuma ka rab troh u bineh kuta  
Hingga deuh geueu dum kawan musoh  
Sideh di jeuoh miseue seurangga

Deungonjisurak sangat that riyoh  
Teungoh jiruntoh dum pageue kuta  
Deungon meuriham dum kacah-kacoh  
Tunong ngon baroh tadeungo subra

Di meuntroe Buman teuma neupiyoh  
Bandum geusuroh le Raja Muda  
Aneuk seunapang yoh nyan ke geuboh  
Tunong ngon ba roh geuato tandra

Oh hase siap bandum seuluroh  
Dum utoh-utoh pahlawan teuga  
Di Raja Muda gajah geuparoh  
Peukeue u baroh kuta Lhab Mana

Irengan banja tandra tan putoh  
Geuhadap musoh dum tandra Cina

Di meuntroe Bumanpi tan le piyoh  
Geusawak bungkoh geugam cokma

U dalam sap prang laju ka geubloh  
Meuribee reutoh neuba ngon tandra  
Taek hai rakan tajam dum beutroh  
Takalon musoh ka jimat kuta

Pajan cit roe lom wahe rakan beh  
Meungkon yoh meugriet syeedara  
Yoh nyan phon geujak surak ngon riyoh  
Laju ngon musoh meuhadap muka

Di meuntroe Buman meunan neusuroh  
Leupah that utoh bak pimpin tandra  
Masa nyan prang phon that meugeurupoh  
Get that meugucoh suara cokma

Leupah that beungeh dum ureueng ban troh  
Kareuna musoh ka troh lam kuta  
Taeu geureupang badan dum putoh  
Ka seun-seun siploh ka mate Cina

Di Raja Silan jidong di jeuoh  
Jikalon ka troh dum laen raja  
Ureueng lam kutapi ka dum luloh  
Geutaubiet prah pruh bandum u luan

Nibak masa nyan muprang meugucoh  
Beunde dum geuroh lagee boh nangla  
Di raja Silan keunanpi ka troh  
Laju ka jibloh dalam kawan bha

Jihapit cokma meusu ban guroh  
Ureueng meuploh-ploh reubah teuhanta  
Bak meuntroe Buman keunan laju troh  
Leumah di jeuoh meuntroe peukasa

Laju le ka rab ngon meuntroe utoh  
Di raja biyoh teumanyong sigra  
Soe nama gata hai meuntroe utoh  
Lon kalon sunggoh bak tapoh tandra

Peue kajak tanyong hai raja biyoh  
Nyoekeu nyang buboh dum tandra gata  
Nyang meuntroe Buman nyoekeu baro troh  
Jinoe ku sampoh dum rakyat Cina

Dikah hai raja soe nama geuboh  
Nyang keunoe ka troh peue kajak mita  
Nyoe raja Silan nama lon geuboh  
Tunong ngon baroh keubit geuthee na

Tapeurab deunoe laju nyan beutroh  
Mangat kububoh ngon cokma raya  
Seuot le meuntroe peue roe ka ratoh  
Dilon han tom roh kuplueng lam ngaza

Meung dum ruman kah reubah oh kupruh  
Bek tajak peudeuh gata that teuga  
Yoh nyan beungeh that si raja biyoh  
Ka jisahidoh ngon cokma raya

Keunong le gajah bulee dum putoh  
Di meuntroe utoh geumarit sigra  
Keupeue ngon gajah salah jih tan roh  
Hai Raja biyoh ngon lon tacuba

Sira neukheun nyan neugrob u baroh  
Bak tanoh ka troh teudong le sigra  
Deungon seunjata bak jaroe teugoh  
Siap geububoh musoh ube na

Di raja Silan jipoh han teudaoh  
Di meuntroe utoh neukilah saja  
Han tom meung sigo keunong bak tuboh  
Lhee deupa jeuoh meuntroe ngon cokma

Di raja Silan ke reubah reuboh  
Ka teubiet reuoh sampoe lam mata  
Ka sikhan uroe jipoh han teudoh  
Meuntroe that utoh nibak boh sangga

Ka beungeh raya di raja biyoh  
Na miseue guroh jihapit cokma

Meuntroepi silab langkah hana roh  
Cokma bak tuboh keunong le sigra  
Laju bak bumoe meuntroe ka jatoh  
Napah ka putoh tan le keulua  
Di raja Silan jigrob le mupruh  
Jimeung tamah poh nak mate pana

Gajahpi sigra hingga keunan troh  
Meuntroe ka jiboh uyub lungkiek pha  
Han jeuet le jipoh di raja biyoh  
Minah u jeuoh yoh nyan di raja

Han jeuet meung sidroe peutoe keunan troh  
Ka jiwiet tuboh le Sigumtala  
Meuntroe ngon gajah sinan ka piyoh  
Laen han teudoh teungoh dum subra

Uroe nyan geuprang sang-sang seunujoh  
Tamatum beureutoh dum bruek keupala  
Seun-seun silangkah ka tiwah musoh  
Surot u baroh lam kapai raya

Kauala Jangka hana le musoh  
Peupeurangan di Raja Muda  
Keudeh Lhab Mana laju ke neubloh  
Di sinan riyoh muprang goh reuda

Sampoe Krueng Juli keunankeu ka troh  
Ohnan ka piyoh dilee keuraja  
Keu neutroe Buman jinoe lon ratoh  
Oh puleh tuboh neubeudoh sigra

Oh ban neukalon mantong dum musoh  
Neubeudoh mupruh neuhila cokma  
Jeh raja Silan neueu lom ka troh  
Ate neupeukreuh peutoe le sigra

Hana lom mate hai aneuk biyoh  
Nyansa kububoh bunoe ngon cokma  
Meuntroe peurab le leugat keunan troh  
Ka neusahidoh u ateueh raja

Di raja Silanpi get that utoh  
Peusiblah tuboh leupah bak mara  
Di meuntroe Buman neupoh han teudoh  
Keunong le tuboh raja cilaka

Ka beukah ulee takue ka putoh  
Di raja biyoh yoh nyan binasa  
Jipeurab laen keunan dum ka troh  
Di meuntroe neupoh hana ban publa

Di meuntroe Begu laju keunan lom troh  
Nyan sukee musoh saboh keupala  
Ngon meuntroe Buman laju mupoh-poh  
Tadeungo preh proh meupula-pula

Di Raja Muda keunanpi ka troh  
Meuribee reutoh nauba ngon tandra  
Di meuntroe Begupi laju beudoh  
Hana peue teuoh sabe that padra

Masa nyankeu prang leubeh lom sunggoh  
Sabab ka na teoh bantuan teuka  
Maken geukarat hana geupiyoh  
Ka meugeurupoh miseue keurija

Teuku bantuan teuma blah musoh  
Taeu jilaboh ngon kapai bahtra  
Keureucheng keureuchong tunong ngon baroh  
Po Cina biyoh jipeusak teuga

Ka leubeh garang lom kawan musoh  
Sabab ka le troh bantuan teuka  
Teutapkeu muprang hana lom piyoh  
Teungoh that sunggoh bandua tandra

Tapot on panjoe peuget seuniba  
Tapot on capa tasumpai dadeh  
Deungo lon peugah keu raja Jeumpa  
Deungon kakanda raja nyang aref

Oh ka lhueuh idin bak putroe muda  
Neuek cong guda banta peureuseh

Laju beurangkat raja bandua  
Neumasok ngaza hingga ke keudeh

Teutap di putroe-dalam astana  
Adoe ngon po da ate ka seudeh  
Siti Geulima ka sro ie mata  
Meureudum Ratna ~~ka~~ pok-pok binteh

Di Raja Bujang ngon Raja Jeumpa  
Kuta Lhab Mana sampoe le keudeh  
Oh neukalon prang timang that padra  
Pahlawan dum kha ret noe ngon ret deh

Lom meuntroe Buman ngon Raja Muda  
Sinanpi ke na bandua meuceh  
Teugoh geumeucang ka lagee raya  
Dum tandra Cina reubah teueh-eh

Ka teuhah babah di Raja Jeumpa  
Pajah geuteuka dua ureueng jeh  
Saleh soe bri thee u nanggroe Indra  
Soe nyang bri haba bak meuntroe keudeh

Oh lheueh nibak nyan di Raja Jeumpa  
Deungon kakanda laju meubareh  
Hingga muprang le ureueng nyan dua  
Meulingka-lingka keunoe ngon keudeh

Na miseue kilat jilumpat guda  
Cina seureupha geupoh teueh-eh  
Yoh nyan meukarat dum ureueng Cina  
Leubeh meulaksa nyawong ka habeh

Teutap geumuprang hana lon reuda  
Keu Raja Cina lon peugah keudeh  
Di Ratna Umbak bijak lagee na  
Jikalon tandra le that ka habeh

Ka padum uroe prang goh lom reuda  
Blah ureueng Jeumpa le that nyang aref  
Di meuntroe Buman ngon Raja Muda  
Jieupi ka keunan lam bareh

Teuka lom bantu bak Raja Jeumpa  
Deungon kakanda keunan ke habeh  
Hana le tinggai dalam astana  
Illa cit nyang na cut putroe aref

Dua ngon cuda Siti Geulima  
Didalam rukha ate that peudeh  
Di Ratna Umbak meunan eu rupa  
Keubit troh mata nyan inong paleh

Jikheun bak nujum laju le sigra  
Wahe peundita pakri ban nyang gleh  
Seuot le nujum hai putroe muda  
Ban-ban nyang haba hai putroe puteh

Teuma bak ulon turutan saja  
Hana meudawa meunoe ngon meudeh  
Meunankeu jihkeun nujum peundita  
Diputroe muda jikheun lom meuceh

Meunyo ka meunan hai guree hamba  
Ulon beusigra jinoe lon peuceh  
Dan harap lom lon bak judo raja  
Bek na meudawa meunoe ngon meudeh

Tatawan jinoe Meureudum Ratna  
Dalam astana jinoe teungoh eh  
Lom ureueng lakoe meung sidroe hana  
Ka dalam ngaza bandum ka habeh

Mangat that tacok cut putroe muda  
Hana soe jaga meung sidroe sideh  
Meunyo ka meunan hai judo raja  
Ban hukum gata heu Jeumpa puteh

Cut putroe jibeuet saboh doa  
Jeuet ciem pala saboh nyang aref  
Keudeh Blang Seuprueng teureubang sigra  
Dalam astana sampoe le keudeh

Ka teudong laju nibak jeundela  
Meureudum Ratna disinan teueh

Oh lheueh nyan teuma di cicem pala  
Jibalek rupa ka laen ureh

Yoh nyan ka jeuet le miseue geureuda  
Putroe jisamu puwoe le keudeh  
Keudeh lam kapai hingga sampie ka  
Beudaoh le raja bak putroe puteh

Oh ban jipeurab laju jimeung wa  
Cut putroe Ratna jikheun le meuceh  
Tapiyoh dilee wahe meukuta  
Na kaoi naza dilon uroe jeh

Tamita dilee nyan peutoe kaca  
Sikinpi beuna saboh nyang puteh  
Meunyo hana nyan wahe meukuta  
Ulon nyoe sigra umu ku habeh

Meunanakeu dilee ka lheueh meunaza  
Meunyo ka neuba ulon nyoe keudeh  
Teuma jibri ngon peutoe kaca  
Meureudum Ratna jilob le keudeh

Ka jilob putroe lam peutoe kaca  
Jigunci sigra le putroe aref  
Sikin bak jaroe nyang tajam mata  
Meureudum Ratna disinan teueh

Yoh nyan ka tahe di raja Cina  
Mublek-blek mata di raja paleh  
Jipeurab laju bak peutoe kaca  
Jicom ngon jiwa kaca nyang puteh

Umpama ureueng ka pungo gila  
Jilisi kaca keunoe ngon keudeh  
Singkee ka teupluek teuot ka luka  
Darah keulua rasa ke peudeh

Alah hai putroe tepeungeut hamba  
Ulon dilua takeubah meuceh  
Tabuka peutoe hai putroe muda  
Geutanyoe dua nak sapat taeh

Teuma seuot le Meureudum Ratna  
Raja cilaka kajak weh keudeh  
Keupeue ngon ulon kajak meuseunda  
Judo droekeu na jeh pat nyang got gleh

Gata ngon ulon han sabe bangsa  
Kon galak ku raya hai raja paleh  
Meunankeu jikheun le putroe muda  
Di raja Cina tunu jih habeh

Jicok le kapak jimeungproh kaca  
Cut putroe raba sakin nyang puteh  
Peiduek bak rukueng laju le sigra  
Deungon seureuta neukheun le meuceh

Meunyo ka kaproh nyoe peutoe kaca  
Ulon binasa nyawongpi habeh  
Ban raja deungo meunan meuhaba  
Kapak nyan sigra jisrom u binteh

Teutap cut putroe lam peutoe kaca  
Teutap di raja hatejih peudeh  
Keu nujum Cina meugisa haba  
Jipeujeuet rupa keu kleueng nyang puteh

Jipo le laju keudeh lam tandra  
Ngon basa Cina jimarit meuceh  
Bek le tamuprang beudoh jak gisa  
Cut putroe ka na lam kapai sideh

Oh ban jideungo le tandra raja  
Jiplueng meubura gisa le keudeh  
Geulet di likot le ureueng Jeumpa  
Nibak geusangka peupearangan habeh

Geusangka talo si Raja Cina  
Hate geumbira di raja areh  
Meuntroe Cung Huan yue talo ngaza  
Geudubang raya ke sret di sideh

Saleh nyan keu jeuet geukheun nan paya  
Sampoe jinoe'na sideh Blang Beuladeh

Teutap habah woe dum tandra Cina  
Dalam astana neugisa keudeh

Masa yoh jicoh cut putroe Ratna  
Uleh geureuda nyang leupah paleh  
Habeh dum karu asoe astana  
Siti Geulima leupah that seudeh

Teutap dum geumoe didalam rugha  
Keu Raja Jeumpa ulon kheun keudeh  
Oh habeh jiplueng dum tandra Cina  
Peupeurangan ka bla jeuet takheun habeh

Deelat tuanku laju neugisa  
Dalam astana ubak cut puteh  
Seureuta bandum ngon tuan tha  
Deungon kakanda laenpi habeh

Hingga ka sampoe bak pinto kuta  
Siti Geulima teungoh that seudeh  
Oh ban geukalin ka woe adekda  
Geupeurab sigra laju le keudeh

Geujak peugah droe ka salah raya  
Sabab ka jiba cut putroe puteh  
Mangat bek salah dum asoe kuta  
Nak bek murka bak bungong mireh  
Alah hai adek pi bintang kala  
Cut Putroe Ratna ka jiba keudeh  
Keunoe bunoe teoh saboh geureuda  
Putroe jisama dalam tika eh

Ka keuh jipupo hana meuho ka  
Oh nankeuh haba cut putroe peuceh  
Ureueng sineuna ka sret ie mata  
Di Raja Jeumpa leupah that seudeh

Nyang leubeh susah lom Raja Muda  
Sabab aneukda nyang that neugaseh  
Teutapkeuh bandum didalam duka  
Meuntroe ngon raja teutap lam seudeh

Oh lheueh nibak nyan di Raja Jeumpa  
Dalam astana neukeuh le keudeh  
Neusuet ngon bajee tiek kulah kama  
Peiduek ngon cokma keubah deungon kreh

Laju neupioh diateueh tahta  
Dungan ie mata habeh han habeh  
Yoh nyan di rakyat hajat jak gisa  
Muhon bak raja jaroe ditindeh

Di Raja Bujang seuot le sigra  
Ka jeuet ta gisa siat hai wareh  
Singoh oh watee tajak prang Cina  
Lon meuhei teuma bandum beuhabeh

Oh ka lheueh idin bandum jak gisa  
Di Raja Mudapi neuwoe keudeh  
Sama teungoh ret neusro ie mata  
Akan anéukda sabe that peudeh

Hana geutupeue sidumnan bala  
U nanggroe Cina ka jiba keudeh  
Hana peue panyang ulon calitra  
Maseng u tangga sampoe le keudeh

Jinoe lon peugah keu Raja Jeumpa  
Dalam astana disinan teueh  
Ka sret ie mata basau ngon dada  
Hana tom haba po Jeumpa puteh

Hana meungsidroe jeuet peugah haba  
Cit sidroe raja disinan teueh  
Meungbu deungon ie hana neukira  
Pike meuputa meunoe ngon meudeh

Ingat keu judo ke leupuh gob ba  
Sang-sang bak muka adang jicureh  
Soekeu han malee lagee nyan cara  
Dak jeuet bak muka tatob deungon kreh

Jeuet takheun polem meung jicok cuda  
Jeuet takheun apa menunyo jicok teh

Jeuet takheun parui nyo adoe gob ba  
Jeuet takheun teuma keumuenteu meuceh

Meung jicok inong sang keunong nuga  
Maleeteu raya leumpah that seudeh  
Meunan teupike di Raja Jeumpa  
Deungon ie mata dalam tika eh

Teutapkeu susah sabe di raja  
Jinoe calitra laen lon tuleh  
Dicong bak rambot meulot ceumpala  
Aneuk leuek kua dicong bak manggeh

Rata jeuep nanggroe gob mupru haba  
Keu Raja Jeumpa ka jipeujayeh  
Inong nyan sajan ke leupah gob ba  
U nanggroe Cina ka jiba keudeh

Hingga ka meugah bak Musif Tapa  
Beungehneu raya di ponek areh  
Keu Raja Jeumpa neutimplak haba  
Neukheun le sigra meunoe ngon meudeh

Sabab keu ulon dijih ka lupa  
Han leumah guna masa uroe jeh  
Oh ka na putroe kon droe geumbira  
Di nanggroe Jeumpa laloe disideh

Keunoe meung sigo tan le jiteuka  
Oh lheueh meusua masa uroe jeh  
Nyankeu roe jinoe baro jirasa  
Putroe gob hila dalam tika eh

Oh lheueh neukheun nyan di Musif Tapa  
Ka neuteupok pha poni nyang areh  
Jiteubiet asap meubura-bura  
Roh ka keulua raja disideh

Dalam meuligoe po Raja Jeumpa  
Pangsan le sigra dalam tika eh  
Ka keunong sakti bak Musif Tapa  
Jen pari raya nyang ba disideh

Ka neuyue pupho lam awan mig  
Neuyue peugisa keunoe ngon keudeh  
Sabab ka beungeh di Po Ni Tapa  
Keunong enanya raja disideh

Teutapkeu sabe lam jen peuba-ba  
Lon puwoe haba jinoe lom keudeh  
Dalam meuligoe yoh nyan ka subra  
Siti Geulima nyang leubeh seudeh

Neuka lon adoe teueh teuhanta  
Nafah han le na po bintang pareh  
Di Raja Bujangpi sampie subra  
Ureueng troh teuka sinoe ngon sideh

Dum jijak kalon nyan Raja Jeumpa  
Dalam astana nyawong ka habeh  
Dalam meuligoe riyoh that subra  
Ingar keu raja nyang that jigaseh

Nyang leubeh riyoh Siti Geulima  
Jimoe meu u—u jiboh ngon reun teh  
Alah hai adoe po Raja Jeumpa  
Tuhan bri balah habeh han habeh  
Judoteu jiba le raja Cina  
Dalam astana gatapi teueh  
Watee lon ingat hanco that rasa  
Tatinggai cuda didalam seudeh

Teutap lam bae Siti Geulima  
Panyang calitra han peue lon tuleh  
Di Raja Bujang peurintah sigra  
Neuyue seudia le ija puteh

Neuyue seumanoe nyan Raja Jeumpa  
Ládom jak buka kubu disideh  
Diteungku imum neukek le sigra  
Mayet neubuka laju ka habeh

Oh ban teungku mat bak teuntang dada  
Seuum mantong na bintang peureuseh  
Diteungku imeum laju beukata  
Nyoe Raja Jeumpa umu goh habeh

Yoh nyan geudeungo Siti Geulima  
Geupeurab sigra laju le keudeh  
Neumueng le ulee yoh nyan le cuda  
Suka dan duka jampu lom seudeh

Teutapkeu dum moe dalam astana  
Keu Musif Tapa tagisa keudeh  
Jen pari bunoe neuhei le sigra  
Neuyue peugisa aruah keudeh

Malam ngon uroe ka leupah Isya  
Jen pari gisa teuma le keudeh  
Jijak puwoe roh po Raja Jeumpa  
Deungon rasia lom ka jipeuceh  
Oh troh jen pari dalam astana  
Leumah rasia banta peureuseh  
Na nyum meurumpok ngon Musif Tapa  
Neukheun le sigra bak bintang pareh

Kareuna keu lon aneuk talupa  
Sidum nan guna masa uroe jeh  
Han le taingat keu lon nyang tuha  
Teugoepi ka na cut putroe puteh

Sidumnoe naseb jinoe tarasa  
Putroe ka gob ba gata jayeh  
Beuthat bumeunan wahe aneukda  
Dilon keu gata get lon gaseh

Jinoe tabeudoh hai bintang kala  
U nanggroe Cina tabungka keudeh  
Tajak cok pulang cut putroe muda  
Deungon na doa pa ma nyang jayeh

Jinoe hai aneuk na saboh haba  
Lon kheun bak gata hai bintang pareh  
Jinoé phon tajak u Ujong Raja  
Rab samalanga ulon kheun meuceh

Nibak teumpat nyan sinan raja kra  
Beurahman Indra eundatu meuceh  
Disinan jiduek didalam tapa  
Ka padum masa disinan jieh

Meunankeu cuco di Bungsu Indra  
Di laksamana keuenkeu meuceh  
Keunankeu tajak dilee aneukda  
Ubak raja kra tamita gaseh

Oh ka lheueh habeh leumah rasia  
Teukeujot sigra bintang peureuseh  
Neukalon ureueng sinan dum lingka  
Abang ngon cuda sinan lam seudeh

Laen lom rakyat tuha ngon muda  
Dalam astana peunoh meulapeh  
Teuma neutanyong le Raja Jeumpa  
Peue na peukara bahya seuleuseh

Di Raja Bujang seuot sigra  
Wahe adekda cahya peureuseh  
Gata ka pangsan didalam tika  
Nibak lon sangka umu ka habeh

Ka tujoh uroe mumetpi hana  
Kamoe sineuna bandum that seudeh  
Napsupi hana lon eu keulua  
Nyang na bak dawa seuum disideh

Pakonkeu meunan wahe adekda  
Bak peunyum rasa hai bintang pareh  
Alah hai cut bang lon teumeureuka  
Ngon Musif Tapa po ma disideh

Masa ulon jaku nanggroe Indra  
Nyan Musif Tapa keu lon that gaseh  
Gob nyan seuleuh nyan putroe muda  
Ma Musif Tapa akai that areh

Teuma di ulon ka roh that lupa  
Lon ingat hana keu po ma seudeh  
Ohnankeu narit di Raja Jeumpa  
Ureueng lam kuta hana le seudeh

Bahle takeubah kisah keu raja  
Laen calitra jinoe lon tuleh

Bungong sitahon lam taman sari  
Keumang meuriti ngon bungong meulu

Buhu lon ubah kisah lon gantoe  
Lon pphon rawi ngon Ammabakdu  
Na saboh gampong tanglong meuriti  
Karonyo Rabbi leupah that makmu

Nyan Samalanga nama geurasi  
Mudah raseuki leupah meusyeuhu  
Nyang mat peurintah dilee hai akhi  
Tuanku duli nyan Indra Bungsu

Aneuk dua droe nyang laki-laki  
Pi bintang pari ka troh-troh umu  
Hajat jak intat teumpat meungaji  
Akan teutapi ka hana teungku

Hingga le meugah bak raja duli  
Teumpat meungaji nyang that meusyeuhu  
Di nanggroe Jeumpa yang ka geuturi  
Sinan nyang ahli na sidroe guru

Raja jak intat po bintang pari  
Bak teungku Suphi neukeubah laju  
Teutapkeu sinan pi banta saidi  
Dalam meungaji tiep-tiep wakeutu

Aduen ngon adoe ragoe that ahli  
Muphom areuti jiwoe ngon nahu  
Teungkupi galakpi hana sakri  
Keu aneuk duli nyan Indra Bungsu

Beuruhaman Indra aduen geurasi  
Po banta saidi nyang that meusyeuhu  
Nan laksamana teuma lom lagi  
Nyankeu hai akhi adoe nyang bungsu

Neubeuet ka tamat po banata saidi  
Ileumee neubri habeh le teungku  
Nibak siuroe teungku neukheun kri  
Neukeumeung uji murid le teungku

Tujoh bak iboh timoh meuriti  
Bak bineh pasi teudong-dong sulu  
Meunankeu tanda teungku nak uji  
Toh-toh nyang meuri cukop ileumu

Siap ngon leumbeng maseng bak jaroe  
Di teungku syeikhi neukheun le laju  
Tatop beuteumboh iboh meuriti  
Bubeusot meuri ban tujoh laju

Murid jitob le yoh nyan jiuji  
Na meung lhee senti bak iboh mampu  
Beurahman Indra teuma lom lagi  
Jikab ngon bibi jitob le laju

Peuet bak ka beusot iboh meuriti  
Hana lom uji po bintang timu  
Laksamana lom lheueh nyan hai akhi  
Jiglong ngon gasi jitob le laju

Ban tujoh teumboh iboh meuriti  
Di teungku syeikhi yoh nyan teuharu  
Oh lheueh nibak nyan gisa keumbali  
Teumpat meungaji keudah le laju

Di gle Peudada tapula campili  
Hawapi leupie tanohpi rumbu  
Deungo lon peugah keu teungku syeikhi  
Aneukkeu sitipi ke troh umu

Ruman jihpi gleh puteh ngon tari  
Leupah get budi tingkah ngon laku  
Nyan Siti Indra nama geurasi  
Dalam bekeuti keu ma deungan du

Teungku peukawen canden juhari  
Ngon aneuk duli nyang that meusyeuhu  
Beurahman Indra jeuet keu suami  
Judo sinyak ti cut bungong meulu

Meugaseh sayang malam ngon hari  
Laki isteuri dalam meurindu

Neubri uleh po sadroe nyang gaji  
Hame sinyak ti yoh nyan le laju

Sikureueng buleuen jeuet kheun ka meuri  
Hame sinyak ti pi bungong meulu  
Nibak siuroe marit suami  
Ubak isteuri neupeugah laju

Idin hai judo ulon keumbali  
Jak saweue umi seureuta abu  
Hana treb lambat disideh lawi  
Lon gisa lagi oh troh seumingga

Meunankeu neukheun le bintang pari  
Seuot sinyak ti yoh nyan le laju  
Meunyo ka neujak hai ampon duli  
Pane na meukri neuttingai aku

Ate lon susah malam ngon hari  
Meurasa sunyi oh tan le teungku  
Meunyo ka meunan wahe enyak ti  
Peugah bak umi deungon bak abu

Meunyo le gob nyan idin ka neubri  
Ka jeuet hai nyak ti taseutot aku  
Siti Indra tren lansong bak abi  
Jijak peugah kri yoh nyan le laju

Seuot le abu laju neukheun kri  
Bak lon hai nyak ti han jeuet kheun sapeue  
Kareuna jiba uleh suami  
Jak saweue umi seureuta po du

Meunyo ulon tham salah bak Rabbi  
Gata hai nyak ti kon le hak aku  
Beuthat beuhate diulon sangsi  
Idin ulon bri hai bintang timu

Idinpi ka lheueh jitren sinyak ti  
Ubak ka geubri jipeurab laju  
Yoh nyan jipeugah ubak suami  
Idin ka geubri dilon le abu

Ate ka seunang po bintang pari  
Singoh peureugi ate ka rindu  
Uroepi malam alam ka sunyi  
Laki isteuri geujak beuradu

Oh puteh timu jimeusu cie-cie  
Alam Ilahi yoh nyan phon karu  
Cicem teureubang kiam meunyanyi  
Mita raseuki dialam makmu

Beudoh Ti Indra deungon suami  
Geujeb deungon ie pajoh deungon bu  
Oh lheueh ka hase samasikali  
Meungui sinyak ti yoh nyan ke laju

Oh lheueh nibak nyan jitren bak abi  
Deungon suami po bintang timu  
Deungon laksamana adoe lom lagi  
Geujak peugah kri keudeh bak teungku

Idin keukamoe jinoe teungku bri  
Gisa keumbali u nanggroe po du  
Hana peue salah hai bintang pari  
Idin ka lon bri hai bintang timu

Tapi wasiet lon mangat tatukri  
Bek roh teukeudi bala Tuhaniku  
Oh troh u Pandrah tuah kudangdi  
Beuhati-hati hai bungong meulu

Sibak geulumpang rindang han sakri  
Timoh ka lawi rab Batee Geulungku  
Bek roh tapiroh sinan hai nyak Ti  
Beuthat barangri tarek uroe hu

Dalam krueng Pandrah bek roh tamandi  
Wasiet ulon bri mangat tatupeue  
Meunankeu neukheun le teungku syeikhi  
Po banta saidi beurangkat laju

Beurahman Indra deungon sinyak Ti  
Keulhee lom lagi adoe nyang bungsu

Na padum na treb geujak ngon gaki  
Yoh nyan sampoe le bak wasiet teungku

Ka troh u Pandrah po banta saidi  
Adoe neukheun kri yoh nyan le laju  
Piyoh hai cut bang siat beurhenti  
Saket han sakri pruet di aku

Lon kada hajat siat u teupi  
Meunan neukheun kri po bintang timu  
Di Laksamana leupah peureugi  
Jinoe lon rawi keu aduen teungku

Beurahman Indra deungon sinyak Ti  
Laju peureugi seun-seun sigeutu  
Sibak geulumpang ramphak han sakri  
Reului ngon leupie sinan hai teungku

Geujak piyoh le po banta saidi  
Deungon isteuri po bungong meulu  
Ka na sikeujab piyoh beurhenti  
Geutren jak mandi dalam krueng laju

Gob nyan dua droe laki isteuri  
Tuhan teukeudi laju jeuet keu bue  
Oh lheueh nibak nyan adoe keumbali  
Ka geupeureugi keunan le laju

Geukalon aduen deungon sinyak Ti  
Ka na peuet gaki ka na ngon iku  
Di Laksamana geumoe meui-i  
Sayang han sakri aduen jeuet keu bue

Alah hai cut bang peuekeu teujadi  
Tuhan ka neubri sidumnoe laku  
Atra ka geutham bunoe le syeikhi  
Han tapeuduli ban wasiet teungku

Alah hai cut bang sayang han sakri  
Ka jeuem teukeudi kheundak Tuhanku  
Hokeu lon jak tinggai seundiri  
Tanle arti cut bang jeuet keu bue

Sira ngon jimoé po bintang pari  
Tajo sang piti keunan le laju  
Di buepi pantah peusiblah diri  
Keudeh jibati cong geulumpang laju

Beuthat geulumpang raya ngon tinggi  
Adoepi lagi ka geukek laju  
Ka geulet cut bang ngon tuan siti  
Ulee ngon ili bak cabeueng sulu

Oh geudrob keunoe keudeh jibati  
Keubiet that ahli oh ka jeuet keu bue  
Teutap di adoe tanle beurani  
Gisa keumbali laju bak teungku

Deungon ie mata ile bak pipi  
Teukui u gadi ate that pilu  
Na padum lawet hana treb lawi  
Po bintang pari sampoe bak teungku

Ubak syekhuna haba geurawi  
Sama sikali ulee ngon iku  
Guree neujawueeb kajeuem teukeudi  
Pakri tatkri kheundak Tuhanduk

Atra ka lon tham han jipeuduli  
Po banta saidi ngon bintang timu  
Oh lheueh neukheun nyan di teungku syeikhi  
Ngon jeue sakti neujok le laju

Jinoe gisa lom hai bintang pari  
Jinoe lom lagi tajak d rob laju  
Laksamana tren teuma peureugi  
Ngon jeue sakti neubri le teungku

Uyub geulumpang ka troh peureugi  
Hana le lanti ka neukek laju  
Teumuda ngon bang isnan beureunti  
Meutumpang gaki meuwet-wet iku

Laksamana tiek le jeue sakti  
Bue ka jibati bak cabeueng sulu

Laksamana grob keunan lom lagi  
Hana beurheunti ka neulet laju

Keunoe ngon keudeh jilisi-lisi  
Taeu jinari barat ngon timu  
Meurasa payah po bintang pari  
Na sikhan hari goh lom beuteumu

Ka neulet sabe hana beureunti  
Yoh nyan Tuhan bri ka roh le laju  
Ka roh po a duen dalam jeue sakti  
Tinggai sinyak Ti po bungong meulu

Oh ban jikalon ka roh suami  
Han le jilari sinyak Ti meulu  
Laksamana jrat keunan lom lagi  
Deungan suami meusapat laju

Lheueh nyan ngon taloe neuikat gaki  
Puwoe keumbali keudeh bak teungku  
Oh sare troh puwoe keumbali  
Laksamana bri laju bak teungku

Teungku peupuleh po banta saidi  
Deungan sinyak Ti bek le keu jeuet bue  
Na tujoh uroe dudoe Tuhan bri  
Muwoe keumbali rupa ban dulu

Takoh bak mane keu alee jeungki  
Takoh bak giri keu pha geulungku  
Deungo lon peugah akan sinyak Ti  
Bunoe hai akhi masa keu jeuet bue

Di cong geulumpang bunoe Tuhan bri  
Ka lahe bayi po bintang timu  
Rupa lagee bue laju le meuri  
Meunan teukeudi nibak Tuhanku

Lam bak geulumpang ka jiseumbunyi  
Uleh sinyak Ti bak masa dulu  
Jinoe disinan tinggai seundiri  
Leupah keumbali umi ngon abu

Makanan hana sapeue tan soe bri  
Sayang meui-i sinan aneuk bue  
Jitren disinan teuma peureugi  
Ret bineh pasi leugat meunuju

U Ujung Raja sampoe Tuhan bri  
Bak teumpat sunyi na sidroe teungku  
Geiduek lam tapa aulia supi  
Le that sakti sinan bak teungku

Oh troh aneuk bue keunan peureugi  
Di teungku supi ka habeh umu  
Tinggai raja kra sinan seundiri  
Teumpat beurheunti lam guha batu

Keu Raja Sambang bah ohnan rawi  
Gisa keumbali keudeh bak dulu  
Malam ka jula rasa ka sunyi  
Sikeujab lagi ka puteh timu

Di gob ka pangsan lam alam mimpi  
Dilon hai akhi laloe ngon buku  
Bubok beuringen angen mimpi  
Dilanget tinggi bintang meutabu

Buhu lon ubah kisah lon gantoe  
Bah le ulon ci ri-ri nyang laku  
Pat-pat nyang salah keubah bek asi  
Upat ngon caci bek roh hai teungku

Dalam linggong krueng ureueng keumawe  
Dalam linggong gle ureueng meurus  
Di Raja Jeumpa lam susah sabé  
Ie mata ile tiep-tiep kutika

Ingat keu judo hanco that ate  
Padum treb ka cre jiba le Cina  
Yoh nyan di raja hingga neupike  
Ban wasiet po ni dalam rasia

Neulakee idin teuma yoh nyan le  
Bak cuda kande deungan kakanda

Oh ka lheueh idin bandum geusare  
Beuthat beuile deungon ie mata

Neutren le neujak pirak meuble-ble  
Yoh nyan phon neucre deungon seedara  
Siti Geulima rusak that ate  
Putroepi tan le adoe jibungka

Oh leupah kuta raja ka neucre  
Hingga sampoe le lam Blang Peudada  
Laju u Pandrah langkah ka sampoe  
Lheueh nyan neujak le u Ujong Raja

Deungon ie mata tan reuda ile  
Beukah that ate hanco that rasa  
Nyang meunan ma cam padum jan sabé  
Susah that ate di Raja Juempa

Meugrak teukeudi bri Rabbul kade  
Ka meurumpok le deungon raja kra  
Geumubri saleuem buleuen muble-ble  
Teuma tanyong le uleh raja kra

Meung pat bu nanggroe cut bang boh ate  
Meusoe nan abi deungon ibunda  
Pakon jeuet susah ie mata ile  
Peue na meusueke saleh peue bala

Alah hai adoe bek roe tanyong le  
Han jeuet lon pike wahe adekda  
Di nanggroe Jeumpa teumpat lon lahe  
Nama di umi Ratna Keumala

Raja Abdullah nama di abi  
Bandua tan le ka hilang nyawa  
Nyang jeuet ulon moe adoe boh ate  
Cut putroe kande leupah Cina ba

Nanggroe lon jiprang le Cina kafe  
Rakyat dum mate hanco ngon kuta  
Inong lon jicok rampok yoh nyan le  
Nyankueu jeuet ate dilon that luka

Di Raja Sambang yoh nyan seuot le  
Cut bang boh ate bek le that luka  
Bah tacok pulang cut putroe kande  
Si Cina jahe bah taprang sigra

Ulonpi sajan lon ikot sare  
Hudep ngon mate ulon seureuta  
Keumah ngon pakat meuhat ka hase  
Teuma beudoh le laju geubungka

Langoe lam laot bandue sare  
Bakat meugule ube-be raya  
Hana meung bacut kuyuet lam ate  
Meulangoe sabe tiep-tiep kutika

Ka na lhee uroe adoe boh ate  
Han ek langoe le di Raja Jeumpa  
Atot ka kuweut ka tho ngon ate  
Teuma neukheun le ubak raja kra

Dilon hai adoe bagoe rab mate  
Sang-sang hana le dilon kuasa  
Raja Sambang kheun cut bang boh ate  
Bak rueng lon bahle neukeusigra

Laju atueuh rueng raja ka sampie  
Neumumat sare bak bulee sua  
Di Raja Sambang hana yo ate  
Jilangoe sabe sangat kuasa

Iku jih panyang miseue go kawe  
Badan ube gle Seulawah dara  
Meubuleueh-buleuen meulangoe sabe  
Hingga sampie le u nanggroe Cina

Teungoh u darat leugat yoh nyan le  
Bandua sare deungan raja kra  
Uroe ka malam bintang meuble-ble  
Alam ka sunyi ra sa ka pana

Bak masa nyankeu ceudieng boh pade  
Jak pareksa le seulingka kuta

Ngon Raja Sambang jiikot sare  
Hingga ka sampoe bak pinto kuta

Pahlawan jaga raya ube-be  
Jigulam beude jimat ngon cokma  
Di Raja Jeumpa geunta lam ate  
Pakri ban hase tamong lam kuta

Timu ngon barat neulise-lise  
Bacut hana pre siat jijaga  
Teutapkeu sinan tamong han hase  
Malam ka akhe ka na poh dua

Meugrak teukeudi bri Rabbul kade  
Suloh nyang akhe oh nan hat hingga  
Di Ratna Umbak yoh nyan jaga le  
Didalam ate mulai goga

Jicok teureupong di inong jahe  
Yoh nyan jilhoh le u lua kuta  
Leumah jikalon po ceudieng pade  
Bandua sare deungon raja Kra

Di Ratna Umbak saket that ate  
Ka jicinta le angen nyang raya  
Angen hikeumat meuhat sampoe le  
Po bungong pade jipupo sigra

Laju lam laot ka sret meugule  
Bandua sare deungon raja Kra  
Di Ratna Umbak ka seunang ate  
Nibak jipike ka pana sigra

Astagfirullah leupah meusampe  
Meunan teukeudi nibak Rabbana  
Bak Musif Tapa hingga meuthee le  
Leupah get pie di ureueng tuha

Dua droe sahbat meuhat neuhei le  
Laju ka sampoe keunan jiteuka  
Peue na meukeusud po ma boh ate  
Nyang jeuet neupa ngge kamoe nyoe dua

Nyang jeuet gata keunoe lon pangge  
Lon yue peuhase kandran keu hamba  
Lon keumeung jak eu po bungong pade  
Saleh ka mate di nanggroe Cina

Oh lheueh nibak nyan di Raja Sihe  
Ka jideumpek le deungon meutaga  
Hingga sikeujab siat ka sampoe  
Laju ka lahe le Raja Singa

Di Musif Tanpa sigra neukek le  
Takalon muble sang kilat faja  
Keudeh u manyang meugrang-grang su le  
Hingga ka sampoe lam laot raya

Neukalon yoh nyan po bintang kande  
Meugule-gule dalam ie raya  
Ngon Raja Samba ng sinan sirungkhe  
Ka rab-rab mate lam laot raya

Di Musif Tapa teuka weueh ate  
Laju ka ile deungon ie mata  
Di Musif Tapa hingga teupike  
Neubalek droe laen nyan rupa

Sang-sang panglima garang bukon le  
Peudeueng ka hase neuduek cong guda  
Tanoh seureugam yoh nyan neucok le  
Deungon sakti neusrom le sigra

Sang panglima prang garang bukon le  
Peudeueng ka hase neuduek cong guda  
Tanoh seureugam yoh nyan neucok le  
Deungon sakti neusrom le sigra

Ateueh samlakoe po bungong pade  
Seureuta sare deungon Raja Kra  
Puleh le pangsan intan meuble-ble  
Teungoh yoh nyan le u darat lanja

Beungehpi sangat didalam ate  
Asoe meutete mirah ngon muka

Sidroe pahlawan garang bukon le  
Po bungong pade deuh neueu rupa

Hingga neupeurab leugat keunan le  
Hana teupike rugoe ngon laba  
Peudeueng nyang raya mata meuble-ble  
Umpama suwe neutak le sigra

Suara meutum na nyum reuloh gle  
Na nyum sang mate di Musif Tapa  
Laju teuringat didalam ate  
Gagah bukon le nyan Raja Jeumpa

Ngon Raja Sambang timang that uke  
Teuga bukon le ureueng nyan dua  
Di Musif Tapa yoh nyan teupike  
Bahle ku uji po bungong jeumpa

Cokma nyang raya hingga grak le  
Neupoh sang suwe ureueng nyan dua  
Hana cit keunong po bungong pade  
Tajam bukon le bak neuboh sangga

Oh seb meupoh-poh saboh han reule  
Yoh nyan tajo le laju meuwa-wa  
Timu ngon barat meucron-cron sabe  
Hingga ka akhe ka jeuem poh dua

Di Raja Jeumpa meunyum tho ate  
Na nyum han ek le po bintang kala  
Di Musif Tapa hingga neupike  
Bah ohnoe akhe ulon pumada

Neubalek rupa sigra yoh nyan le  
Ka muwoe sare miseue ban nyang ka  
Oh ban neukalon le bungong pade  
Meugruba tajo le laju ka neuwa

Deungon ie mata meubura ile  
Po ma boh ate hana kon saja  
Lon sangka Cina siraja jahe  
Nyankeu roe sampoe lon lawan ngaza

Meuah hai po ma hamba teukeuse  
Hudep ngon mate bek le meudeesya  
Di Musif Tapa sigra seuot le  
Aneuk boh ate cit ulon saja

Cit ulon uji sicampli awe  
Hana teukeuse cit ulon cuba  
Ret deh ngon ret noe geumumoe-moe le  
Seureuta sare deungon Raja Kra

Alah hai aneuk po ceudieng pade  
Lon sarap tan le po bijeh mata  
Uroe ngon malam dalam lon pike  
le mata ile ingat keu gata

Jinoe hai aneuk bek treb tapreh le  
Si Cina jahe taprang beusigra  
Gata dilua duateu sare  
Ulon boh ate tamong lam kuta

Lon jak bak putroe sambinoe kande  
Di raja jahe hanajisangka  
Keumah ngon pakat meuhat ka hase  
Yoh nyan beudoh le di Musif Tapa

Keudeh lam kuta hingga ka sampoe  
Teuma neukek le dalam astana  
Di Raja Cina hana teupike  
Jisangka pane nyan ureueng tuha

Keudeh bak putroe jiyue peutoe le  
Jiyue peungampe nyan putroe muda  
Jiyue peurunoe nak leumah ate  
Bek sinan sabé lam peutoe kaca

Tatarek urat meujaruet awe  
Eungkot takawe jikap meuruwa  
Keu Musif Tapa oh noe ka hase  
Jinoe tapike keu Raja Jeumpa

Ngon Raja Sambang sajan geusare  
Siat hana cre gob nyan dua

Hingga beurangkat leugat yoh nyan le  
Dua sirungkhe ngon Raja Jeumpa

Meugrak teukeudi bri Rabbul kade  
Ka meurumpok le geulumpang raya  
Raja Sambang kheun bak bungong pade  
Cut bang boh ate neudeungo hamba

Sinoe tapiyoh leusoh boh ate  
Jampang meuseuke jeuet sangga mara  
Geugantoe kuta cut bang boh ate  
Disinoe bah le tameudiwana

Pakat ka reumbang rijang meurok le  
Piyoh geusare sinan bandua  
Oh watee uroe tajak meurabe  
Oh malam sabé sinoe seuniya

Takoh beudarah reubah meurante  
Takoh rubek gle roh meudang ara  
Keu Raja Sambang nalam lon rawe  
Tiep uroe sabé jak meudiwana

Rata jeuep jurong gampong deungon gle  
Jijak meurabe sambang Raja Kra  
Peue-peue meurumpok habeh jicungke  
Teubee ngon ubi habeh seureupha

Bandum ureueng po saket that ate  
Han ek jiuse meunyan Raja Kra  
Ceubeueh ngon tungang teuga bukon le  
Ureueng dum mate soe-soe nyang sangga

Sigala ureueng han ek le pike  
Kuyu lam ate akan Raja Kra  
Hingga bak raja haba ka sampoe  
Jikheun bue jahe leupah that raya

Dicong geulumpang sinan jih sabé  
Oh uroe tan le jak meudiwana  
Tabee ngon ubi habeh dum reule  
Kamoepi mate dum jienanya

Dum ureueng gampong meunan jikheun le  
Susah that ate di Raja Cina  
Di Ratna Umbak yoh nyan teupike  
Hana lom mate aneuk cilaka

Laju bak nujum raja kheun sare  
Pakri ban pike wahe peundita  
Nujum jiseuot jaroe jibet le  
Hana meuseuke buet nyoe bak hamba

Jikheun Raja Kra raya miseue gle  
Ek kupeumaie ngon sikelb mate  
Raja peugah lom teuma yoh nyan le  
Ban hukum pike nibak peundita

Jikrah le rakyat leugat yoh nyan le  
Hingga ka sampoe peuet blah boh raja  
Laen bintara bujang ngon tande  
Cukop dum hase alat seunjata

Di Raja Cina yoh nyan titah le  
Nyang ulon pangge bandum na gata  
Jeh Raja Jeumpa nyoe ho ka sampe  
Pakri ban pike rakan bak gata

Raja nyang peuet blah bagah seuot le  
Meunyo goh mate kamoe sineuna  
Bah neuduek keudroe tuanku duli  
Sihah bek neucre dalam astana

Nyan Raja Jeumpa kamoe poh mate  
Siat ek hase keunoe ulon ba  
Adat na rakan nyang gagah sare  
Pane mustahe han ek tatampa

Oh lheueh jikheun nyan nyoe beurangkat le  
Cukop dum hase pahlawan tandra  
Uyub geulumpang keunan peurab le  
Jisurak sare meutaga-taga

Di Raja Sambang yoh nyan deungo le  
Geunta lam ate dum ureueng Cina

Wahe cut a bang ka jeuet meuhase  
Si Cina jahe nyoe ho ka teuka

Bah tajak ampeueng sibajeueng kafe  
Adat ka mate tapaban teuma  
Oh lheueh jikheun nyan yoh nyan jigrob le  
Ban dua sare ngon Raja Jeumpa

Laju dalam blang keunan ka sampoe  
Beungeh bukon le Sambang Raja Kra  
Jisuet le iku ban bak u sare  
Panyangpi lahe seureutoh deupa

Jipoh le ureueng bandum meugule  
Ladom nyang mate ladom nyang luka  
Jicarueh ureueng bandum meurante  
Ban galak ate ka jigeulawa

Mubati-bati meugule-gule  
Han peue tapike keubuet Raja Kra  
Di Raja Jeumpa saboh peureute  
Ngon peudeueng sabe neuproh bak muka

Meunyo ka neutak teukeupak mate  
Hana hudep le Cina cilaka  
Leubeh siteungoh nyang ka hana le  
Jiplueng dum sare u dalam kuta

Nyang na-na tinggai nyang hana mate  
Jiwoe laju le keudeh bak raja  
Jijak ngadu droe jinoe nyan pakri  
Kamoe dum mate meulaksa-laksa

Di Raja Sambang ngon bungong pade  
Nyanpi ka sampoe cong geulumpang raya  
Hidangpi ka na sinan ka hase  
Hidang sakti bak Musif Tapa

Ranubpi ka na sinan lam bate  
Po bungong pade makan le sigra  
Sare lheueh makeuen hidang gadoh le  
Ka hireuen ate di Raja Jeumpa

Keu raja peuet blah lon peugah lahe  
Hingga ka sampe gisa bak raja  
Jaroe dua blah bagah angkat le  
Ampon ya duli mulia-mulia

Keubiet Raja Kra teuga bukon le  
Geutanyoe mate han jan tagisa  
Jipoh ngon iku laju muwe-we  
Keubiet nyo sihe sambang Raja Kra

Di Raja Jeumpa teuga bukon le  
Umpama suwe didalam tandra  
Dua deungon bue han peue tapike  
Bukon lon puji keubiet that teuga

Di Raja Cina geunta lam ate  
Oh jideungo kri meunan meuhaba  
Lheueh nyan di nujum jikheun teuma le  
Bek susah ate e po meukuta

Bah le buet ulon singoh lon use  
Lon boh lam rante sambang Raja Kra  
Malampi jula hingga ka akhe  
Piyoh beurhenti preh teubiet faja

Haba lon reupang bek panyang sae  
Hingga beungoh le peungeuh lam donya  
Jibeudoh nujum sibajeueng jahe  
Rakyat dum sare jihimpon teuma

Deungon pahlawan teuga bukon le  
Cukop ngon rante ngon jrat meulila  
Keudeh dalam blang hingga ka sampe  
Jisurak sare sa ng geumpa donya

Di Raya Jeumpa sigra beudoh le  
Bandua sare deungon Raja Kra  
Ka neujak ampeueng dum tandra kafe  
Bak Rabbul kade neulakee doa

Neusuet ngon peudeueng cahya meuble-ble  
Kanan ngon kiri neuhapet sigra

Ka roh diteungoh po bungon pade  
Cina dum sare ban siseun lingka

Peudeueng neusandang tajam ban suwe  
Laju ka reule sikhan kawan bha  
Beuthat meureutoh musoh ka mete  
Jiek dum sare miseue seurangga

Di Raja Sambangpi siat tan pre  
Taeu meugule dum tandra Cina  
Masa nyankeu prang agam bukon le  
Ureueng dum mate meukeuba-keuba

Di nujum Cina saket that ate  
Jijak mita le nyan Raja Jeumpa  
Hingga meuteumeung po bungong pade  
Si nujum jahe buka le haba

Sang-sang roe gata teuga bukon le  
Tapoh dum sare rakyat sineuna  
Jinoe deungon lon nyang baro sabe  
Cuba tauji teunaga gata

Di Raja Jeumpa sigra seuot le  
Nyang lon meuate cit deungon gata  
Ngon tulong Tuhan Ilahun kade  
Ek kupeumate kah hai cilaka

Ban nujum deungo tuto that singke  
Saket that ate sihe cilaka  
Jisuet ngon peudeueng meucreueng bagah le  
Po bungong pade jitak le sigra

Tajam neukilah bagah ban suwe  
Peudeueng meubati na siploh deupa  
Di nujum Cina malee bukon le  
Napsu han sampe pumate raja

Yoh nyan jitak lom hana jipupre  
Umpama suwe peudeueng meugisa  
Silab sigeutu meulu meutangke  
Yoh nyan keunong le di Raja Jeumpa

Peudeuengpi patah reubah meugule  
Po bungong pade bacut tan luka  
Neubeudoh pantah bagah yoh nyan le  
Si nujum jahe neubalah sigra

Di nujum bagah pantah ban suwe  
Utoh bukon bak jiboh sangga  
Silab sigeutu laju keunong le  
Hana cit mate di nujum Cina

Meung bulee sion bak asoe han cre  
Di nujum sihe jibeuet le doa  
Teuka le naga rupa ka lahe  
Badan seunabe ngon krong lhee gunca

Di nujum Cina yoh nyan jikheun le  
Peue lom kapike hai raja naga  
Nyan pat eumpeuen kah cit sah ka lahe  
Kauet jinoe le nyan Raja Jeumpa

Naga jipeurab leugat keunan le  
Po bungong pade teudong teupula  
Di Raja Sambang yoh nyan teupeus le  
Ka keunong sihe nyan Raja Jeumpa

Di Raja Sambang yoh nyantji jise  
Jumbeng teudong le saboh that raya  
Naga jigeleng teupunggeng mate  
Saket that ate di nujum Cina

Jicinta laen yoh nyan bagah le  
Trok angen sihe meubura-bura  
Yoh nyan jipupho po bungong pade  
Meusuwe-suwe keudeh lam hawa

Lheueh nyan jicinta geuruda sihe  
Siat ka sampe keunan jiteuka  
Di nujum Cina teuma peugah le  
Kajak poh mate jih Raja Jeumpa

Deungon Raja Kra bandua sare  
Bek na hudep sinoe lam donya

Inong geuruda sigra beudoh le  
Hingga ka sampe ubak Raja Kra

Ngon Raja Jeumpa bandua sare  
Teuma jieut le sigo bandua  
Oh ban lheueh jiuet bandua sare  
Kakeu hana le ureueng nyan dua

Yoh masa jiuet po bungong pade  
Neupanda ng sare le Musif Tapa  
Oh ban neukalon susah that ate  
Ie mata ile meulumba-lumba

Meureundum Ratna yoh nyan tanyong le  
E ma boh ate pakon that rugha  
Di Musif Tapa neupeugah sare  
Banta hana le deungon Raja Kra

Ka jiuet uleh geuruda sihe  
Keunong sakti bak nujum Cina  
Meureudum Ratna yoh nyan weueh ate  
Teuma jimoe le deungon ie mata

Bukon le sayang lon tambang kawe  
Eumpeueh hana le ka tinggai mata  
Bukon le sayang cut bang boh ate  
Leupah meusampe bak seutot cinta

Habeh ngon nanggroe gampong deungon gle  
Kareuna pie sayang keu hamba  
Bak seutot ulon cut abang mate  
Ka keunong sihe bak nujum Cina

Teungoh di putroe jimoe meusyae  
Yoh nyan seuot le di Musif Tapa  
Boh bek le kiyam hai bintang kande  
Ka grak teukeudi Tuhan nyang Esa

Idin lon tuan cut putroe kande  
Siat ulon cre teubiet u lua  
Lon jak pareksa po bungong pade  
Kadang ka mate lam pruet geuruda

Idinpi ka lheueh bak putroe kande  
Ponek gadoh le ngon sikleb mata  
Di sinyak putroe hireuen lam ate  
Watee jipike keu Musif Tapa

Umpama ureueng na amai sihe  
Hana deuh lahe gadoh di mata  
Hingga ka sampoe bak teumpat sunyi  
Ponek ka neuse sahbatneu dua

Ngon siklep siklap siat sampoe le  
Si Bayan Jani ngon Sanan Diwa  
Bak Musif Tapa jisujud sare  
Ponek boh ate peue pangge hamba

Nyang jeuet ulon hei gata ulon se  
Raya meuseuke ulon bri haba  
Jeh Raja Jeumpa nyang ka hana le  
Ka keunong sihe bak nujum Cina  
Cuba jak kalon po bungong pade  
Peuekeu ka mate lam pruet geuruda  
Di Jani Bayan yoh nyan beudoh le  
Bandue sare ngon Sanan Diwa

Ponekpi neuwoe bak putroe kande  
Di Bayan Jani jijak mumita  
Bak saboh padang keunan sampoe le  
Deuh jieu lahe inong geuruda

Sideh lam awan meusuwe-suwe  
Di Bayan Jani beungeh jih raya  
Jigeudam tapak na nyum sang reule  
Geuruda sihe ka sret u donya

Jipeurab keunan le Bayan Jani  
Laju jipriek le geuruda raya  
Leumah le raja bandua sare  
Miseue ka mate lam pruet geuruda

Ka jipeupuleh bagah yoh nyan le  
Po bungong pade deungon Raja Kra

Di Raja Jeumpa hingga neungieng le  
Nyan Bayan Jani ngon Sanan Diwa

Oh lheueh neupandang yoh nyan tanyong le  
Peugah beusare soe nama gata  
Ampon tuanku keumala kande  
Lon surohan le nek Musif Tapa

Ponek yue jak eu po bungong pade  
Ka keunong sihe buet nujum Cina  
Oh ban neudeungo seunang that ate  
Yoh nyan neukheun le di Raja Jeumpa

Raya tulongan keu kamoe tabri  
Adat han ka mate kamoe bandua  
Teungoh meututo po ceudieng pade  
Yoh nyan gadoh le sihe bandua

Muda samlakoe hingga beudoh le  
Bandua sare deungon Raja Kra  
U dalam sap prang riwang keunan le  
Meurumpok sare ngon nujum Cina

Teungoh jimeung woe bandum jisare  
Meupeueng neutak le nibak keupala  
Teukeujot raja di nujum sihe  
Teuma jikheun le meunoe meuhaba

Ka troh ka riwang kah goh lom mate  
Nibak kupike ka mate pana  
Meunankeu jikheun di nujum jahe  
Saket that ate di Raja Jeumpa

Neuta k lom laju sigeutu tan pre  
Kanan ngon kiri meugisa-gisa  
Di nujum Cina arat bukon le  
Tungkat bak bumi jitiek sigra

Tungkatpi jitak kruengpi ka jeuet le  
Reuleueng dum sare teuka lon bungka  
Di Raja Jeumpa hana neuweh le  
Rab-rab meugule dalam krueng raya

Di Raja Sambang yoh nyan teupike  
Ka keunong sihe nyan Raja Jeumpa  
Jibeuet le saboh doa sakti  
Yoh nyan ka jeuet le gunong nyang raya  
Gunongpi bicah tanoh meugule  
Le that dum mate dum rakyat Cina  
Di nujum Cina akai jih tan le  
Ka gadoh pike sadak bicara

Di Raja Sambang yoh nyan tamah le  
Iku a teueh gle jiseupot sigra  
Yoh nyan jeuet apui laju ka lahe  
Di nujum sihe tutong anggeeta

Teudong teupula hana meugrak le  
Po bungong pade neupeurab sigra  
Neutak le laju si nujum jahe  
Peudeueng patah le ka meukhan dua

Oh patah peudeueng neusuet kreh bari  
Si nujum sihe neutob bak dada  
Sinan le reubah bagah meugule  
Laju ka mate hana le nyawa

Oh mate nujum jipleung dum sare  
Rakyat hana le dalam blang raya  
Keudeh lam kuta hingga ka sampe  
Bak raja duli jijak bri haba

Deelat tuanku nujum hana le  
Sideh ka mate dalam blang raya  
Buet Raja Jeumpa deungon bue sihe  
Rakyat dum mate han takira

Di Raja Cina yoh nyan susah le  
Watee jipike tijoh ie mata  
Rakyat dum pana gureepi mate  
Keubiet han hase watee jikira

Di Ratna Umbak yoh nyan marit le  
Cit ka trang lahe ulon bri haba

Ngon Raja Jeumpa bek tamupake  
Akhe bak akhe tanyoe binasa

Meureudum Ratna bek neumeuate  
Napsu han hase rugoe binasa  
Nyan Raja Jeumpa tuah bukon le  
Tapoh han mate barangri cara

Lom Raja Sambang keujam bukon le  
Bandue sare nyan siseedara  
Na lom sidroe treuk nyang kreuh that sihe  
Nama geupangge nyan Musif Tapa

Keunoe nyan ka troh tapi tan lahe  
Kreuh that sakti nyan Musif Tapa  
Meunurut kitab lon kalon lahe  
Keunoe ka sampe nyan Musif Tapa

Di Ratna Umbak meunan kheun sabe  
Meutamah ile ie mate raja  
Tande ngon bujang yoh nyan jipangge  
Jisurohan le u Buniara

Jiyue ba saleuem yue kheun bak abi  
Teuma jijak le a antosan sigra  
U Buniara hingga sampoe le  
Meuhadap duli nyan Silan raja

Ampon tuanku raja nyang ade  
Kamoe nyoe waki surohan raja  
Raja disideh dalam meuseuke  
Puprangan jadi ngon Raja Jeumpa

Meunyo na gaseh ayah syah duli  
Bantuan neubri jinoe beusigra  
Nangroe habeh soh rakyat dum mate  
Nujumpi tan le ka habeh nyawa

Habeh jipeugah awai ngon akhe  
Saket that ate di raja tuha  
Jikrah le rakyat leugat bandum le  
Teuka dum sare tuha ngon muda

Cukop ngon alat leungkap ngon beude  
Hingga ka sampe peunoh lam kuta  
Antosan beudoh disinan jicre  
Haba lom jibri bak Raja Diwa

Bak Raja Diwa hinggapi sampe  
Awai ngon akhe jikheun le sigra  
Sinanpi meuhat rakyat himpun le  
Ka peunoh sare bandum lam kuta

Dua boh nanggroe sampoe ka hase  
Yoh nyan beudoh le laju jibungka  
Dua angkatan jeumeurang ret gle  
Uteuen dum sare ka jeuet keu data  
Bak nanggroe Cina hingga ka sampe  
Yoh nyan teubiet le jak tueng tuan tha  
Geutet meuriam peulheueh ngon beude  
Peutamong sare keudeh lam kuta

Peiduek bak teumpat leugat yoh nyan le  
Minuman hase ka lheueh seudia  
Makeun ngon minum kheng khong dum sare  
Pajoh bu sate ngon sie bue tuha  
Oh lheueh pajoh bu dumpeue ka hase  
Yoh nyan marit le di Raja Cina  
Ampon ayahanda meukuta duli  
Seureuta lagi ngon Raja Diwa

Nibak siseun nyoe ulon ka mate  
Ilah hana le daya upaya  
Padum na kuta ha nco ka reule  
Padum na mate deunogn panglima

Jinoe bak bapak lon pulang pike  
Awai ngon akhe rugoe ngon laba  
Keu Raja Jeumpa deungon bue sihe  
Pakri ban hase jinoe takira

Di Raja Diwa hingga seuot le  
Bak susah ate meutuka donya

Bah le buet ka moe jinoe meuuse  
Kamoe pumate deunogn Raja Kra

Uroepi jilob seupot meule-le  
Malam ka akhe preh teubiet faja  
Bah teuduek haba keu raja jahe  
Meugisa rawe si Musif Tapa

Didalam laot ribot meugule  
Jeh jalo kawe meugisa-gisa  
Buhu lon tuka banja lon uke  
Meuang ban sot sa be roh glak tabaca

Kilat lam ujeuen buleuen ka reudee  
Sinyak koh kayee cabeueng bak bangka  
Keu Musif Tapa lon gisa lagee  
Ngon bungong keumbee Meureudum Ratna

Putroe teumanyong bungong mangat bee  
Hai ma panghulee cuba peuhaba  
Puprangan pakri jinoe nyang teuntee  
Lon deungo ka bre hana le subra

Peuekeu hana le cut bang panghulee  
Peuekeu padee deungon Raja Kra  
Kadang ka mate hana le euntee  
Han le meuteumee lon meungieng mata

Kareuna ulon geutanggong malee  
Sabe tiep watee dalam seungsara  
Cut putroe jimoe pungo ngon seudee  
Ile meuree-ree deungon ie mata

Di Musif Tapa teuma neubri thee  
Hai bungong keumbee be le that subra  
Mantong na umu teungku panghulee  
Han ek soe tipee nyan Raja Jeumpa

Si nujum Cina nyawong ka padee  
Laen meuree-ree jinoe ka teuka  
Jikeumeung jak prang po bungong keumbee  
Meureutoh ribee paulawan kha-kha

Beuthat beuka troh dum raja asee  
Han ek jitipee nyan Raja Jeumpa  
Musif Tapa Kheun meunan ban lagee  
Putroe mangat bee meulakee doa

Jileueng ngon paleuet po bungong keumbee  
Ile meuree-ree deungon ie mata  
E ya Tuhanke gata nyang troh thee  
Ulon meulakee neukabui doa

Neubri seulamat judo panghulee  
Bek ek jitipee le Raja Cina  
Bah teuduek haba jeumpa mangat bee  
Bah teuduek dilee ngon Musif Tapa

Aneuk leuk kutru di Kubu Batee  
Ja reueng that lagee jiboh guk dua  
Uroe ka suboh beudoh meuree-ree  
Maseng dum sukee meuntroe panglima

Cit Raja Silan kawan phon dilee  
Lheueh nyan lom teuntee nyan Raja Diwa  
Yoh nyan phon jijak surak meuree-ree  
Laksa ngon ribee pahlawan ta ndra

Le Raja Jeumpa hingga ka neuthee  
Neudeungo lagee dalam blang raya  
Neusuet ngon peudeueng neumat bak ulee  
Neutajo mupree lam kawan tandra

Di Raja Sambangpi saboh lagee  
Seun-seun dua lhee ka mate tandra  
Tandra Cina ek taeu meuree-ree  
Miseue boh seuke dalam blang raya

Jimat ngon beusoe bak jaroe teuntee  
Po bungong keumbee jipagab sigra  
Beuthat jipagab han cit meuteumee  
Rakyat dum padee neutak bak muka

Mate sireutoh jiek siribee  
Keubiet le sukee dum bangsa Cina

Ri-ri nyang teuka sigra le padee  
Po bungong keumbee tajam lageena

Di Raja Diwa meurasa dilee  
Saboh ileumee yoh nyan jibaca  
Di Raja Diwa ka laen lagee  
Rupa meuteuntee ka miseue naga

Laju jimeung uep po bungong keumbee  
Jikalon lagee uleh Raja Kra  
Raja Sambang beuet saboh ileumee  
Ka troh le mupree keunan geuruda

Nagajisama jiklong ngon gukee  
Jibalek lagee lom Raja Diwa  
Jicok le tanoh reugam ngon abee  
Jisrom le meupree iku Raja Kra

Di Raja Sambang ka jeuet keu batee  
Keunong ileumee bak Raja Diwa  
Oh jimeung lumpat ka brat sang batee  
Surak meuree-ree dum rakyat Cina

Laju jikarak jipoh bak ulee  
Hana le la gee Sambang Raja Kra  
Yoh nyan jiteuka dum Cina asee  
Po bungong keumbee jijrat le sigra

Jrat beusoe neucang leukang ban abee  
Ladom putoh lhee rante meulila  
Yoh nyan arat that riwat mangat bee  
Digot meuribee pahlawan tandra

Tulong ngon bantu han peue neulakee  
Po bungong keumbee peusak teunaga  
Adat na Raja Kra ka jeuet keu batee  
Pakri ban lagee jinoe neudaya

Neupet ngon mata hana neupeubree  
Hana le neuthee bak neucang Cina  
Ngon Sanan Diwa hingga meuteumee  
Po bungong keumbee neudong le sigra

Ngon peudeueng meuhat neumat bak ulee  
Neukalon lagee nyan Sanan Diwa  
Sigeutu silab Diwa ka lale  
Neugrob le mupree raja lam tandra

Neucang dum rakyat meuseu-e pate  
Hana le neuthee sigala-gala  
Sidroeneu jatoe po bungong keumbee  
Ka jeuet keu batee Sambang Raja Kra

Troh Jani Bayan gob nyan tan neuthee  
Teungoh that lale nyan Raja Jeumpa  
Keu Raja Jeumpa bah ohnan dilee  
Ulon kheun lagee keu Sanan Diwa

Ngon Cani Bayan disinan lale  
Jibeudoh abee meuhue-hue hila  
Sabe that tuah saboh ileumee  
Ret noepi batee ret deh meulila

Uroe nyan geuprang sang habeh lagee  
Meuseu-e pate dum mate tandra  
Mate sireutoh ka troh siribee  
Jiek meuree-ree miseue seurangga

Mulai beungoh sampoe ka poh lhee  
Bacut hana bree puprangan reuda  
Di Raja Cina sideh lam juree  
Jak kalon lagee dalam blang raya

Jicok ngon peudeueng reugam bak ulee  
Jisok ngon bajee ngui kulah kama  
Keudeh lam sap prang rijang jikajee  
Tinggai lam juree nek Musif Tapa

Ngon Meureudum Ratna Jeumpa mangat bee  
Disinan lale lam peutoe kaca  
Oh ka leupah tren di raja asee  
Neupeuet lagee di Musif Tapa

Nek Musif Tapa baca ileumee  
Ka troh le meuhee nyan Raja Singa

Neucok cut putroe gubo neupangkee  
Po bungong keumbee peuek cong guda

La lu neupupho ha n meuho euntee  
Keudeh meuree-ree lam awan mig  
Di Ratna Umbak nyang le ileumee  
Yoh nyan ka jithee laen that rupa

Jieu manyang kandran jikajee  
Deungon ileumee ka jipareksa  
Leumah jikalon pò bungong keumbee  
Seureuta teuntee ngon ureueng tuha

Di Ratna Umbak jikheun ileumee  
Teuka le bade ngon angen raya  
Ka sret u bumoe putroe mangat bee  
Seureuta ban lhee ngon Musif Tapa

Di Ratna Umbak kheun lom ileumee  
Apui meuree-ree ka hu meunyala  
Ka tutong putroe ngon nek panghulee  
Tutong lom batee nyang raja singa

Teuduek haba nyan disinan dilee  
Ulon kheun lagee keu raja Cina  
Jibri bantuan yoh nyan meuree-ree  
Sabab jilakee le Raja Diwa

Ngon Cani Bayan lawan jih teuntee  
Keubiet jimalee sakti diwa  
Di Raja Silanpi sang ka layee  
Ka mupok ulee ngon Sanan Diwa

Muprang meugucoh jibeudoh abee  
Masa nyan lagee get timang padra  
Di Raja Cina teuma jibri thee  
Jiyue peuteuntee ho ka Raja Kra

Teuma jijak le sare meuree-ree  
Deuh jieu lagee yoh nyan Raja Kra  
Dicong geulumpang teuduek meuteuntee  
Iku jilagee ban taloe tima

Jimat bak iku laju siribee  
Jitren cong kayee uyub jihila  
Raja Sambang kheun laju le teuntee  
Bek meunoe lagee lon taenanya

Tacok ija brok ikat iku kee  
Minyeuk lom taple bubasah ija  
Tatot ngon apui laju meuteuntee  
Taeu rijang padee lon habeh nyawa

Jipateh laju le Cina dungee  
Jipubuet lagee suroh Raja Kra  
Apupipi ka hu taeu meuree  
Jigrob cong kayee Sambang Raja Kra

Keudeh lam tandra sigra jikacee  
Tutong sang rujee dum ureueng Cina  
Jiplueng meu-u dum jiboh ulee  
Na tutong bajee na tutong ija

Di Raja Jeumpa neulet meuree-ree  
Nyang peuget lagee Sambang Raja Kra  
Rumoh dum tutong ka jeuet keu abee  
Gadob ileumee dum raja-raja

Dalam astana yoh nyan jikacee  
Ka tutong juree putroe ngon raja  
Di Raja Cina ka jeuet keu abee  
Sinan lam juree deungon judonya

Putik timon phang karang boh jambee  
Luroh lam abee keunong geulawa  
Napsu jih han troh nyawong ka padee  
Bungong gob pangkee galak meuhawa

Teutapkeu mate di raja asee  
Lon puwoe ulee keu Raja Jeumpa  
Buhu lon ubah meuah hai guree  
Bek jeuet keu malee bak karang haba

Rusa rot pade di gle Banggalang  
Jiplueng lam padang oh beungoh uroe

Di Raja Jeumpa ngon Raja Sambang  
Habeh saboh nyan jak mita putroe

Dalam meuligoe disinan ka tan  
Teubit lam padang lheueh nyan lom dudoe  
Bandua sare ngon Raja Sambang  
Laju beujalan rata jeuep sagoe

Yoh nyan apui hu laju neupandang  
Ponek didalam deungon cut putroe  
Pupuleh apui le Raja Sambang  
Teuduek le rijang ureueng dua droe

Ponek ngon putroé puleh bak pangsan  
Peurab le yoh nyan muda samlakoe  
Neusumah po ma le rijang-rijang  
Oh-lheueh nibak nyan beudoh cut putroe

Seumah samlakoe cut putroe intan  
Ie mata sajan meutaloe-taloe  
Meucom ngon muwa hana peue peutrang  
Cinta ngon sayang ret deh ngon ret noe

Musif Tapa Kheun teuma le rijang  
Hai uleebalang muda samlakoe  
Tajak riwang lom keudeh lam sap prang  
Jeh Cani Bayan kadang ka paloe

Tapoh bumate nyan Raja Silan  
Supaya aman mangat tajak woe  
Teuma beudoh le po banta seudang  
Ngon Raja Sambang laju dua droe

Hingga ka sampoe keudeh lam sap prang  
Leumah neupandang ureueng dua droe  
Leumah neukalon nyan Raja Silan  
Ngon Cani Bayan teungoh meukiloe

Di Raja Jeumpa ngon Raja Sambang  
Neupeurab rijang laju keunan toe  
Ka neusuet le kreh di muda seudang  
Nyan Raja Silan teutoh le jinoe

Reubah meugule mate disinan  
Kakeu tinggai nan sinoe lam nanggroe  
Le Raja Diwa lanja jipandang  
Hana le kawan ka tinggai sidroe

Yoh nyan phon jicok le langkah panyang  
Sa nan Diwa nyan ampeueng le dudoe  
Keudeh ngon keunoe ka meutang ilang  
Hana le jalan di raja pindoe

Jikheun sakti laju le rijang  
Ka jeuet le badan laen ban bagoe  
Miseue geuruda meunan rupa sang  
Keumeung peureulan Sanan Diwa nyoe

Di Sanan Diwapi mita jalan  
Ka jeuet le badan rupa ban taloe  
Geuruda bajeueng meutaron yoh rijang  
Taloe meureuntang keudeh ngon keunoe

Yoh nyan geuruda susah pikeran  
Jimita jalan laen ban bagoe  
Na miseue jarom yoh nyan jeuet badan  
Leupah jeumeurang ka lheueh lam taloe

'Di Sanan Diwapi ka laen ban  
Peujeuet le badan yoh nyan ban beusoe  
Beusoe beurani jarom jitawan  
Hana le leukang sinan meupatroe

Di Raja Diwa teuma oh lheueh nyan  
Keu apui rijang laju peujeuet droe  
Apui ka mirah lagee ngeu arang  
Ka tutong yoh nyan laju nyan beusoe

Di Sanan Diwa arat kon wayang  
Hana le jalan nibak peulheueh droe  
Muwoe riwayat keu Raja Sambang  
Jitupeue yoh nyan ka meunan bagoe

Peulheueh sakti di Raja Sambang  
Ujeuen le rijang keunan ka sampoe

Apuipi ka len teuma le rijang  
Ka teuka seunang yoh nyan dibeusoe

Di Raja Diwa beungeh kon wayang  
Jipeujeuet rijang laen ban bagoe  
Rupa miseue kleueng laju teureubang  
Keudeh u manyang laju ka jipo

Di Sanan Diwa beudoh le rijang  
Ban siwah yoh nyan rupa jeuet dudoe  
Jiseutot le kleueng keudeh lam awan  
Sideh di manyang meukiloe-kiloe

Di kleuengpi ka sret meulayang-layang  
Di Raja Sambang jitupeue dudoe  
Peulheueh sakti saboh mie agam  
Kleueng nyan jikuran laju jiseudoe

Di Raja Diwa nyawong ka hilang  
Seungab deungan prang didalam nanggroe  
Ka keumah putroe geujak cok pulang  
Deungan pahlawan han le meung sidroe

Seungoe lam gampong seungab dalam blang  
Nanggroe ka aman rumoh habeh bhoë  
Rakyat dum mate bangke meutimphan  
Nyang agam-agam tinggai sidroe-droe

Seungab meuratoh teudoh su geundrang  
Piyoh peurasan ka beungoh uroe  
Tamat riwayat raja neumuprang  
Jinoe lon karang haba bak geuwoe

Alhamdulillah leupah bak mara  
Tuhan karonya sampoe ban hajat  
Hingga le beudoh di Raja Jeumpa  
Ngon Musif Tapa cut putroe ubat

Oh lheueh nyan marit le Musif Tapa  
Wahe aneukda po bungong riwat  
Di gata tawoe u nanggroe Jeumpa  
Deungan Raja Kra putroe lom meuhat

Dilon nanggroe droe sidroe lon gisa  
Idin aneukda jinoe beuleugata  
Beudoh le raja jak seumah po ma  
Cut putroe Ratnapi laju peurab

Geumumat jaroe putroe ngon poma  
Di Musif Tapa lheueh nyan ka leunyap  
Gaduh meulayang hilang di mata  
Hana meuho ka ngon siklep siklap

Oh leupah geuwoe nak Musif Tapa  
Di Raja Jeumpa marit le leugat  
Bak Raja Sambang neukheun le leugat  
Beudoh jak gisa tanyoe hai sahbat

Meunan ka neukheun le Raja Jeumpa  
Beudoh rakan kra yoh nyan le leugat  
Laju ka jibloh dalam kuala  
Ngon Raja Jeumpa cut putroe ubat

Geukek ateueh rueng laju bandua  
Lam laot raya jeumeurang leugat  
Na padum lawet masa nyang lama  
U nanggroe Jeumpa sampie le meuhat

Neukalon nanggroe ka jeuet keu rimba  
Neukalon kuta hana le mupat  
Laju neupeutoe umieng kuala  
Teungoh sigra le u darat

Neujak le laju rab bineh kuta  
Ureuengpi hana neukalon seungab  
Hingga neupiyoh na sikutika  
Deungon Raja Kra ka neuduek sapat

Raja Sambang kheun bak Raja Jeumpa  
Ulon jak gisa keudeh bak teumpat  
Na idin keu lon wahe meukuta  
Uroe ka jula bek le treb lambat

Teuma seuot le nyan Raja Jeumpa  
Meugriet lageena keu peue meukarat

Hana meung troh lom dalam kuta  
Hana meurasa meunan hai sahbat

Meunoe ngon meudeh meutulak haba  
Di Raja Jeumpa na idin meuhat  
Di Raja Sambang ka leupah gisa  
Di Ra ja Jeumpapi beurangkat

Keudeh Blang Seupeueng laju neugisa  
Meureudum Ratna seureuta meuhat  
Neutamong laju dalam astana  
Siti Geulima laju le peurab

Neutren le laju ngon Raja Bujang  
Po muda seudang keunan le peurab  
Jak mumat jaroe deungon cut bang  
Cut putroe sajanpi hana silab

Sangka meuteumeung buleuen ngon bintang  
Han peue peutrang daket ngon mangat  
Peutamong laju jeudeh u dalam  
Geupeudeuk yoh nyan laju bak teumpat

Ka troh u nanggroe bak teumpat aman  
Tinggai disinan putroe ngon deelat  
Dalam meuligoe putroe ngon cut bang  
Teutap lam seunang lam tiep-tiep sangat

Nibak siuroe putroe peugah ban  
E judo badan lon that meuhajat  
U nanggroe Indra siat tariwang  
Han tom lon pandang padum treb lambat

Jak saweue ayah poma lom sajan  
Rindu ngon deundam dilon hai deelat  
Hana peue salah tuah buleuen trang  
Ban gata padan dilonpi pakat

Gelakee idin bak raja bujang  
Seureuta sajan bak cuda meuhat  
Meunyo ka tajak adoe jeunulang  
Bek han tariwang keunoe u teumpat

Oh ka lheueh idin cuda ngan cut bang  
Neutren le rijang po pirák lipat  
Geucok ngon guda ka geuboh keukang  
Ka geuteureubang na miseue kilat

Deungon cut putroe samlakoe intan  
Laju beujalan atepi mangat  
Bak Musif Tapa sampoe le yoh nyan  
Piyoh disinan dilee nyan siat

Sare troh u leuen muda seudang  
Ponek didalam teubiet le leugat  
Peurab samlakoe cut putroe sajan  
Ngon ponek yoh nyan jaroe neumumat

Taek jak piyoh leusoh buleuen trang  
Intan jeunulang meutuah that-that  
Kusarap aneuk han le ta datang  
Sabab ka seunang ka lheueh meularat

Meunankeu ponek haba muwayang  
Geuk le rijang po pirak lipat  
Geudom disinan yoh nyan simalam  
Singoh oh siang laju beurangkat

Oh ka lheueh idin bak ponek badan  
Geuk cong kandran yoh nyan le leugat  
Jiplueng le laju miyub ngon manyang  
Meusu meurang-rang cahya ban kilat  
  
Bak bineh kuta hingga troh keunan  
Neutupeue yoh nyan le ayah meuhat  
Ka troh jigisa po muda seudang  
Sabab su kandran geudeungo jroh that

Neubri peurintah yoh nyan le bagah  
Yue teubiet u blang sigala rakyat  
Neubri le meuntroe ngon uleebalang  
Ngon payong keumang deundayang jimat

Hingga ka sampoe cut putroe keunan  
Deungon sulton yoh raja deelat

Seumbah ngon sujud lagee atoran  
Geuba u dalam teuma le leugat

Dileuen meuligoe cut putroe intan  
Geupreh disinan le ayah meuhat  
Peurab samlakoe cut putroe intan  
Geupreh disinan le ayah meuhat

Ret deh ngon ret noe meumoe-moe kiyam  
E aneuk badan meutuah-that-that  
Mantong raseuki neubri le Tuhan  
Ka troh tariwang keunoe lom meuhat

Kusarap han le meuteumeung pandang  
Gata jitawan le Cina kaplat  
Peukek u rumoh laju le rijang  
Peudeuk bak tilam deungon horeumat

Beuot khanduri geubri makanan  
Beuot minuman keu banta deelat  
Oh lheueh pajoh bu beout le puan  
Uroepi malam laju le meuhat

Jak eh cut putroe ngon lakoe sajan  
Hana peue panyang lon kheun riwayat  
Jikukuek manok uroe ka siang  
Peungeuh jeuep alam ka trang jeuep teumpat

Rata jeuep duson ka jitren insan  
Inong ngon agam keunan meusapat  
Meuntroe bintara ngon uleebalang  
Ngon panglima prang jeuoh ngon rab

Hingga meuhippon bandum u dalam  
Raja sulton neupeuduek pakat  
Bah tapeuseuon po bungong peukan  
Peujeuh malang bak putroe ubat

Sabab ka jiba le Cina suang  
Bek le meuwayang meunan akibat  
Lom tapeuseuon po banta seudang  
Sabab treb lam prang dilee meukarat

Peureutek ie on peuget ramuan  
Mangat meuriwang bandum seumangat  
Hase ngon pakat bandum ka reumbang  
Beudoh le rakan sigala rakyat

Jidrob ngon keubeue laju dalam blang  
Jihue u dalam laju jiikat  
Ka cukop keumah dum sikalian  
Hana peue panyang ulon jak surat

Alim ulama bandum ka datang  
Beuot ngon hidang meudoa leugat  
Oh lheueh seudeukah teungku neuriwang  
Ka tamat kalam dilee sikeujab

Aneuk kuek puteh jieh dalam blang  
Oh teuka musang laju ka jikab  
Po Raja Jeumpa muda bangsawan  
Tinggai bak tuan padum treb lambat

Nibak siuroe po muda seudang  
Gampong halaman laju teuringat  
Neukheun bak judo laju le rijang  
Tanyoe tariwang keudeh bak teumpat

Seuot cut putroe po bungong karang  
Pajan hai cut bang tanyoe beurangkat  
Meunyo ka idin bak du jeunulang  
Jeuet barangkajan hai bungong riwat

Teuma beudoh le cut putroe intan  
Bak ayah yoh nyan laju jipeurab  
Seureuta poma disinan sajan  
Cut putroe seudang peugah le leugat

Jilakee idin hajat jak riwang  
Po banta seudang neukheun susah that  
Hana peue salah hai intan karang  
Hana lonsagang hai bungong riwat

Pajan ha i aneuk gata tariwang  
Bak ulon tuan neupeugah meuhat

Meunyo ka idin bak ayah badan  
Lon kheun bak cut bang dilee beuteupat

Teuma jitren le kande buleuen trang  
Bak judo badan laju jipeurab  
Laju jipeugah bagah le rijang  
Idin hai cut bang bak ayah meuhat

Meunyo ka maunan hai intan karang  
Singoh hai intan tanyoe beurangkat  
Oh ka meuhaba hingga ka malam  
Geujak tiduran po pirak lipat

Singoh oh uroe peugoe cut abang  
Meukeumah rijang sigala alat  
Geusok ngon bajee geungui pakaian  
Geutren le yoh nyan bak ayah meuhat

Geuseumah ayah ngon poma sajan  
Dilon lon riwang dilee sikeujab  
Hana peue salah hai bungong peukan  
Idin lon tuan hai bintang takat

Meunyo ka tawoe wahe buleuen trang  
Keunoe meujan-jan tasaweue meuhat  
Ulon ka tuha gata lon sayang  
Na nyum bek leukang lepi meung siat

Akan teutapi han jeuet ulon tham  
Gata ha i intan tawoe u teumpat  
Aneukpi jimoe ie mata sajan  
Di banta seundangpi seudeh that-that

Di raja muda rasa ka pangsan  
Meutamah sayang keu aneuk ubat  
Di Raja Jeumpa seuot le rijang  
Jeuet kamoe riwang keunoe lom meuhat

Meunyo na umu neubri le Tuhan  
Bek na halangan asoe bumangat  
Cit kamoe meuhat keunoe meuriwang  
Teuma oh lheueh nyan laju beurangkat

Neuek cong guda laju neupsang  
Po muda seudang deungon cut ubat  
Gudapi bagah laju meulayang  
Ka jiteureubang umpama kilat

Bak Musif Tapa hingga troh datang  
Geutren disinan dilee sikeujab  
Geudom simalam nibak tempat nyan  
Beungoh beujalan laju beurangkat

Guda teureubang sangat that tajam  
Meusu meurang-rang tajam ban kilat  
Keudeh Blang Seupeueng ka troh le yoh nyan  
Guda teureubang sujud le leugat

Oh troh Blang Seupeueng tamong u dalam  
Bak Raja Bujang laju geupeurab  
Geuseumah cuda seureuta cut bang  
Beuot hidangan geumakeuen leugat

Teutap lam kuta po muda seudang  
Ngon judo badan meugaseh that-that  
Han tom siuroepi na le leukang  
Nakeu miseue ban darah ngon jasad

Kuta Lhab Manapi peugot rijang  
Teumpat diaman po bungong riwat  
Teutapkeu raja didalam aman  
Neumat hukumanpi ade that-that

Nanggroepi makmu rakyatpi seunang  
Inong ngon agam pubuet ibadat  
Alhamdulillah ka neumat kalam  
Ngon tulong Tuhan kudrat iradat

Ulon tot naleueng rangkileh tutong  
Rab habeh gampong apui jikarat  
Oh noe hikayat haba ka puntong  
Oh noekeu lansong dalam riwayat

Deungon Fatihah kisah ulon tob  
Jaroe lon rahob laju bak muda

Tamat riwayat lon lhat pateulot  
Daweuet ulon tob keubah bak meja

Ateueh seedara jaroe lon beuot  
Lon angkat salot soe-soe nyang baca  
Harap peumeuah pat-pat nyang karot  
Bek na neucarot upat ngon ceula

Karangan jameuen ureueng nyang patot  
Dilon seun bacut lon gubah haba  
Ureueng karang phon hana geuseubot  
Saleh pakri jeuet han geuboh nama

Pujangga Aceh leubeh that patot  
Jamuen u likot dahulu kala  
Le that karangan nyang ka geuseubot  
Wahe intan cut hikayat dum na

Dilon dek buleuen hireuen ngon takjub  
Hana geuseubot meung bacut nama  
Pakonkeu meunan sampoc ck lupot  
Dilon intan cut han ek lon duga

Akan aruah lon angkat salot  
Beungoh ngon supot lon lakee doa  
Beuluah kubu dikeue ngon likot  
Neubri beuteutob pinto neuraka

Astagfirullah limpah ujeuen sret  
Salah ngon karot ampon Rabbana  
Oh noekeu sagai haba peunutob  
Kalam lon cabot ohnoe mumada

Perpus  
Jende

 bp BALAI PUSTAKA — JAKARTA